

NitamashtilisteKwal Yehshwa-Kristo yewal kikwihkwilo Lukas

El Evangelio según Lucas
en
Nahuat del Este de Durango



Primera edición
El Evangelio según Lucas
Nahuat del Este de Durango
azd 18-002 2C
©2018 Wycliff e Bible Translators, Inc.

Versión electrónica ©Wycliffe Bible Translators, Inc. 2019
www.scriptureearth.org

Licencia Creative Commons (Reconocimiento-NoComercial-
SinObraDerivada 4.0 Unported)

- Compartir — Usted es libre de copiar, distribuir y comunicar públicamente la obra.
- Reconocimiento — Debe reconocer los créditos de la obra.
- No comercial — No puede utilizar esta obra para fines comerciales.
- Sin obras derivadas — No se puede alterar, transformar o generar una obra derivada.

(<http://creativecommons.org/licenses/by-nc-nd/4.0/>)

NitamashtilisteKwal Yehshwa-Kristo yewal kikwihkwilo Lukas

Lukas kikwihkwiloli Te'ópilo

1 ¹Tasotili Te'ópilos, myak takam motalik kwihkwilok in tapowaliste kina omotachi kampa melawak yok panok ika tehwane, ²kina tishnishtilik yehwane nitahtolme kitak kina omotachi kimani omopewalti, wan yehwane kinonanak in tiki-panoliste pa kitotiyaloskya nitahtolmeDyos. ³Newal niyok tasotili Te'ópilos, onimomashti kwal mochi pa kimani omopewalti, wan kwal pa nimishmashtis ka takwihkwiloliste pa tihmatiskya kina opan, ⁴pa timomashtis kwal in melawak in ten mishmashtik.

Tanawatiliste ka in takatiliste pa Yuhanes

⁵Pa inik tonatim in Herodes katka Rey pa Yudaya, katka se totats itoka SakarYah, yewal katka pa se tanichikol ka in totatsim kintokayoltiloya AbíYah. Nisiwa itokaya EliSabet, yewal katka nikolinche Arón. ⁶Moshte omente, SakarYah wan EliSabet kwal kichiwaloya i'ishpa Dyos wan kimawishtililoya mochi tamawishtiliste wan nitahtolmeDyos pa in TATS. ⁷Ma yok, amo kipiwaloya ininpilwam, kampa EliSabet amokwal kinpiyaskya ininpilwam, moshte omente kolinche katkaloya.

⁸Pa se tonat, SakarYah tikipanowaya kina se totats pa kalitik in tyopWe pa i'ishpa Dyos kampa kitokarowaya nitanichikol AbíYah, ⁹yok kina kimatiloya kichiwaloya ika totatsim, pa in tonat kichiwak, ak itonal, katka pa kalakiskya pa nityopWe in TATS pa tapopochoskya. ¹⁰Kwah tapopochotikatka, moshte masewalme katkaloya kiyawak pa in tyopWe kitahtoltitikataloya Dyos. ¹¹Kwah NitanaawatilanhelTATS omoneshti ka SakarYah, moketstikatka pa nitankwakwal, kaha tatamakal kaha kitalil poposhte. ¹²Kwah SakarYah okit in Nitanaawatilanhel, motapololliyaya wan amo kimatiya ten kichiwaskya. ¹³Wan in Nitanaawatilanhel kili:

—SakarYah, amo shimomapti, kampa Dyos okikak motahtol yewal mishnankili, mosiwa EliSabet mishmakas se mokon, wan tewal tiktokayoltis Yuhanes. ¹⁴Tikpiyas paki-liste, wan myak kipiwaske pakiliste ka nitakatiliste; ¹⁵kampa mokon we yes pa i'ishpa in TATS. Amo konis nihugoUbaBino wan amo konis alkol, wan kipiwas miyak EspirituSanto pa kimani ayamo takatis. ¹⁶Kichiwas yewal myak pa in pweblo Isra'El pa kikwepaske taneltokaliste ka TATS ininDyos. ¹⁷In Yuhanes yaptiyas ta'ishpa pa in TATS, ka in Espiritu wan in nichikawaliste in niTaketsal nitahtolDyos EliYah, pa kwal motakichilitiyaske nitats inak ininpilwam, wan inik yehwante amo kimatil takakil kimatiske takakiske. Yok kichiwas ka in masewalme pa kinamikiske in TatsDyos.

¹⁸SakarYah kitahtanili Nitawatilanelhel:

—Kina nihmatis newal ta melawak kina tinichilitik? Kampa newal hyero nikolinche wan nosiwa niyok.

¹⁹In Nitawatilanelhel kinankili:

—Newal niGabriEl, wan newal niktikipanoli Dyos; yewal onishtake pa nitahtos monak wan nimishmakas nitamashtilisteKwal. ²⁰Kina amo otishneltok ka notahtolme, amokwal titahtos pa kimani takatis mokon. Yok kimani motachiwias pa inik tonatim kina nimichili.

²¹Moshte masewalme, katkaloya pa kiyawak kichishtikalaloya SakarYah, wan motahtanililoya pates wehkaptikatka kisaskya pa in tyopWe. ²²Kimani okis, amokwal kina tahtoskya; kimatik kampa tachiyaya kina tatimiktiyaskya pa in tyopWe. Wan kintakichiliyaya ka nimahwam.

²³Kwah omotam nitikipanoliste SakarYah opanoti icha.

²⁴Wan amo wehka, nisiwa EliSabet moka ostiti ta'apa, wan pa makwil meste amo okis pa nikal, tamatiti: ²⁵“In TATS onishchiwil in ashka, pa yok in masewalme yahmo nishihyaske.”

Tawatiliste ka nitakatiliste Yehshwa

²⁶Pa chikwase meste ostitikatka tomaptikatka EliSabet, Dyos okitake Nitawatilanelhel GabriEl pa in Wepweblo Galileya itoka Nasaret, ²⁷kampa mochantiyaya se siwatYankwik itoka Marya. Ayamo motekaya ka se takat, kampa tatahtanil katka pa monamiktiskya inak se takat itoka Yosé, nikolinche katka weRey Dawid. ²⁸In Nitawatilanelhel okalak kaha katka yewal wan kili:

—Shikpi pakiliste, Dyos mishmashti kwal! In TATS onka ka tewal.

²⁹Marya motapololti ka in tahtolme, wan motahtaniliyaya ten okinek okit tatahpalol. ³⁰In Nitanaawatilanhel kili:

—Marya, amo shimomapti, kampa tikpi pakiliste ka ta'ihniliste ka Dyos. ³¹Ashka, ti'ostitiya tita'apawas wan tikpiyas se mokon, wan tiktokayoltis Yehshwa. ³²Ina yes se we takat; yewal kitokayoltiske Nikon in Dyos HyeroTakpak, wan TATS kichiwas weRey kina niwichal Dawid, ³³pa yok reynaros hanse ipa nipweblo Yakob; nireynaroliste amo kipiayas tamiliste.

³⁴Marya kitahtanili Nitanaawatilanhel:

—Kina kwal motachiwas in, ta amo nimochanti inak takat?

³⁵In Nitanaawatilanhel kinankili:

—Yewal in EspirituSanto walas ipa tewal, wan in nichikawaliste Dyos HyeroTakpak mishtsakwilis ka nitasoway. Kampa yok, in piltonte yewal takatis itokas NikonDyos. ³⁶Niyok moparyente EliSabet kipiayas se nikon kampa yok abwel katka; yewal kililoya kaha yok amokwal kinpiyaskya ininpilwam ashka ta'ostitik ta'apaptik kipi chikwase meste. ³⁷Ma yok Dyos mochiten kwal kichiwas.

³⁸Kwakin Marya kito:

—Newal nitikipanol in TATS; ma kichi Dyos pa newal kina tichili.

Ka in, Nitanaawatilanhel panoti.


Marya kipashalo EliSabet

³⁹Pa inik tonatim Marya panoti ka isewiliste pa talTepet, pa se Wepweblo Yudaya, ⁴⁰okalak pa nikal SakarYah wan kitahpal EliSabet. ⁴¹Kwah EliSabet kikak nitahtol Marya, mohmolin nikon pa'itik yewal, wan yewal kipi in EspirituSanto. ⁴²Kwakin ka tsatsiliste chikawak kito:

—Dyos mishmashti pa inik siwam, wan niyok kimashti mokon yewal tikpiyas. ⁴³Ak ninewal, pa yewal owal onishpashal ninantsi noTATS? ⁴⁴Kwah kikak motahtol, nokon mohmolin ka pakiliste pa itik newal. ⁴⁵Dyos mishmak miyak pakiliste, kampa otihneltok kampa monamikis kina yewal michili in TATS.

⁴⁶Marya kito:

No'ihyo kishki we kitahtolti pa noyal in TATS,



© 1996 David C. Cook

Marya wan EliSabet (Lukas 1:41)

- 47 wan no'espiritu kwal tamat pa Dyos nishkishti pa
nota'htakoliste.
- 48 Kampa Dyos okital nishtololwam pa newal nitikipanol
amoten kipi,
wan pa ashka nishtokayoltiske pakiliste wan moshte
mokolinchim yehwante takatitiwalaske.
- 49 Kampa in kipi chikawaliste okichi pa newal wehwe
tachiwaliste;
Santo ni'itokaliste.
- 50 Dyos kipi hanse ta'ihniliste aki yehwante kimawishtilil.
- 51 Okichi ka mochi nipoderoliste;
kinshitin yehwante hyero wehwe tamatiloya.
- 52 Okinkishti inik weReye' ompa kaha motaliloya,
wan okintal kishki amoten kipiyaloya.
- 53 Inik mayantikataloya kinmak mochten,
wan inik yehwante kishki mochten kipiyaloya ka miyak
tomi kinka ka amoten.
- 54 Kipale in pweblo Isra'El nitikipanol;
amo ki'ilka pa kwal kichiwiliskya ka ta'ihniliste,
- 55 yok tishtenewilik towichalme,

Abraham wan niyok yewal takatitwalaske nikolinchim pa hanse.

⁵⁶Marya omoka yey meste ka EliSabet, kwakin omokwep pa nikal.

Nitakatiliste Yuhanes takwatiki

⁵⁷Kwah mo'as in tonat EliSabet, okitakatilti nikonTakat.

⁵⁸Wan moshte kishki ompa mochantiloya wan niparyente hyero kwal tamatiloya, kampa kitak yewal TATS kineshtili niwe ta'ihniliste. ⁵⁹Pa in chikweyi tonatim, kiwikak pa yeskya takotonil nikwerit kaha mashishal, wan kinekiloya kitokayoltiloskya kina nitats, SakarYah. ⁶⁰Wan ninantsi kito: —Amo. Itokas Yuhanes.

⁶¹Kilik:

—Amo'ak yok itok pa mokal.

⁶²Kwakin kitahtanilik ka taneshtiliste nitats in piltonte, pa yok kimatiloskya kina kinek kitokayoltiloskya. ⁶³Nitats otahtan se tabla pa takwihkwiloskya, wan kikwihkwilo: “Ni'itokaliste yewal Yuhanes.” Wan moshte mokawak tachistiyak. ⁶⁴Hani SakarYah oksep waltahto, wan kipewaya tahtolme wehwe pa Dyos. ⁶⁵Moshte yehwante ompa mochantiloya motapololtiloya, wan pa mochi talTepet Yudaya taketsaloya yewal ten motachi. ⁶⁶Moshte kishki takakiloya, motahtaniloya wan mo'ililoya: —Ten yes in piltonte kwah we yes?

Kampa melak in TATS kineshtiyaya nichikawaliste ipa yewal.

SakarYah kimashtiyaya nitahtolDyos

⁶⁷SakarYah nitats in piltonte, ka miyak EspirituSanto wan kimani kimashtiyaya nitahtolDyos kito:

⁶⁸Ma kimashti in TATS, niDyos Isra'EL,

kampa wal kinkishti pa amo poliwiloskya pa nipweblo.

⁶⁹Otishwaltitanil se ka miyak chikawaliste pa tishkishti pa poliwise

ika se nikolinchim Dawid nitikipanol.

⁷⁰In yewal tishtenewiliyaya ya wehka ka inkamak ininsanto in Taketsalme nitahtolmeDyos:

⁷¹Yewal tishpalewiskya ka yehwante tishkokolil wan moshte kishki tishihyal,

⁷²kipiyaskya ta'ihniliste ka towichalme,

wan ki'ilnamikiskya in nitahtoliste.

73 Wan ka tahtol melawak kichiwili totats AbRaham: Yewal tishmakaskya.

74 Yolil, titamakawalme ka in tishkokolil, pa tiktikipanoliske amo timomaptitiyaske,

75 kwal timochantitiyaske wan chipawiliste pa toyol, mochi inik tonatim i'ishpa yewal.

76 Wan tewal piltonte, ti'itokas in niTaketsal nitahtolDyos HyeroTakpak,

kampa tewal tiyaptiyas ta'ishpa ka in TATS pa titahtotiyas Dyos nitahtol tikchiwas ni'otim pa ininyoliliste masewalme,

77 timoneshti ka nipweblo kampa Dyos kinihnili moshte kishki amokwal tamatil,

kina Dyos kinkishti pa amo poliwiloskya.

78 Kampa toDyos, ka we nita'ihniliste, tishwalikili tonat pa okse tanes,

79 pa kintawilis kishki mochantil pa se tayowaliste wan pa se hyero we tatikommat,

wan tiyaske tipanoske ka totankwa pa in ot ka sewiliste.

80 In piltonte mo'apaptiyaya wan ka chikawaliste pa in espiritu, wan mochantiti pa se tal kaha tawak yok panok inik shiwim kwah o'as in tonat kimani omomashti pa Isra'El.



© 1996 David C. Cook

SakarYah inak nikon Yuhanes takwateki (Lukas 1:80)

Nitakatiliste Yehshwa

(Mt. 1:18-25)

2 ¹Pa inik tonatim in wetatakewan Awgustus Kaysar otake pa kichiwaloskya se tapowaliste pa moshte mase-walme pa mochi kishki tal. ²In tapowaliste oye in ta'ishpa kwah Kirino katka wetatakewan pa Sirya. ³Kampa moshte monekiloya yaloskya pa ininpweblo pa mokwihkwiloloskya. ⁴Kina Yosé katka nikolinche Dawid wan mochantiyaya pa Nasaret, yewal Wepweblo katka in tal Galileya, wan opanoti pa BetLéhem, pa niWepweblo Dawid kaha otakat, yewal katka pa Yudaya. ⁵Pa mokwihkwiloskya, inak Marya, nisiwa, kampa yewal ostitikatka tomawak katka. ⁶Kwah katkaloya pa BetLéhem ompa, omo'ashilti in tonat pa kitakatiltiskya nikon. ⁷Wan ompa okipi nikon okipewalti takatiliste ta'ishpa, wan kilyaro ka shashal, okitek pa se kano, kaha kintamakal yolikilme kampa amo katka kaha wel mokawaloskya yehwante pa in kalme.

Nitanawatilanelme wan inik takwitawilme borrego'

⁸Amo wEhka pa BetLéhem katkaloya sek takam takwitawilme borrego' panoloya in yowal pa in tashosholtik kinkwitaptikakaloya ininborrego'. ⁹Wan se NitanawatilanelTATS omoneshti, wan nitawiliste in TATS kinyawalowaya nitapitaniliste ka yehwante; wan hyero momaptik. ¹⁰In Nitanawatilanel kinmili:

—Amo shimomaptik, kampa annimishwalikilitiwal se tanawatiliste kwal, yewal yes pa mochi pweblo ka miyak pakiliste: ¹¹ashka, pa in Wepweblo Dawid, otakat se yewal tishkishtis pa tota'ihakoliste, yewal Kristo in TATS. ¹²Yok ki'ishmatiske ka in taneshtiliste, in piltonte lyarotiya ka shashal, wan wistotiya pa se kano kaha kintamakal yolikilme.

¹³Hani omoneshti inak in Nitanawatilanel, se tanichikol ka nitanawatilanelme pa in ilwikak, kililoya tahtolme wehwe Dyos wan kitoloya:

¹⁴Nitawiliste in Dyos pa in takpakilwikak,
ma yolik ka sewiliste pa in tal moshte nahyehwante kipakilti
Dyos!

¹⁵Kwah inik nitanawatilanelme mokwepak pa ilwikak, inik takwitawilme borrego' mo'ilik sek ka oksek:



© 1996 David C. Cook

*Nitanawatilanhelme kintakichilil inik takwitawilme
borrego' ka nitakatiliste Yehshwa (Lukas 2:14)*

—Ma tiyak, pa BetLéhem, wan tiyaske tikitaste ten motachi, wan yewal in TATS ten tishnishtili.

¹⁶Yok oyak ka isewiliste wan okitak Marya wan Yosé, wan in piltonte wistotikatka pa kano kaha kintamakal in yolikilme. ¹⁷Kwah kitak in piltonte, taketsak kina kinmilik ika yewal, ¹⁸moshte kishki takaktikatkaloya motapololtiloya kina take-tsaloya in takwitawilme borrego'. ¹⁹Marya mochi mokawiliyaya pa niyol, wan hanse ki'ilnamiktiya. ²⁰In takwitawilme borrego', walmokwepak ka tawiliste wan ka tahtolme wehwe pa Dyos pa mochi yewal ten kitaloya wan kikakiloya, kampa mochi opan kina kinmililoya.

Kinishtik Yehshwa pa in tyopWe

²¹Kimani monamikik chikweyi tonatim kampa in piltonte kipiayakya takotonili nikwerit kaha mashishal, wan okitokayoltik Yehshwa, yewal kitokayoltiyaya in Nitanawatilanhel ka in itokaliste kwah Marya ayamo'ok ta'ostiyaya ta'apawaya.

²²Kimani mo'asik in tonatim in yewal yok kina kito NitanawatilMoshé, yehwante yeloskya chihchipak okiwikak



© 1996 David C. Cook

*Yeshwa westotikatka pa se kano kaha
kintamakal yolikilme (Lukas 2:19)*

in piltonte pa Yerushalém pa kineshtiloskya ka in TATS. ²³Yok ki'ashiltiloskya kina onka takwihkwilol ka nitanawatilTATS:^a “Moshte in siwan kishki kinpiyaske ta'ishpa ininpilwaTakam in kintemakaske pa TATS.” ²⁴Oyak temakak, yok kina kito nitanawatilTATS: yewal tahtani ome poporishim hanwel ome wilom.

²⁵Pa Yerushalém mochantiyaya se takat han kwal kima-titiya kikaktiya nitahtoliste Dyos itoka Shime'ón. In takat mochtikatka pa kimani asiskya Dyos pa temakas takishtiliste ka niyoliliste pa Isra'El. In EspirituSanto katka ipa yewal, ²⁶wan kili amo timikis ma yok tiktas niKristo in TATS. ²⁷Shime'ón melahka tawikal, ka in Espiritu pa in tyopWe; kimani nitahwan in piltonte Yeshwa okiwikak pa in tyopWe pa motamiloskya kina kitowaya nitanawatil nitahtolmeMoshé, ²⁸Shime'ón okinapal in piltonte wan okimashti Dyos, ka in tahtolme:

²⁹Ashka, in Tats wetatake pa mochten, shihmak motikipanol ma mik ka sewiliste,
kina tiktenewil.

³⁰Kampa noshtololwa okinmit in motakishtiliste ka niyoliliste
³¹yewal tikchi pa tiktaske moshte inik pweblo'.

³²Dyos yes kina se tawiliste yewal kintawilis in masewalme
amo yudiyo',

^a 2:23 “NitanawatilTATS” in kinek kito yok kina otakwihkwil Moshé.

wan yes nitawiliste pa mopweblo Isra'El.

³³Wan nitats wan ninantsi Yehshwa mokawak mo'itatikat ipa ten kitoloya pa yewal. ³⁴Kwakin Shime'ón okinmashti, wan kili Marya ninantsi Yehshwa:

—Shikit, in piltonte kichiwas kampa myak masewalme pa Isra'El wetsiske wan moketsaske. Yewal yes taneshtiliste kampa myak amo kinekiske, ³⁵yok momatis in ten melawak ten tamatil sesen. Wan tewal Marya mishkokoltis kina ta ka se teposte mishtsopiniloskya pa moyol.

³⁶Niyok ompa katka Hana, nikonSiwat Fanuel, ka in tani-chikol Asher. Hana katka se siwat in niTaketsal nitahtolDyos katka abwel. Wan omonamikti tipichi, wan omochantiti inak nitaka pa chikome shiwim, ³⁷wan ashka katka se siwat mihki nitaka ka 84 shiwim. Amo'ik kisaya pa in tyopWe, kampa yok kitikipanoliya pa tahka wan pa tayo in Tats, mosaptiyas wan kitahtoltiyaya Dyos. ³⁸Pa haniman omoneshti Hana, wan temak tashtawaliste pa Dyos wan takets ka in piltonte pa moshte kishki kichishtikatkaloya nitamakawaliste Yerushalém.


Nikwepaliste pa Nasaret

³⁹Kwah tamik kichiwak mochi kina kito nitakwihkwilol in TATS, mokwepak pa ininpweblo Nasaret, yewal katka tal Galileya. ⁴⁰Wan in piltonte mo'apapti wan mochiwaya ka miyak chikawaliste, kipiwaya miyak tamatiliste wan Dyos kipi pakiliste ka ta'ihniliste ipa yewal.

In piltonte Yehshwa okitak pa in tyopWe

⁴¹Nitahwan Yehshwa yaloya mochi inik shiwim pa Yerushalém pa in mitotiliste Paskwa. ⁴²Wan yok kina kimatiloya kichiwaloya kwah Yehshwa kipiwaya 12 shiwim, yehwante oyak pa Yerushalém pa in mitotiliste Paskwa. ⁴³Kimani otam in mitotiliste Paskwa, mokwepak in icha, in piltonte Yehshwa moka pa Yerushalém, amo kimatik nitahwan. ⁴⁴Yehwante tamatiloya kampa Yehshwa yawiya itsala masewalme, kichiwak se tonat pa ot; kimani kitemoloya ka niparyente wan kishki ki'ishmatiloya, ⁴⁵amo kitak. Kwakin mokwepak pa Yerushalém pa kitemoloskya ompa.

⁴⁶Pa yey tonatim okitak pa in tyopWe, yowatikatka ika in Tamashtinilme NitanawatilMoshé, kinkaktikatka wan kintahtanilitikatka. ⁴⁷Wan moshte kishki kikaktikatkaloya motapololtiloya



© 1996 David C. Cook

*Marya okit Yehshwa tahtotikatka ka Tamashtinilme
NitanawatilMoshé pa in tyopWe (Lukas 2:48)*

kina miyak kimatiya wan niyok kina tanankiliya. ⁴⁸Kwah nitahwan kitak, motapololtik; wan ninantsi kili:

—Nokon newal, pates yok otishchiwil in? Motats wan newal timishtemotinemil kampa hyero titamatiloaya.

⁴⁹Yehshwa kinnankili:

—Pates nishtemotikatkaloya? Amo ankimatiloaya kampa newal niyes kampa nikal noTats?

⁵⁰Yehwante amo kimatik kikakik ten kinmili.

⁵¹Kwakin mokwep inak nitahwan pa Nasaret, kampa mochantiti kinneltokati pa mochi. Ninantsi mokawiliyaya mochi pa niyol. ⁵²Wan Yehshwa kimatitiyaya miyak tamatiliste wan mo'apaptiyaya, kipiyyaya pakiliste ka ta'ihniliste pa Dyos wan pa ka masewalme.

Yuhanes takwateki ka myak takam pa se tal kaha tawak
(Mt. 3:1-12; Mk. 1:1-8; Yh. 1:19-28)

3 ¹Katka in shiwit 15 yewal tatakewaya ipa se tal Roma in weTanotsal Kaysar^b Tiberyo, Wan Pontyus Pilatos yewal katka wetatakewan pa in tal Yudaya, kwah Herodes reynarowaya pa in tal Galileya, wan ninohni Pilipos

^b 3:1 “Kaysar” in kinek kito “emperador” se yewal wetatake pa se mochital.

reynarowaya pa in tal Itureya wan Trakonitis, wan Lisanyas reynarowaya pa in tal Abilene. ²Hanás wan Kaypas katkaloya TotatsimWehwe. Pa inik tonatim Dyos okitakichil Yuhanes, nikon SakarYah pa se tal kaha tawak; ³wan Yuhanes kwa-kin opanoti pa in tal amo wEhka katka Yordán, kinmiliyaya masewalme pa yeloskya takwatekilme, pa kichiwaloskya ten kwal pa kineshtiske kampa kikweptikat ininta'lnamikiliste wan kineshtitikat kampa kikweptikat ininyolme ka Dyos ka inintachiwaliste kwahkwalme, yok yeloskya ta'ihnililme ininta'htakoliste. ⁴Yok kina kikwihkwilo YeshaYah in niTaketsal nitahtolDyos:

Mokaki tsatsiliste ompa pa se tal kaha tawak:

“Shikchiwak ni'otim pa ininyoliliste masewalme pa kimani walas TATS;

Shikchiwak anmoyolme kwal, ankikishtitikat yewal mochi ta'htakotik. Shihmelawak anmoyolme kina kimehmelawaloskya ni'ot se we.

Yok shiyaptiyak melawak kina monek.

⁵Mochi kaha taposo ma yek ishtawak tatemltilil, mochi tepetLom wan talTepet momehmelawaske, inik otim kohkoltik yeske mehmelawak, inik otim chichakwashtik yeske otim tsehtsepestik;

⁶moshte in masewalme kitaske in takishtiliste ka toyololiste yewal Dyos kiwaltitanis.”

⁷Hiero myak masewalme walaloya ka Yuhanes pa kinkwatekiskya, yewal kinmiliyaya:

—Anmehwante masewalme amo taneltokal pa Dyos kat kina ininpilwam kowan! Ak anmichili anmehwante kampa kwal mokishtiliske ka in takokoliste hiero yewal amo wehkawas?

⁸Shikchiwak ten kwal pa ankineshtiske kampa ankikweptikat anmota'lnamikiliste wan ankineshtitikat kampa ankikweptikat anmoyolme ka Dyos ka anmotachiwaliste kwahkwalme wan amo shikitok ika anmehwante: “Tehwante nikolinchim AbRaham”; kampa melak annimichilis niyok in tetelme Dyos kwal ankinchiwas nikolinchim AbRaham. ⁹Kampa in acha onka ika in kwawim pa kikotonas ninelwa, mochi kwawit amo kimat taki kwal mokotoni wan kitasal pa teshoshte.

¹⁰Kwakin masewalme kitahtanililoya:

—Ten monek tikchiwaske?

¹¹Wan Yuhanes kinnankili:

—Yewal aki kipi ome shashalme, ma kimak se yewal amo kipi; wan aki kipi takwal, ma kimak yewal amo kipi.

¹²Niyok sek tahtaniloya miyak tapishkalisteTomi^c asik pa yeloskya takwatikilme wan kitahtanilik Yuhanes:

—Tamashtini, ten monek tikchiwaske tehwane?

¹³Yuhanes kinmili:

—Amo miyak shitahtantiyak tapishkalisteTomi han kishki han motashta.

¹⁴Sek gwacho' niyok kitahtanilik:

—Wan tehwane, ten monek pa tikchiwaske?

Wan Yuhanes kinmili:

—Amo shikinkishtilik amoten amo'ak ka chikawaliste, amo shikinchikawaltik masewalme ta amo tawikilil; amo shikinkwamanak yehwane amoten kichiwak wan kwal shita-matitiyak kishki kitanil.

¹⁵Moshte masewalme kichiyaloya Kristo, wan kinekiloya kimatiloskya ta Yuhanes yewal yeskya in Kristo; ¹⁶Yuhanes kinmili moshte:

—Newal, annimishkwatekis ka at; ma yok wal se takwi-tapit ka newal yewal kipi miyak chikawaliste amoyok kina newal, yewal newal amo nimonots pa nimopachos niktomilis nikorreya niwarach, in anmishkwatekis ka in EspirituSanto wan ka teshoshte. ¹⁷Kipi pa nimahwa in pala, pa kiyehyekalti in trigo pa kikishtilis nitasol. Ki'ahkokis in trigo pa चाहपिल, wan kichichinos tasol pa se teshoshte yewal amo'ik sewis.

¹⁸Yok kina in wan yok ka oksek myak taketsaliste, Yuhanes kinmashtiyaya tamashtilisteKwal ka masewalme. ¹⁹Niyok Yuhanes ki'ahwa in wetatakewan Herodes kampa kipiyyaya kina isiwa Herodyas, yewal katka nisiwa ninohni Pilipos, wan niyok pa mochi in amokwal yewal kichiwaya; ²⁰kampa Herodes, ka mochi nitachiwaliste amokwal, okichi oksek tachiwaliste amokwal: otatake pa kitsakwaloskya Yuhanes.

Yuhanes kikwateki Yehshwa

(Mt. 3:13-17; Mk. 1:9-11)

²¹Pa se tonat moshte pa in pweblo katkaloya takwatekilme, niyok Yehshwa katka takwatekil; kwah Yehshwa tahtowaya

^c **3:12** “Contribuciones”: In kine kito kampa kinmakaloya in tomi in wehwetatakewalme pa ten kinteshmoneki ka pweblo

inak Dyos, in ilwikak motap ²²wan in EspirituSanto temotiwalaya kina se wilot wan omokets ipa yewal, wan mokak Dyos nitahtol pa in takpakllwikak kiliyaya:

—Tewal nokon niktasot; wan nikpi miyak pakiliste pa tewal.

Niwichalme Yehshwa

(Mt. 1:1-17)

²³Wan Yehshwa kipiyya 30 shiwim kimani okipewalti nitaketsaliste Dyos, yok kitoloya, oye nikon Yosé, yewal Yosé oye nikon Elí, ²⁴Elí oye nikon Matat, Matat oye nikon Lewí, Lewí oye nikon Melki, Melki oye nikon Yanay, Yanay oye nikon Yosé, ²⁵Yosé oye nikon MatatíYah, MatatíYah oye nikon Amós, Amós oye nikon Nahúm, Nahúm oye nikon Heslí, Heslí oye nikon Nagay, ²⁶Nagay oye nikon Máhat, Máhat oye nikon MatatíYah, MatatíYah oye nikon Shímehi, Shímehi oye nikon Yosek, Yosek oye nikon Yodá, ²⁷Yodá oye nikon YoHanan, YoHanan oye nikon Resa, Resa oye nikon Serobabel, Serobabel oye nikon ShaltiEl, ShaltiEl oye nikon Neri, ²⁸Neri oye nikon Melki, Melki oye nikon Adí, Adí oye nikon Kosam, Kosam oye nikon ElMadam, ElMadam oye nikon Er, ²⁹Er oye nikon YehoShu'a, YehoShu'a oye nikon EliÉser, EliÉser oye nikon Yorin, Yorin oye nikon Matat, Matat oye nikon Lewí, ³⁰Lewí oye nikon Shime'ón, Shime'ón oye nikon Yehudá, Yehudá oye nikon Yosé, Yosé oye nikon Yonam, Yonam oye nikon ELYakim, ³¹ELYakim oye nikon Mele'á, Mele'á oye nikon Mená, Mená oye nikon Matata, Matata oye nikon Natán, ³²Natán oye nikon Dawid, Dawid oye nikon Yesé, Yesé oye nikon Obed, Obed oye nikon Bo'as, Bo'as oye nikon Salmón, Salmón oye nikon Nahashón, ³³Nahashón oye nikon AmiNadab, AmiNadab oye nikon Aram, Aram oye nikon Hesron, Hesron oye nikon Perets, Perets oye nikon Yehudá, ³⁴Yehudá oye nikon Yakob, Yakob oye nikon Itsak, Itsak oye nikon AbRaham, AbRaham oye nikon Téra, Téra oye nikon Nahor, ³⁵Nahor oye nikon Serug, Serug oye nikon Rehu, Rehu oye nikon Peleg, Peleg oye nikon Éber, Éber oye nikon Shelá, ³⁶Shelá oye nikon Kaynán, Kaynán oye nikon Arpashad, Arpashad oye nikon Shem, Shem oye nikon No'á, No'á oye nikon Lamek, ³⁷Lamek oye nikon Metushala, Metushala oye nikon Henok, Henok oye nikon Yared, Yared oye nikon MahalalEl, MahalalEl oye nikon Kaynán, ³⁸Kaynán oye nikon Enósh, Enósh oye nikon Shet, Shet oye nikon Adán, yewal okichi Dyos.

Satán kinek kitilanas niyol Yehshwa

(Mt. 4:1-11; Mk. 1:12-13)

4 ¹Yehshwa, walmokwep pa atenko Yordán nehnemiyaya ka miyak EspirituSanto, wan in Espiritu okichiwalti pa yaskya Yehshwa pa se tal kaha tawak amo'ak mochanti. ²Ompa omoka 40 tonatim, wan Satán kinekiya kitaniliskya Yehshwa niyol pa kichiwaskya ten kitsakwili ka Dyos. Kwah opan inik tonatim, amoten okikwa wan hyero walmayan. ³Kwakin Satán kili:

—Ta melawak tewal nikonDyos, shikil in tet ma mochi pan.

⁴Yehshwa kinankili:

—In takwihkwilol kito: “Amo hanwel ka pan yoltik takat.”^d

⁵Kwakin in Satán okiwik Yehshwa pa se tepetLom takpak, wan han kineshtil mochi nireynaroliste pa mochi kishki tal.

⁶Wan in Satán kili:

—Newal nimishmakas chikawaliste ipa mochi in reynaroliste wan ipa mochiten in miyak tapiyal. Kampa newal nishmakak, wan newal kwal nihmakas ak newal nihnekis nihmakas. ⁷Ta timotankwakets no'ishpa newal, mochi yeske pa tewal.

⁸Yehshwa kinankili:

—Yok takwihkwilol in: “In TATS moDyos, shiktankwaketsalil hanwel yewal tiktikipanolis.”

⁹Kwakin Satán okiwik Yehshwa pa Yerushalém wan okitakishti takpak pa tyopWe wan kili:

—Ta melawak tewal nikonDyos, shitsikwin pa tatsinta;

¹⁰kampa onka takwihkwiloli:

Nitanawatilhelme kintakewas pa mishkwitawiske tewal pa mishtsawiliske.

¹¹Ka nimahwam mishkitskiske, pa amo timotsotsowis pa tetelme.

¹²Yehshwa kinankili:

—Niyok kito nitakwihkwilolisteDyos: “Amo shikchi ten pa kitilanas niyol in TATS moDyos.”

¹³Kimani in Satán yahmo kimatiya ten kichiwaskya ka Yehshwa pa kitilaniliskya niyol, ma yok panoti wEhka yewal pa kishki tonatim.

^d 4:4 In amatTakwihkwilolme, kinkwihkwilok takwitap kitalik “hanwel niyok ka nitahtolme Dyos.”

Yehshwa okipewalti nitikipanol pa Galileya

(Mt. 4:12-17; Mk. 1:14-15)

¹⁴Nehnemiyaya ka miyak Espiritu Santo Yehshwa walmo-kwep pa Galileya, wan taketsaloya ka yewal pa mochi pweblo pa tal. ¹⁵Tamashtiyaya pa in tyopalmeYudiyo', wan moshte kili-loya tahtolme wehwe pa Dyos.

Yehshwa pa Nasaret

(Mt. 13:53-58; Mk. 6:1-6)

¹⁶Yehshwa oy pa Nasaret, in pweblo kaha mo'apa. Pa se tonatmosewilyudiyo okalak pa in tyopYudiyo, kina kimatilo ya kichiwaloya, wan omokets pa kimashtiskya nitakwihkwilolisteDyos. ¹⁷Okimakak in amat yewal nitakwihkwilol niTaketsal nitahtolDyos YeshaYah; wan Yehshwa ki'istap in amat, wan okit kaha katka tapahwil yewal kito:

¹⁸In niEspiritu TATS onka ipa newal,
 onishtashawil pa nitemakas tamashtilisteKwal ka yehwante
 amoten kipiyal;
 onishwaltitan pa nikkinnawatis inik kat tatsakwalme, wan
 nikinmakas

pa tachiyaske in amo tachiyalme;
 pa ninkawas tamakawalme in kintakokoltil;

¹⁹wan pa kinmashtiskya nitanawatilisteDyos pa moshte, yewal
 in shiwit okonan pa tishkishtis ka poliwise in TATS.

²⁰Kwakin Yehshwa ki'olol in amat, okimak in tikipanol yewal
 tapalewiyaya pa in tyopYudiyo wan omotal. Moshte kishki ompa
 katkaloya mokawak kitatiyak, ²¹kwakin Yehshwa kinmili:

—Ashka pa in tonat omonamik ka in takwihkwiloli ika ni'a-
 ma in WeTatsDyos anmo'ishpa anmehwante.

²²Moshte kwal kitoloya ika yewal wan motapololtiloya
 kampa kwal kichiwiliyaya ka nitahtolme yewal ten kitowaya.
 Wan motahtanililoya:

—Amo yewal nikon Yosé?

²³Yehshwa kinmili:

—Melak anmehwante annishilnamikiltiske in tahtol
 yewal kito miyak taketsaliste: “Tapahtini, shimopahti tewal
 mosel”; wan niyok nichiliske: “Ten tihkakik yewal otikchi pa
 KapanNahum, niyok shikchi nika pa motal kaha titakat.”

²⁴Wan yok kitowaya:

—Melak annimichilis, kampa amo'ak niTaketsal nitahtolDyos kinamikiske kwal pa nital kaha takat. ²⁵Wan melak annimichilis katkaloya myak siwam mihmihki inintaka pa in tal Isra'El pa inik tonatim ka niTaketsal nitahtolDyos EliYah, kimani amo okiya pa yey shiwim wan tahko, oye miyak mayanaliste pa mochi Isra'El; ²⁶ma yok Dyos amo oki-titan EliYah pa amo'ak ka yehwante mihmihki inintaka, hanwel se siwat mihki nitaka, yewal mochantiyaya pa tal Sarepta, amo wEhka katkaya in Wepweblo Tsidón. ²⁷Yok niyok, pa in tal Isra'El katkaloya myak kokoshkim ka in kokoliste itok lepra,^e pa in tonatim ka niTaketsal nitahtolDyos ka Elisha, ma yok amo'ak okipahti ka yehwante hanwel Namán yewal katka sireteko.

²⁸Kwah kikakik moshte kishki katkaloya pa in tyopYudiyo hyero kwalanik. ²⁹Walmoketsak wan kikishtik Yehshwa pa kiyawak pa in Wepweblo, kiwikaloya ikpak in tepetLom yewal in Wepweblo ompa katka tachiwal, pa kitasaloskya ompa pa tatsinta. ³⁰Ma yok yewal opan ipanta ka yehwante wan opanoti.



© 1996 David C. Cook

Kinekiloya Yehshwa kitasaloskya pa tatsinta (Lukas 4.30)

^e 4:27 “Lepra” in kinek kito mokahkaskarotikatka nikwero (inakayo).

Se takat kipiyya yehyekat katsak

(Mk. 1:21-28)

³¹Yehshwa oy KaparNahum, pa in Wepweblo Galileya, wan ompa kinmashtiyaya masewalme pa in tonatmosewilyudiyo.

³²Wan in masewalme motapololtiloya kina tamashtiyaya, kampa kintakichiliyaya ka wetatakewaliste.

³³Katkaya pa in tyopYudiyo se takat kipiyya se yehyekat katsak yewal waltsats ka chikawaliste:

³⁴—Shitishka; ten tikpi ka tehwane, Yehshwa, tewal otikis pa in pweblo Nasaret? Otiwal pa titishtamis? Nihmat ak tewal, wan tewal NiChipawak Dyos.

³⁵Kwakin Yehshwa oki'ahwa in yehyekat, kili:

—Amo shinawatiti, wan shikis pa yewal!

Kwakin in yehyekat katsak kitsehtsel chikawak in takat ipanta yehwane, wan okis pa takat amo kikokolti. ³⁶Moshte momaptitikatkaloya, wan motahtanililoya sek ka oksek:

—Ten tahtolme yewal in? Ka wetatakewaliste wan chikawaliste kintake yehyekatim kahkatsak wan kineltokal, wan yehwane kisal!

³⁷Haniman moshte kimatiloya pa kishki itenko mochital yewal ten kichiwaya Yehshwa.

Yehshwa kipahti nimonantsi Petros

(Mt. 8:14-15; Mk. 1:29-31)

³⁸Yehshwa okis pa in tyopYudiyo wan panoti ka nikal Shimón. Nimonantsi Shimóm kipiyya miyak atonawiste wan kitahtanik Yehshwa pa yewal. ³⁹Yehshwa mokwalpach ka yewal wan oki'ahwa in atonawiste, wan in atonawiste okikis. Haniman yewal omokets wan haniman kintayokshital.

Yehshwa kinpahti myak kokoshkim

(Mt. 8:16-17; Mk. 1:32-34)

⁴⁰Kwah otamalin in tonat, moshte kishki kinpiyaloya kokoshkim pa mochi'as kokoliste kinwalikilik Yehshwa; kintaliliyaya nimahwam ipa sesen yehwane wan kinpah-tiyaya. ⁴¹Pa myak kokoshkim niyok kiskak myak yehyekatim kahkatsak, yehwane tsatsiloya:

—Tewal nikonDyos.

Yehshwa kinahwaya in tawalilom wan amo kinmakawaltiyaya pa tahtoloskya, kampa yehwane kimatiloya yewal katka Kristo.

Yehshwa kintakichilitinem pa tal Galileya

(Mk. 1:35-39)

⁴²Tahtanesti, Yehshwa okis pa in pweblo, oy kaha amo'ak katka, in masewalme kitemoloya, kwah kitak hyero miyak kitahtanilo ya pa mokawaskya ka yehwante, ⁴³yewal kinmili:

—Niyok monek kampa newal nikinnawatis nitamashtilisteKwal ka nireynarolisteDyos pa oksek Wehwepweblo', kampa ka yewal onishwaltitanik.

⁴⁴Yok nehnemiya Yehshwa kintakichiliyaya nitanawatilisteDyos pa in tyopalmeYudiyo' pa tal Galileya.

Ta'asyanilme michim ka taneshtiliste

(Mt. 4:18-22; Mk. 1:16-20)

5 ¹Se tonat Yehshwa katka pa itenko in we'atTemtik pa Genesaret; wan masewalme monichikoloya, wan kiyawaloloya pa kikakiloskya in ItahtolDyos. ²Yehshwa okinmit ome barkito' pa itenko in we'atTemtik, inik ta'asyanilme temok pa kipakaloskya ininmataraya. ³Yehshwa otakis pa se barkit, yewal katka nibarkit Shimón, wan kitahtani pa kiwikaskya wehkit ka itenko. Kwakin omotal pa barkit, wan ompa kinmashtiyaya masewalme. ⁴Kwah otam otahto, kili Shimón:

—Shihwik in barkit kaha wehkat, wan shikintasak ompa anmomataraya' pa ankinkishtiske michim.

⁵Shimón kili:

—Tamashtini, pa mochi yowal titikipanotiyak wan amoten tihkitskik; kampa yok tewal tishtahtani, niktasas in mataraya.

⁶Yok okichiwak, wan okinkishtik myak michim kampa ininmataraya' tsayaniyaya. ⁷Kwakin okinnotsak ka taneshtiliste ininnihniwan yehwante katkaloya pa in okse barkit, pa walaloskya kinpalewiloskya. Kimani yehwante asik kintemiltik moshte omente barkito' hanwel tipit pa polakiloskya. ⁸Kwah Shimón Petros okit in, omotankwakets i'ishpa Yehshwa wan kili:

—Shikis ka newal, TATS, kampa newal nikatsawak pa noyol.

⁹Wan yok kina yewal wan in moshte ininnihniwan motapololtiloya, ka ininta'asil michim yewal kinkishtiloya.

¹⁰Niyok motapololtiloya Yakobo wan Yuhanes, ininpilwam SebadYah, yewal katkaloya ininnihniwan Shimón. Wan Yehshwa kili Shimón:

—Amo shimomapti; kampa ashka tiyes ta'asiyan pa takam.

¹¹Kinwikak in barkito' kaha tawak, wan kikawak mochten tapiyaloya pa kitokaloskya Yehshwa.

Yehshwa kipahti se yewal palantikatka inakayo

(Mt. 8:1-4; Mk. 1:40-45)

¹²Se tonat katka Yehshwa pa se in Wehwepweblo, o'as se takat kipiwaya kokoliste itok lepra,^f kwah okit Yehshwa, omotankwakets wan nishayak ki'asilti talpa kitahtaniyaya:

—Tats, ta tihnek, shinishpohpo ka notakokoliste.

¹³Kwakin Yehshwa kimela nimahwa, kikitski wan kili:

—Newal nihnek, timoka tapohpowal!

Wan haniman okikis nikokoliste lepra. ¹⁴Amo'ak shikil amoten. Kili:

—Hanwel shi shimoneshi ka totats, wan shitemak mochipawaliste yewal kina tatake Moshé, pa yes tanesh-tiliste ka in tachiwaliste kampa tewal timoka tapohpowal motakokoliste.

¹⁵Yok moshte kitaketsaloya yewal ten kichiwaya Yehshwa, wan myak masewalme monichikoloya pa kikakiloskya wan pa kinpahtiskya inintakokoliste. ¹⁶Wan Yehshwa yawiya kaha amo'ak katka pa tahtoskya inak Dyos.

Yehshwa kipahti se takat amo nehnemiyaya

(Mt. 9:1-8; Mk. 2:1-12)

¹⁷Pa se tonat, kimani Yehshwa tamashtiyaya, yowatikatkaloya in parisheyo' wan Tamashtinilme NitanawatilMoshé walaloya moshte pa inik ranchito Galileya, Yudaya wan Yerushalém; wan nichikawaliste in TATS katka pa Yehshwa pa tapahtiskya. ¹⁸Kwakin asik sek takam kiwalikaloya pa tapeshte, se yewal amo nehnemiyaya, kinakiloya kiwikililoskya pa kalitik wan kitaliloskya i'ishpa Yehshwa. ¹⁹Yok amokwal kina kikalaktiloskya, kampa katkaloya myak masewalme. Wan takisak ikpak takalchiwal kikoyonak, kitemowik ka nitapech in amo nehnemiyaya yok kitalik ipanta masewalme, wan i'ishpa Yehshwa. ²⁰Yehshwa okit kina taneltokaloya yehwante, kili in kokoshke:

—Takat, ashka mota'ihtakoliste moka ka ta'ihniliste.

^f 5:12 “Lepra” in kinek kito mokahkaskarotikatka ininkwero (inakayo).

²¹Inik Tamashtinilme NitanawatilMoshé wan inik parisheyo' tamatiloya: “Ak tamat kampa yewal, yok kina kitotik amoTamawishtili pa Dyos? Akyewal ta'ihnili ta'ihentakoliste? Amo hanwel Dyos ta'ihnili.”

²²Yeshsha kimat kina tamatitikatkaloya yehwante, kwakin kinmili:

—Pates yok antamatitikat anmehwante pa anmoyol? ²³Kina aso kwal? Ta nikil in amo nehnem: “Mo'ihentakoliste onka tapohpowali”, ma yok ta nikil: “Shimokets, wan shiyapti”?

²⁴Shihmatik anmehwante kampa NitakaTakpakIlwikak^g kipi tatakewaliste pa tal pa ta'ihnilis katsawiliste.

Kwakin Yeshsha kili in takat yewal amo nehnemiyaya:

—Shimokets, shikonan motapech wan shiyapti kaha timochanti.

²⁵Kwakin haniman, in takat omokets i'ishpa yehwante, okonan nitapech yewal wistotikatka wan panoti kaha mochanti kitotiyaya tahtolme wehwe pa Dyos. ²⁶Moshte motapololtiloya wan kililoya wehwe tahtolme Dyos, wan ka miyak tamaptiliste kitoloya:

—Aska tikitak tachiwaliste tapololti.

Yeshsha okinots Lewí

(Mt. 9:9-13; Mk. 2:13-17)

²⁷Kwah opan in Yeshsha okis, wan okit se yewal tahtanil miyak tapishkalisteTomi^h itok Lewí, yowatikatka pa in kal kaha tashtawaloya tapishkalisteTomi, Yeshsha kili:

—Shinishtok.

²⁸Kwakin Lewí omokets, okika mochi, okitok Yeshsha.

²⁹Pa tyotak, Lewí okichi se we mitotiliste pa ika Yeshsha, wan ompa katkaloya miyak tapishkalisteTomi inak oksek mase-walme yowatikatkaloya kaha takwal. ³⁰Inik parisheyo' wan inik Tamashtinilme NitanawatilMoshé kinwaltaketsak nimo-neshstililme Yeshsha, wan kinmilik:

—Pates antakwatikat wan antakontikat anmehwante inak yehwante tahtaniloya miyak tapishkalisteTomi wan ta'ihentakolilme?

^g 5:24 NitakaTakpakIlwikak: Yewal nikonTakat ka Gereko yok mo'itokaya yewal Yeshsha yewal kiteshmonekya pa tahtoskya ka isel.

^h 5:27 “Contribuciones” in kinek kito kampa kinmakaloya in tomi in wehwetatakewalme pa ten kinteshmoneki ka pweblo.

³¹Yehshwa kinnankili:

—Amo moteshmonekil tapahtinilme nahyehwante amo kokoshkim, hanwel moteshmonekil ka in kokoshkim. ³²Newal amo niwal nikinnots in kwahkwalmelme, hanwel nikinnotsas in ta'ihntakolme, pa kichiwaske ten kwal pa kineshtiske kampa kikweptikat ininta'lnamikiliste wan kineshtiske kampa kikweptikat ininmoyolme ka Dyos ka inintachiwaliste kwahkwalmelme.

Yehshwa kitahtanililoya pates amo mosawal nimoneshstililme

(Mt. 9:14-17; Mk. 2:18-22)

³³Kilik Yehshwa:

—Pates ininmoneshstililme Yuhanes wan in parisheyo', hyero miyak mosawal wan kichiwal myak tahtolme pa Dyos wan tewal anmomoneshstililme hanwel takwal wan takonil?

³⁴Yehshwa kinnankili:

—Aso anmehwante kwal ankichiwaske pa mosawaske ininnihniwan ka in mitotiliste kwah monamiktil, kimani yewal monamikti onka ka yehwante? ³⁵Ma yok, asi in tonat yewal monamikti yahmo yes ka yehwante; kimani asi in tonat kwakin han mosawaske.

³⁶Kwakin kinmashti se tapowaliste:

—Amo'ak kiteki se nawa yankwik pa kitsomilis se nawa shashal. Ta yok okichi, hanwel ki'ihntakos nawa yankwik; han in tatsomal amokwal mokawas pa nawa shashal. ³⁷Niyok amo'ak kitali nihugoUbaBino yankwik pa'itik pa in tekomat tachiwal ka kwero yewal kipi miyak tonatim; kampa nihugoUbaBino yankwik kitsayanas in kwero kweponis, kwakin nihugoUbaBino monokis wan in kwero mo'ihntakos. ³⁸NihugoUbaBino yankwik monek kiteka pa se tekomat tachiwal ka kwero yankwik, yok in nihugoUbaBino kina in tekomat tachiwal ka kwero mo'ahkokis. ³⁹Wan ta ak kupal nihugoUbaBino yewal kipi miyak shiwim, yahmo kinekis kones nihugoUbaBino yankwik, kampa kitos: "In nihugoUbaBino yewal kipi miyak shiwim kwal welek."

Nimoneshstililme Yehshwa kiwihwitaloya nitaki trigo pa in tonatmosewilyudiyo

(Mt. 12:1-8; Mk. 2:23-28)

6 ¹Pa in tonatmosewilyudiyo, kwah Yehshwa panowaya kaha tatoktikatkaya trigo, nimoneshstililme kitekiloya nimiriyawal; wan ki'oyalotiyaloya ka ininmahwam wan kikwa-tiyaloya nishinashte. ²Kwakin sek parisheyo' kilik:

—Pates kichiwal anmomeshtililme yewal ten amokwal kichiwaske pa in se tonatmosewilyudiyo?

³Yehshwa kinmili:

—Amo anmomashtik ten okichi Dawid pa se tonat kwah yewal wan innihniwan mayanak? ⁴Yok okalak pa nikalDyos wan okonan okikwa in pan tatasotal pa Dyos, han TotatsimWehwe kwal kikwaloskya, wan okikwa Dawid wan okinmak innihniwan.

⁵Niyok kinmili:

—NitakaTakpakIlwikak in TATS kipi wetatakewan ten kwal kichiwas wan ten amokwal kichiwas ipa in se tonatmosewilyudiyo.

In takat yewal kipiyya se nimahwa wak

(Mt. 12:9-14; Mk 3:1-6)

⁶Pa okse tonatmosewilyudiyo, Yehshwa okalak pa in tyopYudiyo wan tamashtiyaya. Ompa katka se takat kipiyya nimahwakwal wak; ⁷wan inik Tamashtinilme NitanaawatilMoshé wan inik parisheyo' kitatikatkalooya Yehshwa ta tapahtiskya, ta yok kichiwaskya kwal kiteshpawililoskya kampa tikipanotikatka pa in se tonatmosewilyudiyo. ⁸Wan Yehshwa kimatiya kina tamatilooya, yok okinots in takat yewal amokwal ki'oliniskya nimahwa wan kili:

—Shimokets wan shi ipanta ka moshte.

In takat omokets wan oy omokets ipanta. ⁹Wan Yehshwa kinmili moshte yehwante ompa katkaloya:

—Annimishtahtanili: Ten aso kwal tikchiwas pa in se tonatmosewilyudiyo, tikchiwas pek ten kwal tikchiwas ten amokwal? Ma tikpalewik ma yol, hanwel ma mik?

¹⁰Kwakin kinmitatikatkaya moshte kishki kiyawalotikatkaloya, wan kili in takat:

—Shihmela momahwa.


In takat kimela, wan opahti nimahwa. ¹¹Inik Tamashtinilme NitanaawatilMoshé wan parisheyo' hyero kwalanik, wan motahtanililooya ten kwal kichiwaloskya ika Yehshwa.

Yehshwa okinonan 12 tatitanilme

(Mt. 10:1-4; Mk. 3:13-19)

¹²Wan pa inik tonatim Yehshwa oy pa in tepetLom ompa kitahtoltiyaya Dyos, wan yok kipanolti yowal kitahtoltiti Dyos.

¹³Kimani otnes, okinnots ininmomeshtililme, wan kinonan 12



Yehshwa wan inik 12 tatitanilme (Lukas 6:16)

ka yehwante, in kintokayolti tatitanilme. ¹⁴Inik oyek: Shimón yewal niyok okitokayolti Petros; ninohni André'as, Yakobo, Yuhanes, Pilipos wan BarTolomay, ¹⁵Matayos, wan Tomás, Yakobo nikon Halpayos; Shimón niyok kitokayoltiloya yewal kananeyo, katka pa se tanichikol kananeyo; ¹⁶Yudas nikon Yakobo; wan Yudas IshKaryót, yewal kitemak Yehshwa.

Yehshwa kinmashtiyaya myak masewalme

(Mt. 4:23-25)

¹⁷Kwakin Yehshwa waltem pa in tepet inak yehwante wan omoka pa se ishtawak, inak nimoneshtililme; wan ka se we tanichikol ka masewalme pa tal Yudaya, Yerushalém wan in tal Tiros wan in tal Tsidón pa itenko in we'atim. Walaloya kika-kiloya wan pa yeloskya tapahtilme ka inintakokoliste. ¹⁸Niyok katkaloya tapahtilme, in katkaloya takwesolme ka yehyekatim kahkatsak. ¹⁹Moshte masewalme kinakiloya kikitiskiloskya Yehshwa, kampa pa yewal kisaya se chikawaliste yewal kinpahtiyaya moshte.

Pakiliste wan moyolkokoske

(Mt. 5:1-12)

²⁰Kimani Yehshwa kinmitaya nimoneshtilime wan kinmili:

—Shikpiyak pakiliste anmehwante kishki amoten kipiyal, kampa Dyos reynaros pa ininyolme.

²¹'Shikpiyak pakiliste anmehwante kishki anpanotikat mayanaliste, kampa hyero anpachiwiske.

'Shikpiyak pakiliste anmehwante kishki ashka anchokatikat, kampa anwetskaske.

²²'Shikpiyak pakiliste anmehwante anmishihyal, pa ika NitakaTakpakIlwikak, in masewalme anmishkwalaniliske, kimani anmishkishtiske, kimani hyero anmichiliske wan kimani ki'ihyaske ni'itokaliste kina se ten amokwal.

²³Kimani asis in tonat kwal shitamatik wan shikpiyak miyak pakiliste, kampa anmehwante anmishmakaske se we temakaliste pa in takpakIlwikak; yok niyok kinkokoltik in Taketsalme nitahtolmeDyos inik niwichalme ka in masewalme.

²⁴'Ma yok kina anmishyas anmehwante kishki ankipiyal miyak tomi, kampa omopanoltik kwal nika wan ashka.

²⁵'Ma yok kina anmishyas anmehwante ashka ankat tapachiwilde, kampa panoske mayanaliste.

'Ma yok kina anmishyas anmehwante ashka anwetskal, kampa anchokaske wan moyolkokoske.

²⁶'Ma yok kina anmishyas anmehwante kimani moshte anmichiliske tahtolme wehwe, kampa yok ankichiwaloya ka nitikwamanaliste in Taketsalme nitahtolmeDyos in towichalme ka in masewalme.

Shikintasot yehwante mishkokolil

(Mt. 5:38-48; 7:12)

²⁷'Anmehwante kishki annishkakil animichilis: Shikintasotak yehwante anmishkokolil, shikinchiwilik kwal yehwante anmishihyal, ²⁸shikinmashtik yehwante kitol ma amokwal anmishyas, wan shiktahtanik Dyos ka yehwante anmishtaketsal. ²⁹Ta ak omishwachil pa se moshayak, shiktenewil niyok nokse; wan ta ak omishkishtil moshashal, shihka ma kiwik niyok mokoton. ³⁰Ta ak mishtahtani pek ten shihmak; wan ta ak mishkishtil ten, amo shiktahtan pa mishkwipilis. ³¹Shikinchiwilik kwal kina anmehwante ankinectiyaloskya pa anmishchiwililoskya.

³²'Kampa ta anmehwante ankintasotal hanwel yehwante anmishtasotal, ten kwal okichiwak? Niyok in ta'ihentakolme tatasotal hanwel iselte yehwante kintasotaske. ³³Wan ta anmehwante ankinchiwilil kwal hanwel yehwante anmishchiwilil kwal, ten kwal okichiwak? Yok niyok kichiwal in ta'ihentakolme. ³⁴Ta otatanewik pek ten akyehwante wan anmehwante ankichishtikat pa anmishmakaske pek ten, ten kwal kichiwak? Niyok in ta'ihentakolme motanewil sek ka oksek

pa kintemakaske okse tipit. ³⁵Anmehwante shikintasotak yehwante anmishkokolil, shikchiwak kwal wan shitatanewik amo shikchishtiyak amoten. Yok hyero we yes anmotashtawaliste, wan anmehwante yeske ininpilwam Dyos HyeroTakpak; kampa yewal niyok kinihnili yehwante amo kimatil temakal tashtawiliste wan niyok yehwante hyero momatil. ³⁶Yok shiyek anmehwante shita'ihnilitiyak, kina niyok WeTatsDyos ta'ihnili.

Amo shikintaketstiyak oksek.

(Mt. 7:1-5)

³⁷'Amo shitateshpawilitiyak, wan yok amo anmishtateshpawiliske. Amo shikintaketstiyak wan amo yeske taketsalme. Shikinihnilik wan yeske ta'ihnilitime. ³⁸Shitemakak wan anmishmakaske se tamachiwal kwal tilinke, kwal tapowal wan kwal tatemiltiril. Kampa ka in tamachiwal anmehwante tamachiwaske, yeske tamachiwalme.

³⁹Kinmili niyok se tapowaliste:

—Ma yok se yewal amo tachi, kwal kiwikas okse amo tachi? Ma yok moshte omente wetsitske pa se takoyonke? ⁴⁰Se moneshtiril amoyok wetatakewan kina se tamashtini; kwah yewal motanishtiri kwal yes kina nitamashtini.

⁴¹'Pates tikit in tasol yewal onka pa nishtolol monohni, wan amo tikit in kwawit yewal onka pa tewal moshtolol? ⁴²Ta amo tikit in kwawit yewal tikpi tewal pa moshtolol, kina kwal tikilis monohni: “Nonohni, ma nimishkishtil in tasol yewal tikpi pa moshtolol”? Ome nishayak! Shimokishtil in kwawit pa tewal moshtolol, wan kwakin kwal tikitas pa tihkishtilis in tasol yewal onka pa nishtolol monohni.

Ka itakilme yeske ta'ishmatilme

(Mt. 7:17-20; 12:33-35)

⁴³'Amo onka se kwakit kwal yewal amokwal taki; wan niyok amo onka se kwawit amokwal yewal kwal taki.

⁴⁴Kampa se kwawit mo'ishmat ka nitakilme: amo moteki nitakiTsalat pa wistim, amo mopishka uba pa se wiste. ⁴⁵Se takat kwal kito tahtolme kwahkwal kampa niyol kwal onka; wan in takat amokwal kito tahtolme amo kwahkwalme kampa niyol amokwal onka. Kampa yok kina tamat onka pa niyol yok tahto nikamak.

Ome kalme.

(Mt. 7:24-27)

⁴⁶'Pates nishnotsal anmehwante, "TATS, TATS", wan amo anki-chiwal yewal ten annimishtake? ⁴⁷Annimichilis kina akyewal machishti yewal wal ka newal wan nishkak, wan kichi kina niki-to: ⁴⁸In kina yewal in kalchiwal se kal, ta wehkat takoyon, wan kikehkets nitankwa kal ipa in tet. Kimani tehko atenko, wan kiwiteki kongana ika in kal, in moka amo wetsi kampa kwal tachiwal. ⁴⁹Wan aki kikak notahtolme wan amo kinchi, in kina aki kalchi nikal ipa tal, wan amo kitalili nitankwa in kal; wan kimani atenko kiwitek ka chikawaliste in kal kimayawis wan kikawas tashitinil.

Yehshwa kipahti nitikipanol se wetatakewan gwacho

(Mt. 8:5-13)

7 ¹Kimani Yehshwa otam okintakichil ka masewalme, opanoti KaparNahum. ²Ompa katka se wetatakewan gwacho kipiyyaya se tikipanol yewal hyero kitatsotaya, yewal miktiyyaya. ³Kimani in wetatakewan gwacho otakak kina taketsaloya ka Yehshwa, okintake sek Abwelolme Wehwetsim yudiyo' pa kitahtaniloskya pa kipahtiskya nitikipanol. ⁴Yehwante oyak taketsak ka Yehshwa wan kitahtanik miyak ka ininyolme, kililoya:

—In wetatakewan kwal monek pa tikpalewis ten yewal tah-tani; ⁵kampa yewal kintasot masewalme yudiyo', wan otishchiwil se tyopYudiyo.

⁶Yehshwa oy inak yehwante. Kwah katkaloya amo wEhka pa in kal, kimani in wetatakewan okintitan sek ininichniwan pa kililoskya Yehshwa:

—Tats, amo shimochikawalti, kampa newal amo nimonots pa tikalakis nocha; ⁷kampa amo nimochika newal oninimishtem. Ta tikit se tahtol tewal, wan notikipanol pahtis. ⁸Newal nihmat kampa nikpi pa nihneltokas tatakewaliste, wan niyok nikpi gwacho' yewal newal nikintake wan nishnelto-kal. Ta se nikili shi ompa, yewal ya; wan ta okse nikili shiwal, yewal wal; wan ta notikipanol nikil shikchi in, kichi.

⁹Kimani Yehshwa okikak in, moka motapololtiti ka in wetatakewan gwacho, wan kinmitaya masewalme yehwante kitokatiyaloya kito:

—Kampa melak, amo'ak pa Isra'El onikit ka miyak taneltokaliste.

¹⁰In tatitanilme, kwah mokwepak pa in kal, wan okitak in tikipanol katka tapahtil.

Yehshwa kiyolti nikon se siwat mihki nitaka yewal pa Na'ín

¹¹Kwah opan in, Yehshwa opanoti pa in Wepweblo Na'ín, kitokatyaloya myak nimoneshtililme wan myak masewalme. ¹²Kimani astiyaya pa nitatapoli in Wepweblo, okit kampa yaloya kitapacholoya se mihki, katka in se han nikon in siwat, mihki nitaka. Myak masewalme pa in Wepweblo kitokatyaloya ninantsi in mihki. ¹³Kimani in TATS okit, oki'ihnil yewal, wan kili:

—Amo shichokati.

¹⁴Kwakin Yehshwa mo'ashilti wan kikitski in tapeshte tachiwal ka kwawim; wan yehwante kiwikaloya moketsak. Yehshwa kili in mihki:

—TakatYankwik, tewal nimichili: Shimokets!

¹⁵Kwakin yewal katkaya mihki omotal wan okipewalti tah-toliste, wan Yehshwa okimak ninantsi. ¹⁶Moshte momaptik wan kipewaloya tahtolme wehwe pa Dyos, wan kitoloya:

—Se we niTaketsal nitahtolDyos omoneshti ika tehwan.

Wan oksek kitoloya:

—Dyos owal pa kipalewis nipweblo.

¹⁷Wan taketsaloya ka Yehshwa pa kishki tal Yudaya wan pa kishki itenko tal ka oksek pweblo'.

Nitanawatilme Yuhanes takwateki

(Mt. 11:2-19)

¹⁸Nimoneshtililme Yuhanes oyak kitakichilik inik mochten. Kwakin Yuhanes okinnots omente ka nimoneshtililme, ¹⁹wan okintitan ka TATS pa kitahtaniliske ta tewal yewal in walaskya, wan ta okse tikchiyaske. ²⁰Yehwante oyak kitak Yehshwa, wan kilik:

—Yuhanes takwateki otishwaltitan pa timishtahtaniliske ta tewal yewal walaskya, wan ta tikchiyaske okse.

²¹Pa haniman Yehshwa okinpahti myak yehwante kipiya-loya kokoliste wan kokoliste hanse kinkokoltoyaya, wan yehyekatim kahkatsawak, wan myak kishki amo tachiyaloya kichi pa tachiyalosky. ²²Kwakin Yehshwa kinnankili:

—Shiyak wan shikilik Yuhanes yewal ten okitak wan in yewal ten ankikakik. Inik amo tachiyaloya kichi pa tachiyaske,

inik amo nehnemiloya, ashka nehnemil, inik kishki kipiyoalo kokoliste itok lepraⁱ kat tapohpowalme, inik amo takakilo-
 loya ashka takakil, inik mihmihki walyolik, wan inik amoten
 kipiyoal kintakichili tamashtilisteKwal. ²³Ma kipi pakiliste yeh-
 wante kitalil inintaneltokaliste ka newal.

²⁴Kimani nitanawaltilme Yuhanes panotiyak, Yeshswa
 kinwaltakichili masewalme ika Yuhanes, kinmiliya:

—Ten anyak anmehwante ankitak pa se tal kaha
 takwak amo'ak mochantiyaya? Kinekiyoalo kitaloskya se
 otat tatseshtselol ka yehyekat? ²⁵Ten oyak ankitak? Se takat
 takimtiyas ka shashal kwahkwat? Kishki yok takemil ka sha-
 shal kwahkwat wan mopanoltitikat kwal nika wan ashka
 tapiyoal mochten kwahkwat, wan kat pa in kalme ka in
 weReye'. ²⁶Kwakin, ten yewal anmehwante oyak ankitak? Se
 niTaketsal nitahtolDyos? Kampa newal amnimichilis haha,
 wan yewal kwal amoyok kina oksek niTaketsal nitahtolDyos.
²⁷Yuhanes pa yewal onka takwihkwiloli:

Shikit newal niktitanis notanawatil ta'ishpa ka tewal,
 pa mishchiwilis se ot pa ininyolme masewalme.

²⁸Newal animichilis, yewal pa in mochtal ayamo takati se
 takat we monots kina Yuhanes takwateki; ma yok, akyewal
 amo we monots pa nireynarolisteDyos in yewal amoyok we
 monots Yuhanes.

²⁹Kimani kikakik in, moshte masewalme wan in
 tahtaniyoalo miyak tapishkalisteTomi mokawak ka se tahtol
 kampa ni'ot in Dyos katka melawak, kampa yek takwatekilme
 ka Yuhanes; ³⁰inik parisheyo' wan in Tamashtinilme
 NitanawatilMoshé, amo kinekik nitahtolmeDyos wan amo
 mowatekik ka Yuhanes. ³¹In Tats kito:

—Ka ak nikintamachiwas in masewalme yehwante ashka
 yolil? Ka ten kwal nikintamachiwas? ³²Kat kina piltontim
 yehwante motalil pa in plasa' wan motsatsilil sek ka okse:
 “Titatsotsonak ka flawta wan anmehwante amo anmitotik;
 tikantarok tatsotsonaliste tayokokolti wan anmehwante amo
 anchokak.” ³³Kampa owal Yuhanes takwateki, yewal amo
 kikwaya pan niyok amo takoniya nihugoUbaBino, wan anmeh-
 wante ankitoloya kipiyoalo se niyehyekat tawalilot. ³⁴Kwakin
 owal NitakaTakpakIlwikak, yewal takwa wan takoni, wan

ⁱ 7:22 “Lepra” in kinek kito mokahkaskarotikat ininkwero (inakayo).

anmehwante ankitol yewal takat we takwa wan se tawanke, ninihni yehwante tahtanil miyak tapishkalisteTomu wan in ta'htakolme. ³⁵Yok in tamatiliste pa Dyos moneshti ka tachiwaliste.

Yehshwa pa nikal Shimón in parisheyo

³⁶Se ka in parisheyo' kinosti Yehshwa pa takwaskya, yok Yehshwa oy icha in parisheyo wan omotal kaha takwal. ³⁷Kimani se siwat pa in Wepweblo yewal katka ta'htakoliste, okimat kampa Yehshwa katka kaha takwal pa nikal parisheyo, o'as ka se tapalkatonte tachiwal ka se tet itok alabastro temi ka aseYTE kwal ahwiyak. ³⁸Chokatiyaya omotankwakets pa nikshiwam Yehshwa wan ki'alti ka ni'atim. Wan kinwakti ka ni'itso, niyok kitinamikiyaya wan kinshawiliyaya in aseYTE kwal ahwiyak. ³⁹Kwah in parisheyo yewal okinosti kwah okit in, tamat: "Ta in yeskya se niTaketsal nitahtolDyos, kimatiskya kampa in siwat yewal kikitikitik se ta'htakoliste." ⁴⁰Kwakin Yehshwa kili:

—Shimón, nihnek nimichilis pek ten.

Shimón kito:

—Shinichil, tamashtini.

⁴¹Yehshwa kito:

—Se tatanewiTomu kiwikililoya omente takam. Se tawikiliyaya 500 denario' tomi, wan in okse tawikiliyaya 50 denario' tomi; ⁴²Kina amo'ak kitashtawiliyaya ka in omente, in tatanewiTomu kinihnil yehwante tawikililoya in omente. Ashka shinichil, kati ka yehwante omente hyero kitasotas?

⁴³Shimón kinankili:

—Nitamat akyewal ki'ihnili ka miyak.

Yehshwa kili:

—Melak kina tikito.

⁴⁴Kwakin walkit in siwat, wan kili Shimón:

—Shikit in siwat? Kimani ni'as pa mocha, amo tishmak at pa nikipakas nokshiwam; ma yok yewal okinpak ka ni'atim, wan kinwakti ka ni'itso. ⁴⁵Amo otinishtahpal ka tenamikiliste, yewal pa kimani oni'as amo kimaka pa kitenamiktik nokshiwam.

⁴⁶Amo tihshawil aseYTE kwal ahwiyak pa notsontek; wan yewal okishawil nokshiwam ka aseYTE kwal ahwiyak. ⁴⁷Kampa nimitchili, yewal mochi nikatsawiliste kat ta'ihniliime kampa tatatsot miyak; aki amo we ki'ihnilik, amo miyak tatatsot.

⁴⁸Wan yewal kili:

—Mota'htakoliste kat ta'ihnliste.

⁴⁹Yehwante yowatikatkaloya kaha takwal inak yewal, mo'ililoya ka yehwante:

—Akyewal ina, kampa niyok ta'ihnili katsawiliste?

⁵⁰Yehshwa kili in siwat:

—Motaneltokaliste mishkishti pa motapoliwiste; shiyapti ka sewiliste.

Siwam yewal kipalewiloya Yehshwa

8 ¹Kwah opan in, Yehshwa nehnemtinem pa myak Wehwepweblo' wan rancho', wan ompa tamashtiyaya nitanawatilisteDyos ka nireynarolisteDyos. Wan in 12 kito-katyaloya. ²Wan niyok sek siwam oyek tapahtilme ka niyehyekatim tawalilom wan ka takokoliste. Ika ka yehwante yawiya Marya, yewal kitokayoltiloya Magdalena, wan yewal kikishtililoya chikome niyehyekatim tawalilom; ³niyok Yohana, nisiwa Kusa, yewal katka nitikipanol pa mochi nitomi Herodes; Susana, wan myak oksek kinpalewiloya ika ten kipiwaloya wan ka inintomi.

Yehshwa kinmili in tapowaliste ka se yewal tatok

(Mt. 13:1-9; Mk. 4:1-9)

⁴Pa sesen Wepweblo walaloya masewalme pa kitaloskya Yehshwa; kwah monichikok myak masewalme, Yehshwa kinmili in tapowaliste:

⁵—Se tatokal oy tatok nishinashte. Kimani tatokatiyaya, sek wetsik nishinashte pa ot wan kitihtiliktsak, wan in totom pa ilwikak kikwak. ⁶Oksek wetsik itsalaTetelme; kwah walkistiyaloya, walwakik kampa amo katka takochak. ⁷Oksek wetsik itsalaWistim, in kintapach wistim yehwante kisaloya inak. ⁸Oksek shinashte wetsik pa tal kwal; wan walkisak, temakak miyak taki, 100 pa se tatokal wan yok kipishkak pa in tatokal.

Wan niyok kito wehwe:

—Yewal melak aki kipi ninakas ka takakis, shitakakik kwal.

Pates kinmashtiya ka tapowaliste

(Mt. 13:10-17; Mk. 4:10-12)

⁹Nimoneshtililme kitahtanilik ten kinek kito in tapowaliste.
¹⁰Wan yewal kinnankili:

—Anmehwante ma anmishmashtitik kina reynaro Dyos; oksek kinmashti ka tapowaliste, wan ta kitatikat amo ankitaske, wan ta takaktikat amo ankimatiske kikakiske.

Yehshwa kinmili ten kinek kili nitapowaliste ka yewal tatok

(Mt. 13:18-23; Mk. 4:13-20)

¹¹In yewal kinek kitos in tapowaliste: In shinashte yok kina ItahtolDyos; ¹²in shinashte pa in ot inik kat yehwante takakil, kwakin wal in Tawalilot-Satán wan kinkishtili pa niyol ItahtolDyos pa amo taneltokaske wan poliwise. ¹³Kishki wetsik ipa tetelme, inik kat yehwante kikakil ItahtolDyos kitenamikil ka pakiliste, kina amo kipiwal ninelwam; taneltokal sek tonatim, kwah walal in tonatim yewal kinpano se takokoliste yahmo kinektiyaske taneltokaske. ¹⁴In wetsik itsalaWestim yehwante kikakil wan yoli-ki ki'ilkaptiyaske ka in mochiten anmishpanotiya hyero tamati-tiyaske, wan yehwante kinektiyaske konanaske mochiten yewal tanamakalme ka miyak tomi wan kinektiyaske mopanoltiske kwal nika wan ashka, wan amo temakal taki. ¹⁵Wan in shinashte yewal owets pa tal kwal nesil kina yehwante ininyolme kwal wan melawak kitsakwilil ItahtolDyos, yewal kikakil wan hanse kipiwal taneltokaliste, wan temakal se tapishkaliste kwal.

Tapowaliste ka in tawiliste

(Mk. 4:21-25)

¹⁶'Amo'ak kitatatili se kandel wan kitali pa itsinta komit, niyok amo kitali itsinta tapeshte; ma yok ankitalil kaha takpak, pa yehwante kalakiske kintawilis. ¹⁷Kampa mochiten yewal tatitikat yeske taneshtiliste wan mochi yewal amo'ak kimatitiya, asis in tonat kampa kimatiske.

¹⁸'Shinishkakik kwal; kampa moshte kishki kipiwal, kimakaske, wan aki amo kipi, yok kikishtiliske in tipit kampa otamat yewal kipi.

Ninantsi wan ninohniwan Yehshwa

(Mt. 12:46-50; Mk. 3:31-35)

¹⁹Ninantsi wan ninohnihwan Yehshwa oyak kaha yewal katka, amokwal kina asiloskya kaha yewal kampa katkaloya myak masewalme. ²⁰Kwakin se kili Yehshwa:

—Monantsi wan monohniwan kat ompa kiyawak kinekil michitaske.

²¹Yewal kinnankili:

—Nonantsi wan nonohniwan inik yehwante kikakil nitahtolmeDyos, wan yok kichiwal.

Yehshwa ki'ahwa in yehyekat wan in we'atTemtik

(Mt. 8:23-27; Mk. 4:35-41)

²²Pa se tonat Yehshwa takis pa se barkit inak nimoneshti-lilme, wan kinmili:

—Ma tipanok pa analko in we'atTemtik.

Yok oyak, ²³kwah panotiyaloya pa barkit, Yehshwa moka kosh-tik. Ompa omomaka yehyekat chikawak pa in we'atTemtik wan kahkalak at pa barkit, wan tipit katka pa polakiskya. ²⁴In nimo-neshtililme ki'ishiltik Yehshwa, wan kilik:

—Tamashtini!, tamashtini!, tipolaktiyal!

Kwakin Yehshwa o'is oki'ahwa yehyekat wan in mo'ahkokiyaya atim; wan inik moyolsewik wan mochi yahmo molinik.

²⁵Yehshwa kinmili:

—Kaha onka anmotaneltokaliste anmehwante?

Yehwante momaptitikatkaloya, wan motapololititikatkaloya, mo'ililoya sek ka oksek:

—Ak aso in, yewal kintake in yehyekatim wan in atim, wan kikakil?

Yehshwa kipahti se takat ka myak niyehyekatim tawalilom

(Mt. 8:28-34; Mk. 5:1-20)

²⁶Asik pa itenko in analko in we'atTemtik, pa in mochital Gerasa. ²⁷Kwah Yehshwa temowaya pa in barkit, okis se takat pa in Wepweblo kipiyya niyehyekatim tawalilom. Kipiyya miyak tonatim amo tataliyaya shashal amo mochantiyaya pa se kal, wan momatiya kaha kintapachol mihmihki. ²⁸Kimani in takat yewal kipiyya niyehyekatim tawalilom, okit Yehshwa, omotankwakets i'ishpa yewal, wehwe otsats, wan kili:

—Yehshwa, Nikon in Dyos HyeroTakpak, ten tikpi ka newal? Nimishtahtani pa amo tishkokoltis.

²⁹Wan yewal Yehshwa kitakewaya in niyehyekat katsak pa kisaskya pa in takat. Kampa kipiyya miyak shiwim kipewaltiyaya ka chikawaliste ipa yewal; yok ki'ilpiloya ka se yawaltik patawak kina kadena' pa nikshiwam wan niyok nimahwam; ma yok yewal kikohkotonaya oksep wan oksep in kadena' wan in niyehyekatim tawalilom kiwikaya kaha amo'ak katkaya. ³⁰Yehshwa kitahtanili:

—Kina ti'itok?

Wan yewal kinankili:

—Ni'itok Legyon.

Kampa katkaloya myak yehyekatim tawalilom kampa kalakilo pa yewal. ³¹Wan kitahtanilo pa Yehshwa pa amo kintetaniskya kaha tatsakwaliste in tawalilom. ³²Kina ompa katkaloya myak pitsom takwatikatkaloya pa se tepetLom, in niyehyekatim tawalilom kitahtanilo pa Yehshwa kampa kinkawaskya pa kalakiloskya pa yehwante; wan yewal kinmakawalti. ³³Kwah katkaloya kiyawak pa in takat in niyehyekatim tawalilom kalakik pa pitsom, wan tsikwinik kaha we'atTemtik kaha tateshkal, wan ompa kohkonik.

³⁴Kimani yehwante takwitaptikatkaloya, okitak in ten opan cholok wan oyak taketsak mochi in, pa in Wepweblo wan kaha tashosholtik. ³⁵In masewalme okisak pa kitaloskya ten opan. Kimani asik kaha katka Yehshwa, kitak in takat yewal kipiyya niyehyekatim tawalilom, yowatikatka pa ni'ishiwam Yehshwa, tatakemilti katka wan kwal mo'ilnamikiya; wan moshte momaptik. ³⁶Wan yehwante kishki kitak mochi in, kintakichilik kina oye tapahtil yewal kipiyya niyehyekatim tawalilom. ³⁷Kwakin moshte in masewalme pa in tal Gerasa kitahtanilo pa miyak Yehshwa pa yaskya pa okse tal, kampa hyero tamakasiloya. Yok Yehshwa otakis pa barkit wan panoti. ³⁸In takat yewal takishtilil niyehyekatim tawalilom kitahtani pa mokawaskya inak yewal, Yehshwa okitetan, wan kili:

³⁹—Shi kaha timochanti, wan ompa shikintakichil mochi in ten WeTatsDyos okichi ka tewal.

Kwakin in takat opanoti, wan kintakichil pa mochi in Wepweblo ten Yehshwa kichiwaya ka yewal.

NikonSiwatPiltonte Ya'iros, wan in siwat yewal kikitski nitakemtel Yehshwa

(Mt. 9:18-26; Mk. 5:21-43)

⁴⁰Kimani Yehshwa omokwep, in masewalme kitenamikik ka miyak pakiliste; kampa moshte kichishtikatkaloya. ⁴¹Kwakin o'as se takat itoka Ya'iros, yewal wetatakewan katka pa in tyopYudiyo. In takat omotankwakets pa ni'ishiwam Yehshwa wan kitahtani pa yaskya icha, ⁴²kampa yewal han kipiya se nikonSiwatPiltonte, yewal kipiya kina 12 shiwim, kampa miktiyaya. Kimani Yehshwa yawiya, pa icha Ya'iros myak masewalme kitiliniyo.

⁴³Se siwat kipewaya se kokoliste ka 12 shiwim kikisaya yEste wan miyak ki'htakowaya nitomi ka tapahtinilme mochi kishki kipiyyaya, han amo'ak okipanti. ⁴⁴O'as takwitap ka Yeshswa wan okikitski itenko nishashal, wan haniman niyEste yahmo kisaya.

⁴⁵Kwakin Yeshswa kito:

—Ak onishkitske?

Moshte kitoloya kampa amo'ak kikitskya, yok Petros wan in oksek kishki katkaloya inak yewal kilik:

—Tamashtini, kat myak masewalme in mishtilintikat wan mishtohtopewal.

⁴⁶Yeshswa kito:

—Pek ak onishkitske, newal nihmat kampa pa newal okis chikawaliste.

⁴⁷Kimani in siwat, kimat kampa amokwal kina motatiskya, mo'ashilti ka yoyokaliste wan motankwakwets pa nitankwa Yeshswa. I'ishpa moshte masewalme kitakichil pates kikitskya, wan kina haniman tapahtil katka. ⁴⁸Kwakin Yeshswa kili:

—NokonSiwat, motaneltokaliste omishpahti. Shiyapti ka sewiliste.

⁴⁹Ayamo tamiyaya tahtowaya Yeshswa, kwah owal se yewal katka pa nikal wetatakewan pa in tyopYudiyo o'as, wan kili:

—Mokon omik; yahmo ten shikiliti in tamashtini.

⁵⁰Kimani Yeshswa okikak in, kili:

—Amo shimomapti; hanwel shitaneltok, wan mokon yes tapahtil.

⁵¹Yeshswa okalak pa kal, wan tatake pa amo'ak kalakiskya, hanwel Petros, Yakobo, wan Yuhanes wan nitahwan in siwat-Piltonte. ⁵²Moshte chokatikatkaloya wan hyero tamatiloya pa yewal. Yewal kinmili:

—Amo shichokatiyak; kampa amo mihki, hanwel koshtik.

⁵³In masewalme kiwetskililoya yewal, kampa kimatiloya yehwante in siwatPiltonte mihki katka. ⁵⁴Yeshswa kiwalkitski pa nimahwa wan ka tahtol chikawak kili:

—Siwatpiltonte, shimokets.

⁵⁵In siwatPiltonte walyol, wan haniman omokets; wan Yeshswa tatake pa kitamakaloskya. ⁵⁶Nitahwan motapololtitikatkaloya; wan Yeshswa okintake pa amoten kitoloskya amo'ak in ten opan.

Yeshswa kintitani nimoneshstililme pa tamashtiloskya

(Mt. 10:5-15; Mk. 6:7-13)

9 ¹Yeshswa kinnichiko in 12 nimoneshstililme wan okinmak chikawaliste wan tatakewaliste pa kinkishtililoskya ininyehyekatim tawalilom wan pa kinkishtililoskya kokoliste. ²Okintake pa tanawatiloskya nireynarolisteDyos, wan pa kinpahtiloskya inik kokoshkim. ³Okinmil:

—Amoten shihwikak pa ot, amo shihwikak bordon, niwangoch, nipan, nitomi. Wan amo shiwikak ome anmoshashal. ⁴Kimani asiske pa se kal, ompa shimokawak pa mochi tonatim, pa kimani kisaske. ⁵Ta pa se Wepweblo amo anmishnamikil kwal, shikisak ompa wan shimotsehtselok nipohtiTal pa mo'ikshiwam, kina se taneshstiliste ika yehwante.

⁶In moneshstililme kisak, wan oyak pa mochi kishki ranchito', wan pa kishki kaha han kintakechilitinemil nitamashtilisteKwal wan kinpahtiloya kokoshkim.

Nimihki Yuhanes yewal takwateki

(Mt. 14:1-12; Mk. 6:14-29)

⁷Herodes Antipas in yewal wetatakewaya pa Galileya kimat ten kichiwaya Yeshswa; wan amo kimatiya ten tamatiskya, wan sek kitoloya kampa katka Yuhanes walyoliyaya pa in mihmihki. ⁸Oksek kitoloya: Yewal EliYah/ omoneshti; wan oksek kitoloya yewal sek ka in Taketsalme nitahtolmeDyos yewal yoliyiya ya wehKA walyoliyaya. ⁹Wan Herodes kito:

—Newal onitatake kikotonililoskya nitsontek Yuhanes. Kwakin, ak aso in, aki taketsal ka myak tachiwalme?

Kampa Herodes kinek kitaskya Yeshswa.

Yeshswa kintamakaya 5,000 masewalme

(Mt. 14:13-21; Mk. 6:30-44; Yh. 6:1-14)

¹⁰Kwah walmokwepak inik 12 tatitanilme, kitakichilik Yeshswa mochiten kichiwak. Kwakin okinwik, pa in Wepweblo itok BetSayda kampa kinekiya pa yeskya iselte ka yehwante. ¹¹In masewalme kimatik, wan kitokak; wan Yeshswa kintenamik wan kintakichili nireynarolisteDyos wan kinpah-tiyaya kishki kokoshkim.

¹²Kimani tyotak omochi, nitatitanilme ki'asik Yehshwa wan kilik:
—Shikintake in masewalme, ma yak pa inik ranchito' wan pa in tashosholtik wan kitemoske takwaliste wan kaha mosewiske, kampa nika amoten onka.

¹³Yehshwa kinmili:

—Anmehwante shikintamakak.

Yehwante tanankilik:

—Amo tikpiyal miyak pan chikome han wan ome michim, tihnek pa tiyaske tihkawaske takwal pa moshte in masewalme.

¹⁴Ompa katkaloya kina 5,000 masewalme. Wan Yehshwa kinmili nimoneshtililme:

—Shikinchiwak pa motaliske tanichikolme kina ka 50 masewalme.

¹⁵In nimoneshtililme yok kichiwak, wan moshte motalik.

¹⁶Yehshwa okonan in makwil pan wan in ome michim. Otachi pa ilwikak, kinmashti, okintal tahtahko wan okinmak nimoneshtililme pa kinmakaloskya in masewalme. ¹⁷Wan moshete takwak wan pachiwik; wan kishki omoka kinichikok 12 chikiwim.

Petros kito kampa Yehshwa onka yewal Dyos okitake

(Mt. 16:13-19; Mk. 8:27-29)

¹⁸Se tonat kimani Yehshwa isel oy kitahtolti Dyos, kintahtanili Nimonestililme yehwante katkaloya, inak yewal:

—Ak kitol in masewalme yewal ninewal?

¹⁹Yehwante kinankilik:

—Sek kitol tewal tiYuhanes yewal takwateki; oksek kitol tewal tiEliYah, wan oksek kitol kampa titewal se in Taketsalme nitahtolmeDyos yewal yoliyaya ya wehka.

²⁰Kwakin kintahtanili:

—Anmehwante, kampa ak kitol yewal ninewal?

Petros kinankili:

—Tewal ti'onka in Kristo yewal Dyos okiwaltitan.

Yehshwa kinnawati nimikiliste

(Mt. 16:20-28; Mk 8:30-9:1)

²¹Yehshwa kinmili pa amo'ak kililoskya amoten. ²²Niyok kinmili:

—In NitakaTakpakIlwikak kipi pa moyokoltis ka myak mochiten, yes ta'ihyal ka in Abwelolme Wehwetsim, wan

TotatsimWehwe wan ka in Tamashtinilme NitawanawatilMoshé. Wan kimiktiske, wan walyolis kwah panoske yey tonatim.

²³Wan moshte kinmiliyaya:

—Ta ak kinek nishtokas, ma amo yolis kina yewal kinekis kichiwas, ma yol kina Dyos kinek pa yolis, ma konan nikruskwawit pa mochi inik tonatim, ma nishtok. ²⁴Kampa yewal aki kineki kikwitawis niyoliliste, kipolos; wan aki momakawaltis pa kipolos niyoliliste ika newal, mokishtilis niyoliliste. ²⁵Ten kitanis se takat ta motakowil mochten pa mochi kishki tal, ma yok mikis kipolos niyoliliste kwakin ten kipiwas? ²⁶Kampa ta ak nishpinawili pa newal wan ka notahtolme, in NitakaTakpakllwikak kipinawilis yewal, kima ni yewal walas ka nitawiliste wan ka nitawiliste niTats ka nichihchipawak nitanawatilanelhelme. ²⁷Melak annimichilis, yewal sek yehwante ashka nika kat, ayamo mikiske pa kimani kitaske nireynarolisteDyos.

Istayaya taminaya Yehshwa pa ininishpa in yey nimoneshtililme
(Mt. 17:1-8; Mk. 9:2-8)

²⁸Kina pa chikweyi tonatim kimani Yehshwa kito in, oy pa tepetLom okitahtolti Dyos, wan okinwik Petros, Yakobo wan Yuhanes. ²⁹Wan kimani kitahtoltiyaya Dyos, ompa nesiyyaya kina okse nishayak wan nishashalme ishtayaya wan taminaya. ³⁰Kwah moneshtik omente takam tahtotikatkaloya inak yehwante katkaloya Moshé wan EliYah, ³¹yewal kinyawalowaya tawiliste, taketstikatkaloya kina kipiyyaya pa mikiskya Yehshwa pa Yerushalém. ³²Petros wan in kishki inak katkaloya hyero kochmikiloya, kina mokawak isatiyak, kitak nitawiliste Yehshwa wan in omente takam katkaloya inak yewal. ³³Kwah yehwante takam mokishtik ka Yehshwa, Petros kito:

—Tamashtini, kwal onka kampa tikat nika! Ma tikchiwak yey kalme tachiwalme ka iswat; se pa tewal, wan okse pa Moshé wan in okse pa EliYah.

Petros amo kimatiya ten kitotikatka. ³⁴Kwah tahtotikatka, owal ayawit kintapach yehwante, kwah mo'itak ipanta in ayawik momapantik. ³⁵Kwakin pa in ayawit, omokak se tahtol yewal kitowaya:

—In yewal nokon niktasot; yewal shihkaktiyak.

³⁶Kwah omokak in tahtoliste, Yehshwa moka isel. Yehwante amo'ak ten kilik, wan pa inik tonatim, amo'ak kilik amoten in ten okitak.

Yehshwa kipahti se takatYankwik yewal kipiyya niyehyekat tawalilot
(Mt. 17:14-21; Mk. 9:14-29)

³⁷Mostatik, kwah waltemok pa in tepetLom, se we tanichikol ka masewalme kinamikil Yehshwa. ³⁸Wan se takat ika in masewalme ka se tahtol chikawak kito:

—Tamashtini, nimishtahtani, shikit nokon, in hanse nikpi; ³⁹se yehyekat kikitski wan kichi pa tsatsis wan hyero kitsehtselo, wan kikis nichihchal ka espom pa ikamak. Kimani kikokolti han amo kinekis kimakawas. ⁴⁰Newal nikintake momoneshtililme kampa kikishtiloskya yehyekat, wan amokwal kina kikishtilik.

⁴¹Kwakin Yehshwa tanankili:

—Kina ankinyas in masewalme yewal amo ankineltokal Dyos! Kishki tonatim monek pa niyes ka anmehwante? Wan kishki tonatim nikpiyas pa nikitaskokoliste pa noyol kampa amo annishneltokal? Shinishwalikil pa nitek mokon.

⁴²Kwah in takatYankwik ompa astiyaya, in niyehyekat katsak kimaya wan hyero kitsehtsel Yehshwa ki'ahwa in yehyekat tawalilot, okipahti in takatYankwik, wan okimak nitats. ⁴³Wan moshte motapololtiloya ka niwechikawalisteDyos.

Yehshwa kinnawati oksep nimikiliste

(Mt. 17:22-23; Mk. 9:30-32)

Kwah moshte motapololtiloya ten kichiwaya Yehshwa, kinmili yewal nimoneshtililme:

⁴⁴—Shihkakik in tahtolme; in NitakaTakpakIlwikak yes tatemakal pa nimahwam in takam kinkokolilme.

⁴⁵Yehwante amo kimatiloaya ten kitotikatmaya, ayamo kimatiloaya kikakiloya; kampa kimakasiloya pa kitahtaniloskya Yehshwa ten kinek kitoskya.

Akyewal we yes nimonotsaliste?

(Mt. 18:1-5; Mk. 9:33-37)

⁴⁶Kwakin nimoneshtililme walmo'ahwak ak ka yehwante yeskya in we monotsaskya, ⁴⁷kwah Yehshwa okimat kina yehwante tamatitikatkaloya. Okonan se piltonte, wan okital inak yewal ⁴⁸wan kinmili:

—Ta ak kinamikis ka no'itokaliste se piltonte kina in, yok yewal nishnamiktik newal; wan aki han yewal nishnamiktik newal, kinamiktik yewal onishwaltitan. Kampa yewal ak

tipichi pa ika moshte anmehwante, in yewal we ika moshte anmehwante.

**Annimichilis kampa akyewal amo tishkokoli,
yok yewal onka ka tehwane**

(Mk. 9:38-40)

⁴⁹Kwakin Yuhanes kito:

—Tamashtini, tikitak se yewal kinkishtiliyaya niyeh-yekatim tawalilom ka mo'itokaliste; tikilik pa amoyok kichiptyas, kampa yewal amo tishtokatiyaya.

⁵⁰Yehshwa kili:

—Amo shiktatsotilik; kampa akyewal amo tishkokoli, yok yewal onka ka tehwane.

Yehshwa kinahwa Yakobo wan Yuhanes

⁵¹Kimani astiwalaya in tonat kampa yewal katka pa yeskya tanamikil ompa takpak, yok mochikawalti panoti pa in Wepweblo Yerushalém. ⁵²Wan okintetan tanawatilme ta'ishpa ka yewal, wan yehwante panotiyak wan kalakik pa se ranchit Samarya pa kitemoloskya kaha mosewiloskya; ⁵³kampa yehwante samaritano amo kitenamikik kampa kimatik yewal yawiya pa in Wepweblo Yerushalém. ⁵⁴Kwah nimoneshtililme Yakobo wan Yuhanes okitak in, kitok:

—TATS, tihnek pa titatakewaske pa kiwaltitaniske teshoshte pa ilwikak pa kinshitinis?^k

⁵⁵Kwakin Yehshwa walmo'ishkwep wan kinahwa, [wan kinmili:

—Anmehwante amo ankimatil pa ten espiritu kat. ⁵⁶Kampa NitakaTakpakIlwikak amo wal kinkishtili ininyoliliste amo'ak, hanwel kinkishti pa poliwise].^l

Wan oyak pa okse ranchit.

AkYehwante kinekiloa kitokaloskya Yehshwa

(Mt. 8:19-22)

⁵⁷Kimani yaloya pa ot, se takat kili Yehshwa:

—TatsDyos, newal nimishtokas kaha han tiyaptiyas.

⁵⁸Yehshwa kili:

^k 9:54 Pa oksek amatTakwihkwilol niyok onka “kina kichi EliYah”.

^l 9:56 In takwihkwilol yewal onka ipanta korchetes hanwel onka pa in amatTapahwilme yahyankwik.

—Inik tehomim kipiwal ininkweba, wan totom kipiwal ininkalme; NitakaTakpakIlwikak amo kipi kaha kiteka nitsontek.

⁵⁹Wan okse kili:

—Shinishtok.

Yewal kinankili:

—Tats, shinishmakawalti ma ni ta'ishpa ma ni niktapach notats.

⁶⁰Yehshwa kili:

—Shikinka inik mihmike ma kintapachok ininmihmihke; tewal shi, shikinmil nireynarolisteDyos.

⁶¹Okse niyok kili:

—Tats, newal nimishtokas, shinishmakawalti pa niyas nikinnawatis pa no'icha.

⁶²Yehshwa kili:

—Amo'ak tachi pa takwitap ta se ta'ararotik^m akyewal yok kichi, amokwal pa nireynarolisteDyos.

Yehshwa kintitani in 72

10 ¹Kwah opan in, in TATS kinonan niyok oksek 72, wan okintetan ka ohome pa ta'ispa yewal, pa mochi Wehwepweblo' wan pa kaha yewal kinekiya yaskya. ²kinmili:

—Melawak, hyero miyak tapishkaliste, kat amo miyak tikipanolme. Hanwel, shiktahtanik in tats yewal nitakwitawil in tapishkaliste ma kinwaltitan tikipanolme pa kipishkaske nitapishkaliste. ³Wan anmehwante shiyaptiyak pa in ot; hanwel annimishtitantik kina borrego' ipanta in lobo'. ⁴Amo shihwikak wangoch, tomi, warachim; amo shimoketsak pa in ot pa tatahpaloske amo'ak. ⁵Kwah ankalakiske pa se kal, hani shitatahpalok yok ankitoske: “Ma ye sewiliste pa in kal.” ⁶Ta ompa kat masewalme ka sewiliste, in sewiliste mokawas ipa in masewalme, ta amoyok, in sewiliste walmokwepas ka anmehwante. ⁷Shimokawak hanwel pa se kal, wan shikwak wan shikonik ten anmishmakaske; kampa se tikipanol ma kipi tahstawiliste. Amo shiyaptiyak se pa okse kal. ⁸Kaha han ta kalakik pa se Wepweblo wan anmishtenamikiske, shikwak ten anmishtenewiliske; ⁹shikinpahtik inik kokoshkim yehwante ompa yeske, wan shikinmilik: “In nireynarolisteDyos

m 9:62 Ta se ta'ararotik amokwal tachishtiyas takwitap ta yok okichi kohkoltik kichiwas nisurko.

amo wehkawAs ka anmehwante.”¹⁰ Ta asik pa se Wepweblo wan amo anmishtenamikil, shikisak pa kiyawak wan shikitok: ¹¹“Niyok nipohtiTal pa niWepweblo yewal mopepech pa totankwam, tikintsehtselol ika anmehwante. Ma kimatik in, kampa nireynarolisteDyos amo wehkawAs ka anmehwante.”¹² Newal annimichilis yewal pa in tonat, in Wepweblo hyero we yes nitakokoliste amoyok yes inintakokoliste in masewalme pa Sodoma.

In masewalme amo taneltokal

(Mt. 11:20-24)

¹³Ma yok kina anmishyas, anmehwante kishki mochantil pa Horasin! Wan niyok kina anmishyas anmehwante, kishki mochantil pa BetSayda! Kampa ta pa Tiros wan pa Tsidón mochiwaloskya in taneshtiliste yewal kichiwak ka anmehwante, ya wehka kiwalkwepaloskya anmoyol ka Dyos, tatakemiltili ka shashalme chichakwashtik wan yowatyaloskya pa neshte. ¹⁴Newal annimichilis yewal pa in tonat in takokoliste amoyok we yes pa Tiros wan Tsidon kina anmotakokoliste anmehwante. ¹⁵Wan tewal, KaparNahum, yewal timo'ahkokti pa in takpakllwikak? Tiwetsis pa tatsinta Hadesⁿ kaha kat mihmihke.

¹⁶Akyewal anmishkak anmehwante, nishkak newal; akyewal amo anmishnek anmehwante, amo nishnek newal; wan akyewal amo nishnek newal, amo kinek yewal nishwaltitan.

Walmokwepak in 72

¹⁷Kimani in 72 walmokwepak, kwal tamatiloja, kitoloja: —TATS, inik tawalilom kimatil tishkakil kimani tikintakewal ka mo'itokaliste.

¹⁸Yehshwa kinmili:

—Newal onikit kampa Satán wetsiya pa in takpakllwikak kina se tapitaniliste. ¹⁹Shikitak newal annimishmak anmehwante chikawaliste pa kinpitsiniske kowam wan kolom, wan

ⁿ **10:15** Hades in kinek kitos ka hebreteko She'ol, kaha kat mihmihke. Inik kaha yeske tahosgarilme moshte yehwante kishki mikik, kwan ompa yeske ta'ishtapolme inik amamtakwihkwilolme, wan pa in se amattakwihkwilol amo moshte yeske tapahwilme ninitokalme; wan pa in okse amattakwihkwilol yeske moshte tapahwilme in ten kichiwak kwah yoliloja pa in mochtital.

pa kintaniliske mochi nichikawaliste in tishkokolil, pa amoten anmishpano. ²⁰Ma yok amo shipaktitiyak kampa inik yehyekatim anmishneltokal, han kampa anmo'itokaliste ankat tapahwilme pa in takpakllwikak.

Han nikon kimat akyewal nitats

(Mt. 11:25-27; 13:16-17)

²¹Haniman Yehshwa, kipi miyak pakiliste ka in EspirituSanto, wan kito:

—Newal nikito tahtolme wehwe, TatsDyos, TATS ka in takpakllwikak wan pa mochi kishki tal, kampa inik mochiten otikintat ka in takam kimatiloya ten panoskya wan in kwal motaneshtililoya, wan kwal tikinnishtil yehwante tamatil kina piltontim. Haha, TatsDyos, kampa yok tihnek.

²²NoTats onishtemak in mochiten, amo'ak kimat akyewal in nikon, hanwel niTats, wan amo'ak kimat akyewal niTats, hanwel nikon, wan nahyewal akyewal nikon kinekis kwal kineshtilis.

²³Yehshwa walmo'ishkwep ka nimoneshstililme wan iselte kinmili:

—Ma kipi yak pakiliste inik yehwante kital ka nishtololwam ten anmehwante ankital ka anmoshtololwam; ²⁴kampa anni-michilis in yewal myak in Taketsalme nitahtolmeDyos wan weReye' kinekiloya kitaloskya in ten anmehwante ankital, wan amo okitak; wan kinekiloya kikakiloskya in ten anmehwante ankikakil, wan amo kikakik.

Se tapowaliste ka yewal samaritano kwal

²⁵Haniman se Tamashtini NitanaawatilMoshé omokets oy otahto ka Yehshwa kinekiya kikwamanaskya, wan kili:

—Tamashtini, ten monek pa nikchiwas pa nikpiyas noyoliliste yewal amoTamis?

²⁶Yehshwa kili:

—Ten onka takwihkwilol pa NitanaawatilMoshé? Ten timomashti kan?

²⁷In Tamashtini NitanaawatilMoshé kinankili:

—“Shiktasot in TATS moDyos ka mochi moyoliliste, wan ka mochi mo'ihyo, wan ka mochi mochikawaliste wan ka mochi mota'ilmamikiliste; wan shiktasot monihni kina tewal timotasot.”

²⁸Yehshwa kili:

—Kwal titanankil. Shikchi in, wan yok tiyolis.

²⁹Yewal kinek mopale nitahtaniliste kitahtanili Yehshwa:

—Akyewal tikito in nonihni yewal nikpi pa niktasotas?

³⁰Yehshwa kinankili:

—Se takat yawiya pa in ot Yerushalém pa Yerikó, wan sek ta'ishtikiyanilme, kita'ishtikilik wan kikishtilik mochten niyok nishashalme; kitehtewik wan panotiyak, kikawak hame mihki. ³¹Pa in ot temowaya, se totats kwah okit oksela opan; wan hanse panoti. ³²Niyok ompa opan se lewita kwah okit, niyok oksela opan wan hanse panoti. ³³Se takat samaritano yewal niyok yawiya pa in ot, kwah okit, oki'ihnil. ³⁴Omo'ashilti ka yewal, okipahti ka aseYTE wan nihugoUbaBino, wan oki'ilpil. Wan okitehkolti pa niburro, okiwik pa se kal kaha omose wan okikwita. ³⁵Mostatik, kwah yayaptiyaya, kikishti tomi kina pa ome tonatim ka tiki-panoliste, okimak nikal in takat wan kili: “Shihkwita, kimani newal niwalmokwepas, nimishtastawilis mochi kishki mishteshmonekis.” ³⁶Kati ka in yente titamat yewal oye ninihni ka in takat yewal kita'ishtikilil inik ta'ishtikyanim?

³⁷In Tamashtini NitanaWatilMoshé tanankili:

—In kati yewal ki'ihnil.

Kwankin Yehshwa kili:

—Shi, wan shikchi tewal yok niyok.


Yehshwa kinpashalo Marta wan Marya

³⁸Kimani Yehshwa yawaya pa in ot o'as pa se ranchit, wan se siwat itoka Marta okise icha. ³⁹Marta kipiYaya se ninohniSiwat itoka Marya, yewal omotal kaha nikshiwam TATS pa kikakiskya ten kitowaya yewal. ⁴⁰Ma yok Marta, yewal kipiYaya myak tikipanoliste icha, oki'as Yehshwa wan kili:

—TATS, amoten titamat kampa nonohni nishka nitikipanotik nosel? Shikil, ma nishpale.

⁴¹In TATS kinankili:

—Marta, Marta, ti'onka ka myak ta'ilnamikiliste wan hyero titamatitik ka myak mochten, ⁴²hanwel se ten monek kichiwas kwal. Marya ki'onan se nitahko kwal, in yewal amo'ak kikishtilis.



© 1996 David C. Cook

Marta, Marya wan Yeshwa (Lukas 10:42)

Yeshwa wan nitaketsal inak Dyos

(Mt. 6:9-15; 7:7-11)

11 ¹Sehpa Yeshwa kitahtoltitkatka Dyos pek, wan kima-ni otam, se nimoneshtilil kili:

—TATS, shitishnishtil kina tiktahtoltiske Dyos, yok kina Yuhanes kinnishtil ininmoneshtililme.

²Yeshwa kinmili:

—Kimani antaketsaske inak Dyos, shikitok:

TatsDyos kwal ti'onka pa in takpakllwikak, ma kitok moshte ka mochi tasotaliste wan tahtolme wehwe wan kwahkwalme ka mo'itokaliste.

Ma wal moreynaroliste.

Mochi masewalme ma kichiwak kati tihnek nika pa ipa in mochital, yok mochiten kichiptyaske ma ye ka pakiliste pa in takpakllwikak.

³Shitishmak takwaliste mochi inik tonatim yewal tishteshmonek.

⁴Shitishihnil tota'ihntakoliste, kampa niyok tehwan te tikinihnilil moshte kishki tishkokolil.

Amo shitishmaka pa tishtilanili toyol tawalitot pa tikchiwaske ten amokwal.

⁵Niyok kinmili:

—Ak ka anmehwante yewal kipi se ninihni, ya kit panta yowal wan kili: “Nonihni, shinishtane yey pan, ⁶kampa se nonihni newal owal onishpashal, wan amo nikpi ten niktiniwilis.” ⁷Wan in kinankilis pa kalitik wan kili: “Amo shinawatiti; in tatapoli tsaktik, wan nopilwam wishtotikat nonawak; amokwal nimoketsas pa nimishmakas amoten.”

⁸Newal annimichilis yewal hanwel amo moketsas pa kimakas kampa ninihni, han moketsa kampa amo mopenawalti pa walas tahtanis, wan kimakas mochiten kiteshmonek. ⁹Yok yewal newal anmichili: Shitahtanik, wan Dyos anmishmakas; shitatemok, wan ankitaske; shitahtewewik pa tatapoli, wan anmishishtapolis. ¹⁰Kampa akyewal tahtani, kitemakal; wan akyewal tatemo, kit; wan akyewal tatehtewi pa tatapoli, ki'ishtapolil.

¹¹'Ak ka anmehwante yewal se tats, yeskya pa kimakaskya nikon se tet ta kitahtaniskya se pan?, wan kimakaskya se kowat ta kitahtaniskya se mich?, ¹²wan kimakaskya se kolot ta kitahtaniskya se webo? ¹³Ta anmehwante, amokwal momatil, kimatil temakal ten kwal ka anmopilwam, kishki aso amo temak in Tats takpakIlwikak yewal kimakas in EspirituSanto akyehwante tahtanil!

Kitoloya kampa Yehshwa kipiwaya nichikawaliste Satán

(Mt. 12:22-30; Mk. 3:19-27)

¹⁴Yehshwa kikishtilitikatka niyehyekat tawalilot yewal kichiwaya kampa amo tahtowaya in takat; wan kimani niyehyekat tawalilot okis, in amo tahtowaya waltahto. Wan masewalme motapololtiloya, ¹⁵wan sek kitoloya:

—In kinkishtili niyehyekatim tawalilom ka nichikawaliste BálSebúb, yewal niwetatakewan tawalilom.

¹⁶Oksek, kinekiloya kikwamanaloskya, kitahtaniloaya pa kichiwaskya pek ten ka taneshtiliste pa in takpakIlwikak.

¹⁷Wan yewal kimatiya ten tamatitikatkaloya, kinmili:

—Ta masewalme mochantilme pa se weTal momiktil iselte, in weTal shitinis; ta pa se kal mochantilme mokwalantil iselte in mochantilme pa in kal, niyok moshitiniske. ¹⁸Yok niyok, ta yewal onka tashelol isel, kina kwal mo'ehwaltis tawalilot ka

nireynaroliste? in kitol kampa newal nikinkishtili ka nichikawaliste in BálSebúb; ¹⁹Kampa ta newal nikinkishti in tawalilom ka nichikawaliste in BálSebúb, ka nichikawaliste akyewal kinkishtili in masewalme anmishtokal anmehwante? Kampa yehwante iselte anmishteshpawiliske anmehwante. ²⁰Kampa ta newal nikinkishti niyehyekatim tawalilom ka nichikawaliste Dyos, melawak nireynarolisteDyos o'as ka anmehwante.

²¹'Kwah se takat ka miyak chikawaliste wan kipi mochten ka momiktis wan kikwitawi nikal, amokwal kita'ishtikiliske in ten ompa ki'ahkoktik. ²²Wan ta owal okse ka hyero we nichikawaliste amoyok kina yewal wan kitanili, kikishtili mochi nimomiktiliste yewal ka mopalewiyyaya, wan kita'ishtikilis mochi wan kinmakas tahtahko ninihniwan.

²³'Yewal amo onka nonawak, onka ika newal; wan yewal amo tapehpen nonawak, yewal taseseman.

In yehyekat katsawak yewal walmokwep

(Mt.12:43-45)

²⁴'Kimani se yehyekat katsawak kis pa se takat, nehnemtinem kaha tawak kitemotinemis sewiliste; kwah amo kitas kito: "Nimokwepas pa no'icha, kaha nikis." ²⁵Wan kimani mokwepas, wan kit in kal kwal tatashpanal wan kwal ta'ahkokil. ²⁶Ya wan kinwalik oksek chikome niyehyekatim ma hyero momatil amoyok kina yewal, wan moshte kalakil wan ompa mokawal mochantil, kan hyero walmochi in takat amoyok kina katka ta'ishpa.

In aki melak kat tapaktilme

²⁷Kimani Yehshwa kitowaya in, se siwat ika in masewalme otsats wan kito:

—Ma kipi miyak pakiliste in siwat yewal mishtakatilti wan in chichiwal mishchichiltik!

²⁸Yehshwa kinankili:

—Ma yok ma kipyak pakiliste inik kikakil nitahtolmeDyos, wan kineltokal!

In masewalme hyero momatil tahtanil se taneshtiliste

(Mt. 12:38-42; Mk. 8:12)

²⁹Kina in masewalme kiyawalotikatkaloya miyak astikatkaloya Yehshwa, wan okipewalti in, kito:

—In masewalme hyero momatil, kinekil se taneshtiliste kampa amo kipiwaske okse taneshtiliste; ina han ka niTaketsal nitahtolDyos Yoná. ³⁰Kampa yok kina Yoná oye se taneshtiliste pa in masewalme Níniwe, niyok NitakaTakpakIlwikak yes se taneshtiliste pa in masewalme ashka yoltikat pa in tonatim. ³¹In wereySiwat kaha tatsintaSur moketsas pa in tonat Dyos, in wereySiwat kintakokoltis wan tahtos ika in masewalme yehwante ashka yoltikat, pa inik tonatim pa yok Dyos kintakokoltis; yewal owal pa hyero wEhka pa kikakis nitamatiliste in weRey Salomón; wan anmehwante amo kinekil kikakiske notamatiliste kampa newal hyero we nimonots amoyok kina monotsaya Salomón. ³²Pa in tonat Dyos kintakokoltis, inik mochantilme pa Níniwe moketsaske ika masewalme ashka yoltikak pa in tonatim, wan kinteshpawiltiske; kampa kikakik nitaketsaliste Yoná ma yok kikwepak niyol ka Dyos wan nika onka akyewal hyero we monots amoyok kina monotsaya Yoná.

In kandel pa mokwerpo

(Mt. 5:15; 6:22-23)

³³'Amo'ak kitati se kandel ta kitatatil, amo kitali itsinta se komit, kitalil kaha takpak, pa kintawilis moshte kishki kalakil pa in kal. ³⁴Moshtololwam kina kandel yewal kitawili mokwerpo; kimani moshtololwam kat kwahkwalme, niyok mochi mokwerpo kipiwas tawiliste; ma yok kimani moshtololwam amo kwahkwalme, mokwerpo kipiwas tatikommat. ³⁵Shimokwitawik ka in tawiliste yewal onka pa tewal yewal amo yes melawak pa tatikomak. ³⁶Yok yewal ta mochi mokwerpo kipi tawiliste, wan amo monelo ka in tatikommat, yes mochi tawiliste, kina kimani se kandel mishtawili ka nimeshton.

Yehshwa kinteshpawili inik parisheyo' wan in

Tamashtililme NitawawilMoshé

(Mt. 23:1-36; Mk 12:38-40; Lk. 20:45-47)

³⁷Kwah otam otahto Yehshwa, se parisheyo okinosti pa takwaskya inak yewal. Yehshwa okalak pa kal wan omotal kaha takwal. ³⁸In parisheyo moka kitatik Yehshwa kampa amo kipak nimahwam yok kina kichiwal pa takwaske ta'ihspa mopakal. ³⁹In TATS kili:

—Anmehwante in parisheyo' kipohpowal ikpak in baso wan in plato, wan pa itik kat myak ta'ishtikiyanilme wan ka

takokoliste yewal hyero kichiwal. ⁴⁰Amo kimatil takakil! In yewal okichi pa kiyawak, amo niyok okichi pa kalitik? ⁴¹Shi-temakak se temakaliste kwal ka yehwante, amoten kipiwal yewal ten onka kalitik pa anmoyol, wan yok mochi mokawas tapohpowaliste pa anmoyol.

⁴²'Kina anmishyas anmehwante, parisheyo! Antemakal in matahti pa sesen mochten kipiya^o pa in yerbabwena, wan ruda wan ka mochi'as tatokaliste, ma yok ki'ilkawal nitateshpawiliste wan nitasotaliste Dyos. In moteshmonek pa ankichiwaske, ma kichiwak kwal wan ka melawak.

⁴³'Kina anmishyas anmehwante, parisheyo!, yewal tatasotalme pa in ta'ishpa kaha motatil pa in tyopalmeYudiyo', wan kintahpalol pa in plasa.

⁴⁴'Kina anmishyas anmehwante, Tamashtinilme NitawatilMoshé wan inik parisheyo', ka ome ininshayak!, kat anmehwante kina kaha kintapachol amo nesil, wan in yehwante panol ikpak amo kimatil.

⁴⁵Sek ka Tamashtinilme NitawatilMoshé, kili:

—Tamashtini, kimani tikito in tishtakets niyok tehwan.

⁴⁶Wan Yehshwa kito:

—Kina anmishyas anmehwante niyok, Tamashtinilme NitawatilMoshé!, kampa kinmakal in oksek kintamamaltiril yewal amo ki'ehwal, wan anmehwante amo ankinektiyaske nitipit ankikitskiske ka se nidedo.

⁴⁷'Kina anmishyas anmehwante!, in yehwante kinchiwal inintakopinal pa ki'ilnamiktiyaske in Taketsalme nitahtolmeDyos yehwante kinmiktik anmowichalme anmehwante. ⁴⁸Yok amo han anmehwante ankitak kina omotachi hanwel yok ankichiwal anmehwante kina ankichiwak anmowichalme; yehwante kinmitik, wan anmehwante ankinchiwilil inintakopinalme.

⁴⁹'Yok Dyos ka nitamatiliste kito: "Annimishtitanili in Taketsalme nitahtolmeDyos wan tatetanilme, ka yehwante sek kinmiktiske wan okse kintohtokaske." ⁵⁰Yok in masewalme yewal ashka yoltikak pa in tonatim kampa tashtawaske inintamiktirme ka moshte in Taketsalme nitahtolmeDyos niyok kipiwal pa yeske tamiktirme kampa kimani omochi in mochital

^o 11:42 Diesmo kinek kito: se masewal kimak WeTatsDyos matahti pa syen pa sesen mochten kipiya.

kinmiktitiwalal, ⁵¹pa kimani niyEste Habel wan pa niyEste han SakarYah, yewal omik itsala kaha tatamakal kaha tatalil wan in tyopWe. Haha, melawak yes tashtawiliste pa in masewalme yewal ashka voltikat pa in tonatim.

⁵²'Kina anmishyas anmehwante, Tamashtinilme NitanaawatilMoshé!, Kampa ankipiyal in ka mo'ishtapo tamati-liste; wan yok anmehwante amo ankalakik wan yehwante kishki kinekiloya kalakiloskya amo kinmakawaltik pa ankalakik.

⁵³Kina Yehshwa kinmiliyaya mochi in, in Tamashtinilme NitanaawatilMoshé wan in parisheyo' mokwalantik, wan okipewaltik ka myak tahtaniliste pa yok tahtoskya ka myak tachiwaliste, ⁵⁴wan kinekiloya kikwamanaloskya pa kikitskiloskya ka isel nitahtolme.

In taposhawaltil parisheyo'

12 ¹Ma yok myak, monichikok masewalme miles wan miles, myak monichikoloya motihtiliktsaloya sek ka oksek. Yehshwa okipewalti kwakin tahtoliste wan kintakichiliyaya nimoneshstililme kinmili:

—Shimokwitawik ka inintaposhawaliste ka in parisheyo', in yewal kipiwal ome nishayak. ²Kampa amo onka tatapachol yewal pa amo yes ta'ishtapol niyok, amo onka se tatitiliste yewal amo pa kimatiloskya. ³Ma yok, mochi in anmehwante ankitoske pa tayoway, mokakis pa tahka; wan ta motakichilik pa anmonaka, yes tanawatiliste ikpak kalme.

Akyewal tihmakastiyaske

(Mt. 10:28-31)

⁴'Nonohniwan newal, newal annimichilis anmehwante kampa amo antamakastiyaske ka yehwante kimiktik tokwerpo, ma yok yahmo ten mishchiwiliske. ⁵Newal annimichilis akyewal ankimakastiyaske: Shikmakastiyak in yewal takishtili yoliliste, kipi chikawaliste pa anmishtasas kaha amoSéwiTeshoshte. Haha, yewal shikmakashtiyak.

⁶'Hanwel amo monamakal makwil tototito pa ome tomi? Ma yok Dyos amo kinilka pa amo'ak pa yehwante. ⁷Yok niyok pano ka anmehwante kampa anmotso onka mochi tapowalme. Yok amo shitamakastiyak, anmehwante anmonotsal miyak, amoyok monotsal in myak tototito'.

Taketstiyaske nitaneltokaliste pa Yehshwa

(Mt. 10:32-33; 12:32; 10:19-20)

⁸Newal annimichilis yewal moshte in takets-tiyaske inintaneltokaliste pa newal ni'ishpa in mase-walme, niyok NitakaTakpakIlwikak taketsas ka yehwante ni'ishpa nitanawatilanelhelmeDyos; ⁹ma yok yewal aki amo nishishmatis ininishpa masewalme, niyok yehwante amo yeske ta'ishmatilme i'ishpa nitanawatilanelhelmeDyos.

¹⁰Mochi tahtolme yewal kitoske ika in NitakaTakpakIlwikak, yes ta'ihniliste; mochi in taketsaliste amoKimawishtiliDyos ika in EspirituSanto, amo yes ta'ihniliste.

¹¹'Kimani anmehwante anmishwikaske pa in tyopalmeYudiyo', wan yeske tatenewiliste ka hweses wan in wetatakewalme, amo shimomaptik kina antanankiliske ten ankitoske, ¹²kampa haniman in EspirituSanto anmishnishtilis ten ankitoske.

Nitapowaliste akyewal kipi miyak tomi

¹³Se ika in masewal kili Yehshwa:

—Tamashtini, shikil nonohni ma nishmak notahko ka in takawaliste.

¹⁴Wan Yehshwa kinankil:

—Nohni, ak onishtal kina hwes wan pa nitahtos ika anmehwante?

¹⁵Niyok kito:

—Shimokwitawik anmehwante pa mochiten ankinectiyaske yewal ten onka pa in mochital; kampa yoliliste yewal amo moteshmonek pa tapiyas myak mochiten.

¹⁶Kwakin kintakichili in tapowaliste:

—Nital se takat yewal tapi ka myak tomi, okipi se tapishka-liste kwal. ¹⁷Yok moka tamatitik: “Ten nikchiwas? Amo nikpi kaha nikahkokis notapishkaliste.” ¹⁸Wan mo'ili: “Ya nihmat ten nikchiwas. Nikinmayawis nochahpilme, wan nikinchiwas oksek wehwe, kaha kwal nikahkokis mochi notapishkaliste wan mochiten nikpi. ¹⁹Wan nimo'ili nosel: No'ihyo newal, tikpi myak mochiten kwahkwal pa myak shiwim; shimose, shitakwa, shita-kon wan shiyol kwal pa in yoliliste.” ²⁰Wan Dyos kili: “Amo tihmat titakak, pa in yowal tikpolos moyoliliste; wan pa ak ta yes,

yewal tikahkok?" ²¹Yok kipano in se aki myak tapi pa mochten yewal mota'ahkokili pa isel, wan amoten kipiyan ni'ishpa Dyos.

Dyos kinkwitawi ininpilwam

(Mt. 6:25-34)

²²Kwakin Yehshwa kinmili nimoneshilime:

—Kampa yok animichili: Amoten shitamatitiyak ka anmoyoliliste, ten ankikwaske in ten anmotakemiltiske pa anmokwerpo. ²³In yoliliste amoyok miyak kina in takwaliste, wan in kwerpo amoyok miyak kina in shashalme.

²⁴Shikinmitak inik kakalom, amo tatokal amo tapishkal, amo kipiyan kaha ki'ahkokiske tayol चाहpilme; hanwel Dyos kin-tamak. Kishki amo miyak anmonotsal anmehwante amoyok miyak kina monotsal in totom! ²⁵Ak ka anmehwante, ta hanwel hyero tamatitik, kina kwal ki'ilkawaltis se ora pa niyoliliste? ²⁶Ta anmehwante amokwal ankichiwaski in han ten tipichi, pates anhyero antamatitiyaske ika in ten anmishteshmonek?

²⁷Shikinmitak in shochim liryu kina mo'apawal, wan amo tikipanol amo tatahkitil; newal animichilis kampa Salomon, ka mochten tapiyaya ka miyak tomi, amoyok motakemilti kina se ka yehwante. ²⁸Ta yok kintakemilti Dyos in shochim yewal ashka kat pa tashosholtik, wan mosta tatasal yes pa teshoshte, kishki aso amo kichiwas pa anmehwante, mase-walme amo taneltokalme! ²⁹Yok amoten shitamatitiyak, ten ankikwaske wan ten ankoniske. ³⁰Mochi in kitemol inik mase-walme inik mochantilme pa in tal; niTats kimat kampa anmeh-wante anmishteshmonek. ³¹Anmehwante hanwel shiktemok nireynarolisteDyos, wan in tachiwaliste yeske temakalme.

Miyak takawaliste ta'ahkokilme pa in takpakllwikak

(Mt. 6:19-21)

³²'Amo shitamakastiyak, noborrego' newal; anmehwante amo myak kat, kampa in Tats ka miyak pakiliste anmishma-kas nireynarolisteDyos. ³³Shihnamakak mochten kipiyan, wan shikintemakak inik amoten kipiyan; shikinpiyak in matam yewal amopin tsahtsayanal, wan shimochiwilik pa in takpakllwikak miyak tomi yewal amo'ik tami, ompa amo kalakil ta'ishtikiyanilme amo kikwal tashinashtim. ³⁴Aki han ta pek kipi tomi ompa han ta'ilnamiktiya ta yok niyok

anmehwante anmochiwak ka miyak tomi, inak Dyos han kan yeske anmoyolme in moteshmonek ankichiwaske.

In tikipanol takwitawi

³⁵Shitachishtiyak, shiyek ka anmoshashalme antatakemiltili wan ka anmokandel tatatitiya. ³⁶Shiyek kina in tikipanolme yehwante kichishtiyaske in nikaltats pa walmokwepas pa in mitotiliste ka in monamiktiliste, pa kimani in nikaltats asis wan tanotsa yehwante haniman ki'ishtapolil tatapoli. ³⁷Kwal se kwal kinyas in tikipanolme yehwante in nikaltats kinasis kampa kichishtiyaske pa walmokwepas; melak annimichilis kampa kitalis nishashalme pa kichiwak pa motaliske kaha takwal wan yewal isel walas anmishkistilis takwal. ³⁸Kwal kiyas in tikipanol yewal in nikaltats ki'asis yok hanwel ta o'as ipanta yowal, niyok pa tahtaneshti. ³⁹In shihmatik anmehwante, ta in nikaltats kimatitiyaskya kimani asiskya in ta'ishtikiyan, takwitaptiyaskya wan amo kimakawaltiskya pa kita'ishtikiloskya ni'icha. ⁴⁰Niyok anmehwante shitachishtiyak; kampa in NitakaTakpakIlwikak walas kimani anmehwante amo ankichishtiyaske.

Ome tikipanolme in yoliyaya kwal wan in yoliyaya amokwal (Mt. 24:45-51)

⁴¹Kwakin Petros kito:

—TATS, in tapowaliste onka pa tehwanke, onka pa moshte?

⁴²In TATS kinankili:

—Akyewal in wetatakewan in yoliyaya kwal wan kimat kichi kwal, yewal in nikaltats kikawilis pa kinkwitawis yehwante mochantilme icha pa kintamakas kwah mo'asis ni'ora pa takwaske? ⁴³Kwal kiyas in tikipanol yewal, kimani in nikaltats walas ki'asis kichiptyas yok. ⁴⁴Melak annimichilis, kitalis pa kikwitawis pa mochten tapiyas ka nitakawaliste. ⁴⁵Ta in tikipanol, tamat kampa nikaltats wehkawas, wan kipewalti tawachiliste ka tikipanolmeTakam wan tikipanolmeSiwam, wan motali takwas, takonis wan tawanis, ⁴⁶in nikaltats in nitikipanol walas kimani in amoyok tamatis, wan pa se ora yewal amo kimat; wan kitakokolti hyero, wan kisasas ka inik amo kimatil takakil.

⁴⁷In tikipanol yewal kimat ten kinek nikaltats wan amo kimat takak wan amo kimat kichi kina kili, yes takokoltili ka myak tawitikilme. ⁴⁸Ta tikipanol yewal amo kimat, ten kinek nikaltats okichi ten amokwal, kwakin yewal yes amo miyak tawitikil. Wan

aki yes kwal kinakis miyak kimakas in tats yok in tats, kichiwas pa kikwepilis miyak; wan aki yes kwal in tats kimakas miyak pa kistiyas, yoke yewal kipiwas pa kikwepilis miyak.

Ika Yehshwa nitamashtiliste mosesemanaske masewalme

(Mt. 10:34-36)

⁴⁹Newal niwal niktas teshoshte ipa mochi kishki tal; wan kina nihnekiskya pa yeskya ka teshoshte! ⁵⁰Onka se takwa-tekiliste yewal monek pa ninknamiki, wan kina hyero nitamat nikchishtik pa yok motachiwas! ⁵¹Antamatil anmehwante kampa oniwal pa in tal pa nihwalikas sewiliste? Annimichilis kampa ayak, hanwel se tasheloliste. ⁵²Kampa ashka pa ta'ishpa, pa se kal mochantilme ka makwil yeske tashelolme, ka yey ika ome, wan pa ome ika yey. ⁵³Nitats momiktis inak nikon, wan nikon yes ka se ta'ilnamikiliste ika nitats; wan ninantsi yes ka se ta'ilnamikiliste ika nikonSiwat, wan nikonSiwat yes ka se ta'ilnamikiliste ika ninantsi; wan nimonantsi yes ka se ta'ilnamikiliste ika nisiwamon, wan nisiwamon yes ka se ta'ilnamikiliste ika nimonantsi.

In taneshtiliste pa in tonatim

(Mt. 16:1-4; Mk. 8:11-13)

⁵⁴Yehshwa niyok kitowaya ka in masewalme:

—Kimani anmehwante kital yewal mo'ahkoki se aya-wit kaha tamalin tonat, ankitol pa wal kiyawit, wan yok motachi. ⁵⁵Kimani yehyekatiya ka tatsinta, ankitol hyero tona yes, wan yok motachi. ⁵⁶Ome ininshayak! Ta ankimatil kital in takpakllwikak wan in tal, pa kimani kyawi wan tona yes, kina amo ankimatil kital in tonatim anmehwante mochantitikat?

Sewiliste inak yewal mishkokoli

(Mt. 5:25-26)

⁵⁷Pates amo antamatil anmehwante anmoselte in yewal ten kwal? ⁵⁸Ta ak mishteshpawilitik, kampa otikchi pek ten amokwal pa ika, shitakets inak yewal pa mokawaske ka se tahtol, kimani ayamo mishtemakas ka in hwes; kampa ta amo in hwes kitakewas se alwasil pa mishwikas mishtsakwas. ⁵⁹Nimichilis yewal amo tikisas ompa pa kimani titashtawas mochi.

Monek masewalme moyolkwepaske

13 ¹Pa inik tonatim sek oyak kitak Yehshwa wan kita-kichilik kampa Pilatos otatake pa kinmiktiloskya sek takam pa in mochital Galileya kwah yehwante tatiniwililoya tatamakal wan yok omonelwilik ininyEste ka yolikilme ininyEste yehwante tatenewilil tatamakal. ²Yehshwa kinmili:

—Wan antaneltokal anmehwante kampa in Galileyo katkaloya hyero ta'htakolme ka inik oksek yehwante Galileyo? ³Wan annimichilis kampa ayak; wan ta anmehwante amo ankikwepal anmoyol ka Dyos niyok moshte anmehwante anpoliwiske. ⁴Wan kina antamatil ka inik 18 mikik kwah kinpach, in weTorre pa Shiloha antamatil anmehwante kampa yehwante katkaloya we ininta'htakolme ka yehwante ompa mochantiloya pa Yerushalém? ⁵Newal annimichilis kampa ayak; wan ta anmehwante amo ankikwepal anmoyol ka Dyos, niyok moshte anmehwante anpoliwiske.

Se tapowaliste ka in kwawitIgero amo taki

⁶Niyok kinmili in tapowaliste:

—Se takat kitokaya se kwawitIgero pa nikwahmilUba, wan kimani kitem igo', pa yewal amo okit nitaki amoten. ⁷Kwakin kili nitikipanol yewal kikwitawiyaya kwahmil: “Kipi yey shiwim kampa niwal niktemo igo' pa in kwawitIgero, wan hanse kimani niwal amoten nikit. Shikte, kampa kitsakwilitik notal?” ⁸Wan in kikwitaptikatka kito: “Tats, shihka pa okse shiwit; kampa newal nikyamanili tal niktashilis tal kwal. ⁹Ta temak taki; kwal yes wan ta amo, shikte kwakin.”

Yehshwa kipahti se siwat pa in se tonatmosewilyudiyo

¹⁰Pa se tonatmosewilyudiyo, Yehshwa tanishtilitikatka pa se in tyopYudiyo; ¹¹wan ompa katka se siwat kipewaye se takokoliste ka 18 shiwim. Moyolkokotikatka ka se niyehyekat tawalilot nehnemiyaya koltik, wan amokwal nehnemiskya melaptik. ¹²Kimani Yehshwa okit, okinots wan kili:

—Siwat, ashka timoka tamakawal ka motakokoliste.

¹³Wan haniman kimani Yehshwa okintal nimahwam ipa yewal, in siwat momelapti, wan kipewaye tahtolme wehwe pa Dyos. ¹⁴Ma

yok in wetatakewan pa in tyopYudiyo okwalan kampa Yehshwa okipahti pa in tonatmosewilyudiyo, yok yewal kinmili masewalme:

—Onka chikome tonatim pa kwal motekipanos; pa yeske tapahtilme, shiwalak pa inik tonatim amo shiwalak pa in tonatmosewilyudiyo.

¹⁵Kwakin in TATS kili:

—Ome ininshayak kipiya, amo ankitomal aki han ka anmehwante anmotoro pa kano wan anmoburro pa in tonatmosewilyudiyo, pa anki'ahmakaske? ¹⁶Wan in siwat, yewal nikolinche AbRaham wan yewal tawalilot kipiyya ta'ilpil ka takokoliste pa mochi inik 18 shiwim, hanwel amo-kwal momakawaskya nitakokoliste pa in tonatmosewilyudiyo?

¹⁷Kwah Yehshwa yok kito, wan inik kikokoliloya mopinawiltik; wan moshte masewalme pakiloya kwah kitaloya inik mochiten yewal kichiwaya.

Nitapowaliste ka nishinashte in mostasa

(Mt. 13:31-32; Mk. 4:30-32)

¹⁸Yehshwa niyok kito:

—Kina ten nes nireynarolisteDyos, wan ka ten kwal niktamachiwas? ¹⁹NireynarolisteDyos nes kina nishinashte mostasa kwah se takat kitok shinashte pa nikwahmil, wan omo'apa wan omochi se kwawit weyot, pa nimahmashaltik kichiwal nikalme in totom pa in takpakIlwikak.

Nitapowaliste taposhawalti

(Mt. 13:33)

²⁰Wan oksep kito Yehshwa:

—Ka ten niktamachiwas nireynarolisteDyos? ²¹In nes kina ka motaposhawalti kampa se siwat konan wan ki'ahkoki pa yey tamachiwiliste ka arina, pa kichiwas ma moposhawalti mochi in teshte.

In tatapoli pitsawak

(Mt. 7:13-14, 21-23)

²²Pa ni'ot yawiya pa Yerushalém, Yehshwa tamashtiyaya pa Wehwepweblo wan ranchito'. ²³Wan se kitahtanili:

—TATS, amo myak kat in mokishtilil yoliliste?

Yehshwa kinankili:

²⁴—Shikchiwak mochi pa ankalakiske pa in tatapoli pitsawak; kampa newal annimichilis myak kinekiske kalakiske, wan amokwal kalakiske. ²⁵Pa kishki nikaltats moketsas wan kitsakwas in tatapoli, wan anmehwante, anyeske pa kiyawak, kitehtewiske in tatapoli wan tsatsiske: “tats, shitishistapol.” Yewal anmishnankili: “Amo nihmat kampa kisak anmehwante.” ²⁶Kwakin anmehwante ankitoske: “Tehwante antitakwak wan antitakonik ka tewal, wan tewal titamashtiyaya pa tehwante toplasa’.” ²⁷Yewal anmishnankilis: “Amo nihmat kampa kisak anmehwante. Shimewak ka newal, moshte anmehwante ten amokwal ankichiwal.” ²⁸Kwakin yes chokaliste wan kakistiske tankochowam, kimani kitaske AbRaham, Itsak, Yakob inak in Taketsalme nitahtolmeDyos kat pa nireynarolisteDyos, wan anmehwante anyeske kiyawak. ²⁹Wan walaske masewalme pa okse pweblo kaha kis tonat wan kaha kalaki tonat, wan niyok kaha takpakNorte, wan kaha tatsintaSur, wan motaliske kaha takwal ka nireynarolisteDyos. ³⁰Wan sek kat nika amo ta’ihitalme yehwante yeske ta’ishpa, wan sek ashka kat ta’ishpa pa in tonat amo yeske ta’ihitalme.

Yehshwa okit Yerushalém walchok

(Mt. 23:37-39)

³¹Pa inik tonatim asik sek parisheyo' wan kilik Yehshwa: —Shipanoti, kampa Herodes kinek mishmiktis.

³²Yewal kinmili:

—Shiyak shikilik in tehon: “Newal, nikinkishti niyehyekatim tawalilom wan nikipahti, ashka wan mosta wan pa yey tonatim nitamis nitikipanos.” ³³Monek pa niyaptiyas no’ot ashka, mosta wan wipta, kampa amokwal kampa se niTaketsal nitahtolDyos pa mikis kiyawak Yerushalém.

³⁴Yerushalém, Yerushalém, nimochantilme Wepweblo yewal kinmikti in Taketsalme nitahtolmeDyos wan kinmohmot nitanotsalme Dyos! Kishki onihnek nikinnichik mopilwam, kina se totoo kinkalakti nipilwito' itsinta ninastakapalme, wan amo tihnek! ³⁵Wan ashka, shikit, mokal mokawas isel; wan nimichilis kampa ashka amo nichitaske pa kimani asis in tonat kampa anmehwante ankitoske: “Ma kimashtik in yewal wal ka ni’itokaliste in TATS.”

Yehshwa kipahti se kokoshke

14 ¹Pa se tonat Yehshwa oy otakwa pa nikal se parisheyo wemonots, katka tonatmosewilyudiyo, wan yehwante oksek parisheyo' ki'ispyarotikatkaloya. ²Ni'ishpa Yehshwa katka se takat kipiyaya se kokoliste yewal posaptikatka. ³Wan Yehshwa kintahtanili in Tamashtinilme NitawawatilMoshé wan in parisheyo':

—Kwal aso tapahtiske pa in tonatmosewilyudiyo, hanwel ayak?

⁴Yehwante amo tanankilik. Kwakin Yehshwa okikitski in takat pa nimahwa, okipahti wan okitetan. ⁵Wan in parisheyo' kinmili:

—Ta ak anmehwante, ta nikon wan nitoro owets pa se takoyonke, amo kikishtiskya haniman, ta yok yeskya pa in tonatmosewilyudiyo?

⁶Wan amo'ak kimatiya kina kinankililoskya.

In tanotsalme pa se monamiktliste

⁷Kimani Yehshwa okit yewal in tanotsalme kaha takwal kinonanaloya motaliloya ta'ishpa pa in siya', kintakichili se tapowaliste:

⁸—Kimani mishnostiyaske pa se mitotiliste kaha monamikttil, amo shi shimotal ta'ishpa, kampa ta o'as okse tanotsal yewal wemonots amoyok kina tewal; ⁹wan kimani walas in yewal omishnots pa michilis: “Shihmak pa motalis in takat kaha tiyowatik.” Kampa kwakin timopinawiltis wan tiyas timotalis pa se siya onka hyero takwitap. ¹⁰Hanwel kimani tiyes tanotsal, shi shimotal takwitap; pa kimani walas yewal mishnots michilis: “Nonihni newal, shiwal wan shimotal ta'ishpa.” Yok tikpiyas tamawishtiliste ka in okse tanotsalme kaha takwal. ¹¹Kampa mochi sesen in we tamatilme ka in oksek, yes amo wetanotsal in yewal aki mopinawilti isel yes wetanotsal.

¹²Niyok kili Yehshwa in yewal okinots:

—Kimani titemakas se takwaliste pa watsinko wan pa tyotak, amo shikinnots monihniwan, wan monohniwan yehwante mochantilme mocha, wan niyok moparyente, wan oksek masewalme mochantilme pa oksek kalme kishki kipiyal miyak tomi; ta yok tikchi kwakin yehwante mishnotsaske tewal wan yok mishkwepiliske in tachiwaliste. ¹³Hanwel, kimani tikchiwas

se takwaliste, shikinnots yehwante amoten kipiyl, wan amo kipiyl ininmahwam, wan amokwal nehnemil, nehnemil yehwante amo tachiyl; ¹⁴wan yok tikpiyas pakiliste. Kampa yehwante amokwal kina mishkwepiliske in tanotsaliste motashtawiliste, tihnamikis pa in tonat kimani walyoliske oksep in kichiwak kwal.

Yehshwa kinmili se tapowaliste ka tyotakTakwaliste we

¹⁵Se ka yehwante in yowatikatkaloia kaha takwal okikak in, wan kili:

—Ma kipi pakiliste akyewal kikwas pan kaha reynaros Dyos.

¹⁶Kwakin Yehshwa kili:

—Se takat okichi se takwaliste we, okinnots myak mase-walme. ¹⁷Pa kimani katka in tayokshitoliste okitake nitikipanol pa kinnotsaskya nitanotsalme: “Shiwalak, kampa onka tayokshitoliste takwal.” ¹⁸Ma yok moshte yehwante kitoloia se ta'ilnamikiliste wan se kito: “Anok onimokowil se tal wan nikpi pa niyas nikitats. Amo shikwalan kampa amokwal niyas.” ¹⁹Okse kito: “Anok nimokowil makwil toro, ka ohome wan monek pa nikintikipanoltis; yok nihmatis ta kat kwal. Amo shikwalan kampa amokwal niyas.” ²⁰Wan okse kito: “Anok onimonamikti, wan amokwal niyas.” ²¹Yok walmokwep in tikipanol, okitakichil in nikaltats in tahtolme. Kwakin okwalan wan kili nitikipanol: “Hanwel shimotaloti pa in plasa wan pa in otim pa in Wepweblo, wan shikinnostiwal yehwante amoten kipiyl, wan in amo kipiyl ininmahwam, wan amo nehnemil kwal, wan yehwante amo tachiyalme.” ²²Kimani nitikipanol kili: “Tats, nitam nikchi ten tinichil, wan yok we motaka.” ²³Wan in tats kili nitikipanol: “Shi kwakin ka yehwante mochantilme pa otim wan tashosholtik kaha han wan shikinchiwalti pa kalakiske, nihnek kampa temis nokal. ²⁴Annimichilis kampa amo'ak ka in ta'ishpa tanotsalme kipaloske notakwaliste.”

Kishki monek motashtawas ta kinek kitokas Kristo

²⁵Kina myak kitokatiyaloia Yehshwa; walmo'ishkwep ka yehwante wan kinmili:

²⁶—Ta ak wal nonak, wan amo kika nitats, wan ninantsi, wan nisiwa, wan ininpilwam, wan ninohniwanTakam

wan ninohniwanSiwam, wan niyok niyoliliste, amokwal pa yes nomoneshtilil. ²⁷Wan yewal aki amo konan nikruskwawit wan nishtok, amokwal yes nomoneshtilil. ²⁸Kampa akyewal ka anmehwante ak kinekis kiketsas se kalweyak, amo motalis pa kitas ta kipi tomi kishki kiteshmonek pa kimatis ta kipi mochi in ten kiteshmonek pa kitamis? ²⁹Ta okital nitankwa in kalchiwal, wan hani ki'ilnamik kampa amokwal kitamis, wan moshte kishki kimatiske kiwetskiliske yewal ³⁰Wan kitoske: "In takat okipewalti se kalchiwaliste wan amo okitam okichi." ³¹Wan ta se weRey kinek kichiwas momiktiliste ika okse weRey, amo motalis pa kimatis ta hanwel kwal mo'onanas ka in 10 mil gwacho' yewal kinpi in yewal walal momiktil inak yewal kat 20 mil gwacho'? ³²Ta amokwal kitanilis, kintitanis sek tanawatilme in okse weRey, kimani in okse weRey yes weEhka, wan kititanilis taketsaliste ka sewiliste. ³³Yok niyok, aki han ka anmehwante yewal amo kika in mochiten tapi, amokwal mochiwas pa yes notanawatil.

Kimani in istat kipolo niwelik

(Mt. 5:13; Mk. 9:50)

³⁴'In istat kwal; ma yok ta kipol nipoyak, kina kwal mopoyawaltis? ³⁵In istat amo welik amokwal pa in tal, wan ta kitasak in istat amokwal amo mo'apawas tatokal wan yok motasas. Aki kipi ninakas pa takakis, ma takak.

Nitapowaliste in borrego mopolo

(Mt. 18:10-14)

15 ¹Moshte in tapishkalisteTómi wan niyok yehwante ta'ihhtakolilme mo'ashiltiLOYA ka Yehshwa pa kikakiloskya, ²in parisheyo' wan Tamashtinilme NitanawatilMoshé kitaketsaloya, wan kitoloya:

—In kintenamiki in ta'ihhtakolilme, wan takwa inak yehwante.

³Kwakin Yehshwa kintakichili in tapowaliste:

⁴—Akyewal ka anmehwante, ta kinpi 100 borrego' wan kipol se ka yehwante, amo kinka in 99 pa se tal kaha tawak, wan ya kitemo in mopolo, pa kimani kitas? ⁵Wan kimani kitas, ka miyak pakiliste kitalis ipa niyahkwal, ⁶kimani asis ni'icha, kinnotsas ninihniwan pa oksek kalme wan oksek takam wan kinmili: "Shikpiyak pakiliste ka newal, kampa onikit noborrego yewal omopol." ⁷Annimichilis yok niyok yes pa in

takpakIlwikak, yes miyak pakiliste pa se takatsawaltil yewal kichi ten kwal pa kineshtis kampa kikweptik nita'ilnamikiliste wan kineshtitik kampa kikweptik niyol ka Dyos ka nitachivaliste kwahkwal, amoyok yeske nahyehwante 99 yehwante kampa kat ta'ihnihilme ininta'ihnakoliste wan amo monekil pa kikwepaske ininta'ilnamikiliste wan kineshtiske kampa kikweptikat ininyolme ka Dyos.

Nitapowaliste nahyewal in tomi tapolol

⁸Ta se siwat kipi matahti tomi, wan kipolo se ka yehwante, amo kitatitili se kandel wan tatashpan, wan kitemo yolitikit in tomi pa kimani kitas? ⁹Wan kimani kitas, kinnotsas pa monichikoske ninihniwanSiwam wan okse siwam mochantilme pa okse kalme wan kinmili: “Shikpiyak pakiliste nahnewal, kampa onikit notomi yewal onikpol.” ¹⁰Newal annimichilis anmehwante yok niyok onka pakiliste pa ni'ishpa nitanawatilanhelme in Dyos pa se yewal takatsawiliste kikwep niyoliliste ka Dyos.

Se tapowaliste ka nikon yewal kitamili nitomi nitats

¹¹Yehshwa niyok kito:

—Se takat kinpiyaya ome ininpilwaTakam, ¹²wan nikon tipichi kili nitats: “Tats, shinishmak notahko ka in motomi yewal newal tinishmakas kwah timikis.” Kwakin nitats kinmak tahtahko nitomi ka sesen ininpilwam. ¹³Wan amo panok miyak tonatim, in nikon tipichi kinichiko mochiten tapiyaya wan panoti pa okse tal wEhka, wan ompa ki'ihnakotinem mochi nitomi pa se yoliliste amokwal. ¹⁴Kimani okitam mochi, owal se mayanaliste hyero pa in mochital, wan okipewalti mayanaliste. ¹⁵Kwakin oy kitem tikipanoliste ka se in mochantilme pa in mochital, akyewal okitake pa yaskya pa nitashosholtik pa kinkwitawiliskya nipitsom. ¹⁶Wan kinekiya kipachiwiltiskya nibarriga ka inintakwalme tashokoyaltilme pitsom, amo'ak kimakaya ten kikwaskya. ¹⁷Kimani walmo'ilnamiki wan mo'ili: “Kishki tikipanolme pa nikal notats kipiwal miyak takwaliste, wan newal nika nimikti ka mayanaliste! ¹⁸Nimokwepas pa nikal notats, wan nikilis: Tats, onikchi ta'ihnakoliste ika in takpakIlwikak wan ika tewal; ¹⁹wan amo nimonots newal pa nikitos kampa nimokon; shikchi kina se yewal motikipanol.” ²⁰Wan yok omokets wan walmokwep ka nitats.



*In takatYankwik kinekiskya kikwaskya
ten kinmakaya pitsom (Lukas 15:17)*

'Kwah ayamo asiyaya wEhka walaya, nitats okit wan oki'ihnli. Wan omotal kwakin kinapalo wan kitenamiki. ²¹Wan nikon kili: "Tats, onikchi katsawiliste ika in takpakIlwikak wan ika tewal; wan amo nimonots pa nikitos kampa timokon." ²²Ma yok in tats kinmili inintikipanolme: "Shihwalikak se takemtel kwal wan shiktakemiltik. Shiktalilik se aniyo pa nidedo wan warachim pa nikshiwam. ²³Shiyak haniman shihwalikak in beserro tomawak wan shihmiktik. Wan ma titakwak, ma tikchiwak se mitotiliste! ²⁴Kampa in nokon newal katka mihki, wan walyol; poliptikatka, wan ashka tikitak." Wan kipewaloya mitotiliste.

²⁵'Wan nikon we katka pa in tashosholtik; kimani walmokwep kwah astiyaya pa kal, okikak tatsotsonaliste wan mitotiliste. ²⁶Kwakin okinots se tikipanol wan kitahtanili ten panotikatka. ²⁷In tikipanol kili: "MonohniTakat tipichi walmokwep; wan motats tatake pa kimiktilik se beserro tomawak, kampa okitenamik kwal wan ka yoliliste." ²⁸Kimani ninohniTakat we okikak in hyero okwalan amo okinek okalak, yok nitats okis kichikawaltiyaya pa kalakiskya. ²⁹In nikon ta'ishpa we kili nitats: "Nikpi myak shiwim pa nimishtikipanolitik, wan hanse nimishneltokatiya, tewal

amo'ik otinishmak se chibit, pa nikchiwaskya se takwaliste inak nonihniwan pa oksek kalme. ³⁰Ashka owal in mokon tewal, yewal okitam motomi ka siwam yehwante motekal ka moshte takam, wan titatake pa kimiktiliske se beserro toma-wak pa yewal.” ³¹Nitats kili: “Nokon newal, tewal ti'onka ka newal, wan mochten nikpi in yewal ka tewal. ³²Ma yok monekiya pa tikpiyaloskya mitotiliste wan tikpiyaloskya pakiliste, kampa monohniTakat katka mihki, wan walyol oksep; wan poliptikatka, wan ashka tikitak.”

Tapowaliste ka in tikipanoliste yewal kitam tomi

16 ¹Yeshswa niyok kinmili nimoneshtililme:
—Katka se takat kipiyya miyak tomi kipiyya se nitikipanol wetatakewan, yewal kiteshpawililo ya kampa yewal ki'ihlakoliyya nitomi nikaltats. ²In takat okinots nitikipanol wetatakewan wan kili: “Ten yewal in kitol ka tewal? Shinishchiwil se amat ika mochi kishki nitapi, kampa yahmo tiyes notikipanol wetatakewan pa nokal.” ³Kwakin in tikipanol wetatakewan moka tamatiti: “Ten aso nikchiwas ta in nikaltats nishkishtil notikipanol wetatakewan? Amo nikpi chikawaliste pa niktikipanolitis tal, amo nimochika pa nitahtanis tomi yewal tipinawaliste. ⁴Ma yok nihmat ten nikchiwas, yok kimani nishkishtilis notikipanoliste wetatakewan niyes kwal tanamikil kaha han pa se kal.” ⁵Kwakin okinots sesen yehwante tawikililo ya ka in nikaltats. In ta'ishpa kili: “Kishki tihwikili in nikaltats?” ⁶Wan yewal kinankili: “Nihwikili 100 barril ka aseYTE.” In tikipanol wetatakewan kili: “Shikonan in amat pa kishki titawikili; wan haniman shimotal wan shihkwihkwil 50.” ⁷Okse kili: “Wan tewal, kishki titawikili?” Wan yewal tanankili: “In 100 chikiwim ka trigo.” In tikipanol wetatakewan kili: “Shikonan in amat; wan shihkwihkwil 80.” ⁸Kwah kimat in nikaltats kili tahtol kwal in tikipanol kampa kimatiya tikwamanaya in okichi kwal. In takam pa in tal amo kineltokal Dyos, yehwante kimatilo ya tikwamanaloya ka tanichikolme ika oksek masewalme niyok amo kineltokal Dyos kampa kipiyaloya hyero we tamatiliste, amoyok kina oksek, yehwante kimatilo ya kineltokaloya Dyos.

⁹Ma yok melak annimichilis shiktikipanolitik in mochi tapiyalme ka tomi amokwal pa kinpalewiske oksek wan shimochiwak ininnihniwan, kwah kimani in

mochiten tapiyalme ka tomi motamiske, yehwante kinmakaske tanamikilme pa in kalme kaha amo'ik tamilme.

¹⁰'Akyewal kwal kikwitawi in ten amo miyak kostaro, niyok kwal kikwitawis in ten miyak kostaro; wan akyewal amo tamawishtili ka in amo miyak kostaro, niyok amoyok yes ka in yewal miyak kostaro. ¹¹Ta anmehwante amo tamawishtilil in mochi tapiyalme ka tomi amokwal anmehwante amo ankimatil ankichiwal kwal, akyewal melawak anmishmakas in ten miyak kostaro? ¹²Wan ta ten anmishtanewik wan amo ankikwitawil kwal, akyewal anmishmakas in anmotakawaliste anmehwante?

¹³'Amo'ak kwal kintikipanoli ome nikalmetatsim; kampa se amo kitasotas wan okse kitasotas, wan in se kineltokas wan in okse amo kineltokas. Yok anmehwante amokwal ankitikipanoliske Dyos wan tomi.

¹⁴Inik parisheyo', yehwante kitasotaloya tomi, niyok kikaktikatkaloya in mochten, wan kiwetskililoya Yehshwa.

¹⁵Kwakin Yehshwa kinmili:

—Anmehwante anmokwahkwamanal moselte ininisha masewalme, ma yok Dyos ki'ishmat anmoyol; in kati masewalme kwal kital, Dyos amokwal kit.

NitanawatilMoshé wan in nireynarolisteDyos

¹⁶'NitanawatilMoshé wan in Taketsalme nitahtolmeDyos asiloya ka Yuhanes. Kwah okipewaltik tamashtilisteKwal nireynarolisteDyos, wan moshte mochikawaltiloya pa kalakiloskya pa yewal.

¹⁷'Ma yok kwal poliwiskya in ilwikak wan in mochtal, yewal amo kitsakwiliskya pa mo'ashiltiskya mochi sesen tapahwil pa nitanawatilMoshé.

Yehshwa tamashtiyaya ka masewalme yehwante tasiyawatilme wan takawalme

(Mt. 19:1-12; Mk. 10:1-12)

¹⁸'Ta se kitohtok nisiwa wan mosiyawat inak okse siwat, in takawal kichiwilitik ta'htakoliste; wan akyewal inak mosiyawati in siwat takawal, niyok kichiptik ta'htakoliste.

In takat tapiyaya miyak ka tomi wan Lásaros

¹⁹'Katka se takat yewal tapiyaya miyak ka tomi, motakemiltiyaya ka shashalme morado kwahkwalme, wan

hanse tonatim kichiwaya mitotiliste ka miyak takwaliste yewal monamakaya ka miyak tomi. ²⁰Wan katka se yewal amoten kipiwaya yewal itoka Lásaros, kipiwaya sawat pitsintikatka pa nikwerpo yowatiya pa nitatapoli kaha kalakiyaya yewal kipiwaya miyak tomi. ²¹Wan kinekiskya pachiwiskya ka yewal wetsiyaya itsinta kaha takwaya in takat yewal kipiwaya miyak tomi; ma yok walaloya chichim wan kipahpaloloya sawat pitisintikatka. ²²Kwakin o'as in tonat omik in takat amoten kipiwaya, wan nitana-watilanhelme kiwikak pa in takpakllwikak ka AbRaham. Takwitap omik niyok yewal kipiwaya miyak tomi wan kitapachok. ²³Kwakin yewal kipiwaya miyak tomi katka pa in amoSéwiTeshoshte, ipanta se takokoliste otachi pa takpak wan ompa wEhka okit AbRaham, wan Lásaros katka inak yewal. ²⁴Wan in takat yewal tapiyaya miyak tsatsi: “Tats AbRaham, shikpi ta'ihniliste ka newal, shiktake Lásaros pa kipaltilis tipit nidedo ka at pa ki'istiyaltis nolengwa; kampa in amoSéwiTeshoshte nishkokoltitik.” ²⁵Wan AbRaham, kili: “Nokon shikilnamik yewal, pa kimani tiyoltikatka, tewal tiktenamiki in mochiten titapiyaya, wan Lásaros kitenamikiyaya takokoliste. Ma yok ashka nika yewal kitenamiki yolsekiste, wan tewal tiktenamiki takokoliste. ²⁶Wan pa mochi in, onka se tashelol wehkat patawak ipanta amo kipi tamiliste ika tehwan wan anmehwan; ma yok aki kineki panos nika kaha kat anmehwan, amokwal anpanoske, niyok amokwal walpanoske ompa pa nitek.” ²⁷Kwakin yewal kipiwaya miyak ka tomi kito: “Tats, nimishtahtani shiktitan Lásaros pa nikal notats, ²⁸kampa nikipi makwil nonoh-niwan, ma kintakichil, pa amoyok kichiptyaske in ten amokwal pa amo walaske yehwan niyok panoske takokoliste.” ²⁹AbRaham kito: “Yehwan kipiwal Moshé wan in Taketsalme nitahtolmeDyos ma kinkakik!” ³⁰Wan in takat yewal kipiwaya miyak tomi kito: “Amo kichiwaska, tats AbRaham, ma yok ta se ika in mihmihke ya ka yehwan, haha kikwepaske ininyolme ka Dyos.” ³¹Ma yok AbRaham kili: “Ta ayamo kikakil Moshé wan in Taketsalme nitahtolmeDyos, niyok amo taneltokaloskya, ta se omokets yewal omik wan yoliskya.”

Tikinchiwilil ta'ihnakoliste

(Mt. 18:6-7, 21-22; Mk. 9:42)

17 ¹Yehshwa kinmili nimonestililme:
—Amokwal mokishtiliske tatsoshtowiliste ka ta'ih-
takoliste ma yok kina kiyas se takat; ta okichi se ta'ihnakoliste

pa oksek! ²Ma yok yeskya kwal pa ki'lpiloskya se metatWe pa nikich, in kitasaloskya ipanta we'atTemtik yewal pa kichiwas-
skya se ta'htakoliste ka se in tihtipichim. ³Yok shimokwitawik.

⁴Ta anmonohni kichi ta'htakoliste ika tewal, shikahwa; wan ta kikwep niyol ka Dyos, shikihnil. ⁴Ta pa se tonat kichi chikome ta'htakoliste ika tewal, wan walmokwep chikome as ka tewal pa in se tonat wan michili: "Nihkweptik noyol ka Dyos", shikihnil.

Shitishmakawalti totaneltokaliste

⁵In tatitanilme kilik in TATS:

—Shitishmakawalti totaneltokaliste.

⁶Kwakin in TATS kinmili:

—Ta anmehwante ankipiyaloskya taneltokaliste, kina se nishinashte mostasa, kwal katka pa ankililoskya in kwawitMora: "Shimowihwit wan shimotok ipanta in we'atTemtik", wan kichiwaskya yok kina kilik.

Yehshwa kinmili ten kipi pa kichivas se tikipanol kwal

⁷Ta se ka anmehwante ankipiyal se tikipanol ta'araro kinkwitawi yolikilme, ma yok kimani yewal walmokwep pa in tashosholtik kili: "Shipan wan shimotal kaha takwal"? ⁸Amo, ma yok kili: "Shinishtayokshital pa nitakwas, wan shikhem moshashal kwahkwal pa tishkishtilis takwaliste kimani newal nitakwas wan nitakonis. Takwitap kwakin titakwas wan titakonis tewal." ⁹Wan kimakal tashtawiliste in tikipanol pa okichi in ten kitakewak? ¹⁰Yok niyok anmehwante, kimani anki-chiwaske mochiten anmishtakewaske, shikitok: "Titekipuanolme tihmatil tikchiwal, hanwel ten tishtakewal ka totikipanoliste."

Matahti kat tapohpowalme ka in takokoliste itok lepra

¹¹Pa ni'ot pa Yerushalém Yehshwa, opan ika Samarya wan Galileya. ¹²Kwah kalaktiyaya pa se ranchit, kikisak 10 takam ka kokoliste itok lepra, yehwante mokawak pa wEhka ka yewal ¹³wan ka wehwe tahtolme kililoya:

—Yehshwa, tamashtini, shitishihnil tehwane!

¹⁴Kimani yewal okinmit, kinmili:

—Shiyak wan shimoneshtik ika in totatsim.

Wan kimani yehwante yaloya, pa ot mokawak tapohpowalme ka in takokoliste. ¹⁵Kwakin se ka yehwante,

kwah okit kampa katka tapahtil, walmokwep, kitotiwalaya tah-
tolme wehwe pa Dyos ka wehwe. ¹⁶Wan omotankwakets i'ishpa
Yehshwa, o'as nishayak pa tal, wan okimak tashtawiliste. In
takat otakat pa Samarya. ¹⁷Yehshwa kito:

—Amo katkaloya matahti yehwante oyek tapohpowalme
ka in takokoliste? Kaha kat in oksek chiknawi? ¹⁸Amo oye
akyewal pa walmokwepaskya wan kiliskya tahtolme wehwe pa
Dyos hanwel in takat yewal mochanti pa okse tal?

¹⁹Wan in samariteko kili:

—Shimokets wan shiyapti; motaneltokaliste mishpahti.

Kimani walas nireynarolisteDyos

(Mt. 24:23-28, 36-41)

²⁰Kimani in parisheyo' kitahtanilik kimani walaskya
nireynarolisteDyos, yewal kinnankili:

—NireynarolisteDyos amo walas ka tanawatiliste. ²¹Amo
kitoske: “Nika onka”, “Nepa onka”; kampa nireynarolisteDyos
onka itsala anmehwante.

²²Nimoneshtililme kinmili:

—Ases in tonat kimani anmehwante ankinekiske ankitaske
in se tonat yewal NitakaTakpakIlwikak walmokwepas, wan
amo ankitaske. ²³Anmichiliske: “Nika onka”, “Nepa onka.” Ma
yok amo shiyak, amo shikintokak. ²⁴Kampa yok kina tapitani
kitawili in takpakIlwikak pa se wan okse analko, yok niyok yes
in tonat ka NitakaTakpakIlwikak kwah walmokwepas. ²⁵Ma
yok ta'ishpa monek moyokoltis miyak, wan yes ta'ihyal ka in
masewalme yehwante ashka yoltikat pa in tonatim. ²⁶Yok kina
opan pa in tonatim ka No'á, yok niyok panos pa in tonatim ka
nitakaTakpakIlwikak. ²⁷In masewalme takwaloya wan tako-
niloya, wan monamiktiloya wan temakaloya ininpilwaSiwam
pa monamiktiloskya, o'as in tonat kampa No'á okalak pa arka
kwakin owal tapakyawiliste wan kinshitin moshte. ²⁸Yok
niyok opan pa in tonatim ka Lot: in masewalme takwaloya
wan takoniloya, takowaloya wan tanamakaloya, tataliloya
wan kalchiwaloya kalme; ²⁹kimani Lot okis pa in Wepweblo
Sodoma, kyawiyaya pa in takpakIlwikak teshoshte wan asu-
fre, wan kinshitin moshte. ³⁰Yok yes pa in tonat kimani
NitakaTakpakIlwikak moneshti.

³¹'Pa in tonat, akyewal yes ikpa nikal, wan kipiayas in
myak tapiyalme pa icha, yewal amo temos pa konanas; wan

yewal aki yes pa tashosholtik, yewal amo mokwepas pa icha. ³²Shikilnamikik nisiwa Lot. ³³In akyewal kinakis kikwitawis niyoliliste, kipolos; wan mochi akyewal kipolos, niyoliliste mokishtilis niyoliliste.

³⁴'Newal annimichilis kampa pa in yowal ta omente kat pa se tapeshte; se ka yehwante yes takishtilil wan in okse yes takawal. ³⁵Ta omente siwam testikat; se ka yehwante yes takishtilil wan in okse yes takawal. ³⁶Ta omente kat pa tashosholtik; se ka yehwante yes takishtilil wan in okse yes takawal.

³⁷Kwakin kitahtanilil:

—Kaha motachiwas in, TATS?

Kinnankili:

—Kampa yes se mihki, ompa monichikol tsopilom.

**Se tapowaliste ika in siwat mihki nitaka
wan in tatakewan amokwal**

18 ¹Yehshwa kinpowili se tapowaliste, pa amo shimosyawiltik pa kitahtoltitiyaske Dyos, amo shimomakawaltik pa tahtaniliste. ²Kinmili:

—Katka pa se Wepweblo se hwes amo kimawishtiliyaya Dyos, niyok amo'ak kimawishtiliyaya. ³Pa in Wepweblo katka niyok se siwat mihki nitaka, yewal yawiya ka in hwes wan kitahtaniyaya shinishpale pa niktanilis ika yewal nishkokoli. ⁴Opan sek tonatim wan in hwes amo ki'ihit, ma yok tamat: “Hanwel amo nihmawishtili Dyos niyok amo'ak nihmawishtili, ⁵in siwat mihki nitaka amo nishmakawaltis, nikpalewis pa yahmo walatiyas kampa nisiyawiltitik.”

⁶Kwakin kito in TATS:

—Shihkakik kina kito in hwes amokwal. ⁷Ma yok hanwel aso Dyos amo kinpalewis niyok yehwante nita'onanilme, kampa kitahtoltil yewal pa tahka wan pa tayo? Wehkawas pa kinankilis? ⁸Annimichilis kampa ankinpalewis haniman. Ma yok kimani NitakaTakpakIlwikak walas, kitas taneltokaliste pa in tal?

**Tapowaliste ka parisheyo wan tahtanilo
miyak tapishkalisteTomi**

⁹Yehshwa kipowaya in okse tapowaliste, pa sek yewal iselte moneltokaloya kina kwahkwalm wan kinihyaloya in oksek. Kito:

¹⁰—Omente takam oyak tyopWe kitahtoltiloya Dyos: yewal se katka parisheyo, wan in okse katka tapishkalisteTomi. ¹¹In parisheyo, moketstikatka, yok kitahtolliyaya: “Ooh Dyos, nimishmak tashawiliste kampa newal amoyok nimomat kina in oksek, yewal katka ta'ishtikiyanilme, takokolilme wan kinkwamanal ininsiwam ka oksek siwam; niyok amoyok kina in nitapishkalisteTomi. ¹²Nimosa ohpa pa in chikome tonatim, wan nitemak matahti pa sesen tahko pa mochi kishki niktani.” ¹³Ma yok in nitapishkalisteTomi pa wEhka amo mochikawaya ki'ahkokiskya nishtololwam pa takpakIlwikak, hanwel kitehtewiyaya nipecho wan kitowaya: “Ooh Dyos ka newal, shikpi ta'ihniliste ka newal, kampa newal nita'htakoliste!” ¹⁴Newal annimichilis kampa in omokwep icha ka ta'ihniliste, wan in okse ayak kampa mochi sesen in we tamatilme ka in oksek yes amo wetanotsal in yewal aki mopinawilti isel yes wetanotsal.

Yehshwa kinmashti inik piltontim

(Mt. 19:13-15; Mk. 10:13-16)

¹⁵In masewalme kiwikililoya piltontim yehshwa, kampa yewal kintaliliskya nimahwam; kimani nimonestililme okitak in, kinahwaloya. ¹⁶Ma yok Yehshwa okinnots wan kinmili:

—Shikinmakawak in piltontim ma walak ka newal, amo shikintsakwilik; kampa nireynaroliste in takpakIlwikak in yewal yok nesil kina yehwante. ¹⁷Melak annimichilis, aki amo kinamikis nireynarolisteDyos kina se piltonte, amo kalakis pa yewal.

Se takatYankwik yewal kipiyya miyak tomi

taketsaya inak Yehshwa

(Mt. 19:16-30; Mk. 10:17-31)

¹⁸Se takat wemonotsaya kitahtanili Yehshwa:

—Tamashtini kwal, ten monek pa nikchiwas pa yok nikpiyas noyoliliste yewal amoTamis?

¹⁹Yehshwa kili:

—Pates tinichili kampa newal nikwal? Amo'ak se yok onka kwal, han Dyos. ²⁰Tikinmat kina mo'ito pa nitahtolmeDyos: “Amo shikonan se siwat tasiyawatil; amo shitamikti; amo shita'ishtikti; amo shitaketsti ten amo tikit; shiktasot motats wan monantsi.”

²¹In takat kito:

—Mochi in nihneltokatiwal pa kimani nikatka nipiltonte.



© 1996 David C. Cook

*Se takatYankwik ka miyak tomi kitah-
tanili Yehshwa (Lukas 18:23)*

²² Kwah okikak in, Yehshwa kili:

—Hanwel mishteshmonek se tachiwal: shiknamak mochten tikpi wan shikinmak in amoten kipiwal, yok tikpiyas tashtawiliste pa in takpakIlwikak; kwah pano in shiwal wan shinishtok.

²³ Kimani yewal takat kikak in, moka moyokoltiti, kampa tapiyaya miyak pa mochten wan miyak tomi. ²⁴ Wan kimani okit Yehshwa kampa moyokoltitikat kaya miyak, kito:

—Kina hyero amokwal se takat yewal kipi miyak tomi yewal kalakis ka nireynarolisteDyos! ²⁵ Kwal panos se kameyo pa se nishtolol tatsomal, kampa se yewal kipi miyak tomi pa kalakiskya ka nireynarolisteDyos.

²⁶ In yewal kikakik in kitoloya:

—Kwakin, ak wel mokishtilis niyoliliste?

²⁷ Wan Yehshwa kinankili:

—Mochiten amokwal pa takam, ma yok kwal kichiwas mochten Dyos.

²⁸ Kwakin Petros kito:

—Tehwante tihkawak mochten titapiyal, wan timishtokak.

²⁹ Wan Yehshwa kinmili:

—Melawak annimichilis, akyewal okinka nikal, nitahwan, ninohniwan, nisiwa, ininpilwam, ka nireynaroliste Dyos, ³⁰kitenamikis miyak pa in tonatim wan pa in tonatim yewal walal; kipiya yoliliste yewal amo Tamis.

Oksep Yehshwa kinnawati nimikiliste

(Mt. 20:17-19; Mk. 10:32-34)

³¹Yehshwa okinnots oksela in 12, wan kinmili:

—Ashka ma yatiyak pa in ot Yerushalém, ompa mota-chiwas mochi yewal in Taketsalme nitahtolme Dyos kikwihkwilok ika in Nitaka Takpak Ilwikak. ³²Ina yes tatemakal ka in amo yudiyó, yehwante kiwetskiliske yewal, in hyero kichiwiliske wan kichihchaske. ³³Kwah tamiske kiwetekiske, kimiktiske; pa kwah panoske yey tonatim yolis oksep.

³⁴Yehwante amo kimatik kikakik amoten in, kampa in tanawatiliste amokwal kimatilo ya kikakiloya.

Se amo tachiyaya pa Yerikó otachi oksep

(Mt. 20:29-34; Mk. 10:46-52)

³⁵Kimani Yehshwa katka pa asiskya pa Yerikó, pa in ot yowatikatka se yewal tahtaniyaya tomi amo tachiyaya. ³⁶Kwah kinkakiyaya in amo tachiyaya kampa panoloya masewalme, otahtan ten panotikatka. ³⁷Wan kimani kililoya kampa Yehshwa nasareteko panowaya ompa. ³⁸Okipewalti tsatsiliste:

—Yehshwa, Nikon Dawid, shinishihnil newal!

³⁹Yehwante yaloya ta'ishpa ki'ahwaloya pa amo nawatitiyaskya, ma yok yewal wehwe tsatsiyaya:

—Nikon Dawid, shinishihnil newal!

⁴⁰Kwakin Yehshwa omokets wan otatake pa kiwikiloskya ka yewal. Kimani in amo tachi o'as, Yehshwa kitahtanili:

⁴¹—Ten tihnek pa nikchiwas pa tewal?

Wan in amo tachiyaya kinankili:

—TATS, nihnek pa nikpiyas tachiyaliste.

⁴²Yehshwa kili:

—Ashka tihnamiktik! Motaneltokaliste mishpahti.

⁴³Haniman in amo tachiyaya opahti nishtololwam, wan hani okitok Yehshwa, kilitiyaya wehwe tahtolme Dyos. Wan kimani kitaloya moshte in masewalme in ten panowaya, niyok kililoya tahtolme wehwe pa Dyos.

Yehshwa wan Sakayos

19 ¹Yehshwa okalak pa Yerikó wan panowaya in Wepweblo, ²kimani nehnemiyaya se takat yewal ka miyak tomi, itoka Sakayos, yewal katka wetatakewan tapishkalisteTomi, ³kitemowaya pa kitaskya akyewal katka Yehshwa. Ma yok amokwal kitaskya kampa myak masewalme katkaloya kampa yewal amo weyak katka. ⁴Haniman motaloti ta'ishpa, wan pa kitaskya, tehko pa se kwawitMora' kampa Yehshwa kan panoskya. ⁵Kimani Yehshwa o'as ompa, otachi takpak wan kili:

—Sakayos, shimo'isiwilti wan shitem ompa, kampa ashka nikpi pa nipanos in yowal pa mo'icha.

⁶Sakayos mo'isiwilti otem, wan ka miyak pakiliste okitenamik Yehshwa. ⁷Moshte kwah kitak in, kitaketsaloya, kampa kitoloya yewal Yehshwa okalakiya pa in kal ka se takatsawiliste. ⁸In Sakayos omokets wan kili in TATS:

—TATS, nitemakas ashka haniman tahko ka mochi in ten nitapi ka notomi ka in amoten kipiya; wan ta pek ten amokwal onikchi pa ak, nihkwepilis nawi pa sesen yewal onikinishtikil.

⁹Yehshwa kili:

—Ashka in o'as takishtiliste ka toyoliliste pa in kal, kampa in takat niyok nikon in AbRaham. ¹⁰Kampa yewal NitakaTakpakIlwihak owal okitem wan tishwalikilis takishtiliste ka toyoliliste yewal mopolowaya.

Tapowaliste ka in matahti tikipanolme

(Mt. 25:14-30)

¹¹Kwah kikakik masewalme in mochten, Yehshwa kinpowili se tapowaliste, kampa astiyaloya pa Yerushalém wan in masewalme tamatiloya kampa nireynarolisteDyos katkaya pa moneshtiskya. ¹²Yehshwa kinmili:

—Se takat wetatakewan, oy pa se tal wEhka pa kitenamikiskya se reynaroliste wan hani walmokwepaskya. ¹³Kwah ayamo kisaya, okinnots pa walaloskya matahti inintikipanolme, okinmak miyak tomi sesen, wan kinmili: “Shitanamakak wan shitakowak ka in tomi pa kimani newal niwalmokwepas.” ¹⁴Ma yok in masewalme yehwante ompa mochantiloya pa nimochiTalwe ki'ihyaloya, wan kintitanik sek ka yewal pa kililoskya: “Amo tihnekil in se pa reynaros ipa tehwante.” ¹⁵Kwah in wetatakewan kitenamik in reynaroliste, wan kimani walmokwep, okinnots in inintikipanolme yehwante kinmakaya in tomi, pa kimatiskya ten tikipanoliste

kichiwaloya ka in tomi pa sesen. ¹⁶Kimani o'as in se ta'ishpa kito: "Tats, motomi momiyapti pa matahti pa mochi sesen." ¹⁷In weRey kito: "Kwal onka; tewel tihmat titikipano kwal; han pa tipit tik-chi kwal, tiyes wetatakewan pa matahti Wehwepwablo.'" ¹⁸Okse owal tikipanol wan kili: "Tats, motomi momiyaktik makwil pa sesen." ¹⁹Wan niyok in kili: Tewel tiyes wetatakewalme pa in makwil Wepwablo.'" ²⁰O'as okse wan kili: "Tats, nika onka motomi. Onikahkoki pa se shashal; ²¹kampa nimishmakas tewel, kampa nihmat tewel titakat chikawak, yewal tikonan in ten amo ka tewel wan tikpishka in yewal ten amo tiktok." ²²Kwakin in weRey kili: "Tikipanolo amokwal, ka mosel motahtolme nimishteshpawilis. Ta tihmatiya yewal ninewal se takat chikawak, yewal nikanan in ten amo ka newal wan yewal nikpishka in ten amo niktok, ²³pates amo otiktal notomi kaha ki'ahkokil moshte tomi, yok pa kima-ni niwalmokwepaskya niktenamikiskya yewal momiyaptiskya notomi?" ²⁴Kwakin kinmili yehwante ompa katkaloya: "Shihkish-tilik tomi, wan shihmakak in se yewal kimiyapti matahti tomi pa mochi sesen." ²⁵Yehwante kilik: "Tats, yewal kipi miyak tomi." ²⁶In weRey kito: "Annimichilis, akyewal kipi, kimakal miyak; wan yewal amo kipi, in yewal tipit kipi kikishtilil. ²⁷Wan in nishkokolil, in amo kinekiloya yewal newal niyeskya ininreynaroliste, shikin-walikak, wan shikinmiktik pa no'ishpa!"

Yehshwa okalak pa Yerushalém

(Mt. 21:1-11; Mk. 11:1-11; Yh. 12:12-19)

²⁸Kwah otam okit in, Yehshwa okonan ni'ot pa Yerushalém. ²⁹Kwah astiyaya ompa BetPagé wan pa BetAnyá, ika in tepetLom itok Oliwo', okintake ome nimonestililme, ³⁰kinmili: —Shiyak pa in ranchit yewal onka pa mo'ishpa, anmehwante kwah ankalakiske ankitaske se burroyankwik, ipa yewal ayamo'ak motali. Shiktomak wan shihwalikak nika. ³¹Ta ak anmishtahtanili Pates ankitomtikat, shitanankilik kampa in TATS kiteshmonek. ³²In nimonestililme oyak, wan okitak mochi kina okinmil. ³³Kimani kitomtikatkaloya in burroyankwik, in aki yehwante ininburro katka kinmilik: —Pates kitomtikat? ³⁴Wan yehwante kinankilik: —Kampa in TATS kiteshmonek. ³⁵Kwakin haniman kiwikilik Yehshwa, kintalilik inintakemtel ipa in burroyankwik wan kichiwak pa motaliskya

Yehshwa. ³⁶Kina Yehshwa yawiya, in masewalme kinsowaloya inintakemtel pa otim. ³⁷Kimani astiyaya pa temoskya pa in tepetLom itok Oliwos, moshte nimonestililme okipewaltik tsa-tsiliste ka pakiliste wan kililoya wehwe tahtolme Dyos pa kishki in taneshtiliste yewal kitaloya. ³⁸Wan kitoloya:

—Ma kimashtik in Rey yewal wal ka ni'itokaliste in TATS! Ma yes sewiliste pa in ilwikak, wan tawiliste pa in takpakIlwikak!

³⁹Sek ka in parisheyo' yaloya ika in masewalme kilik:

—Tamashtini, shikinahwa momoneshtililme.

⁴⁰Kwakin Yehshwa kinmili:



© 1996 David C. Cook

Kalakiya Yehshwa pa Yerushalém (Lukas 19:38)

—Ta in amo nawatitiyaloskya, in tetelme tsatsiloskya.

⁴¹Astiyaloya pa in Wepweblo' Yerushalém, Yehshwa ochok kimani okit, ⁴²wan kito:

—Ta pa in tonat tewel niyok tihmatiskya tihkakiskya, ten mishmakaskya sewiliste! Ma yok ashka yewal onka tatitik wan amokwal tikitas. ⁴³Kampa walaske ipa tewel tonatim, kimani yehwante mishkokolil kiketsaske se tatsakwal ka tetelme, wan mishyawaloske wan mishtsakwiliske pa kaha han, ⁴⁴wan mishshitiniske mochi. Kinmiktiske kishki ompa mochantilme, wan amo kikawaske pa tewel se tet ipa okse; kampa amo otikishmat pa kimani in yewal Dyos owal omishpashal.

Chipawaliste in tyopWe

(Mt. 21:12-17; Mk. 11:15-19; Yh. 2:13-22)

⁴⁵Kwakin Yehshwa okalak pa in tyopWe wan okipewalti takishtiliste ompa pa moshte kishki tanamakaloya wan takowaloya, ⁴⁶Wan kinmiliyaya:

—In takwihkwilol kito: “Nokal in kal kampa kitahtaniske Dyos”; Anmehwante ankichiwak se kweba ka ta'ishtikiyanilme.



© 1996 David C. Cook

Yehshwa kinkishti in tanamakaloya pa in tyopWe (Lukas 19:46)

⁴⁷Mochi inik tonatim Yehshwa tamashtiyaya pa tyopWe, wan in TotatsimWehwe wan Tamashtinilme NitanawatilMoshé, wan in wehwetatakewalme ka masewalme, kitemoloya kina kimiktiloskya. ⁴⁸Ma yok amo kitaloya kina kichiwaloskya, kampa moshte masewalme kikaktikatkaloya, in ten yewal kitowaya.

Niwetatakewan Yehshwa

(Mt. 21:23-27; Mk. 11:27-33)

20 ¹Pa se tonat kimani Yehshwa katka pa tyopWe kinmashtiyaya masewalme wan kinnawatiyaya tamashtilisteKwal, o'asik in TotatsimWehwe wan Tamashtinilme NitanawatilMoshé, inak Abwelolme Wehwetsim, ²wan kitahtanilik:

—Pa ten nitatakewaliste tikchiptik tachiwaliste in. Wan ak mishmak tatakewaliste?

³Yehshwa kinmili:

—Newal niyok annimishtahtanilis se tahtoliste.

Shinishnankilik: ⁴In takwatikiliste ka Yuhanes? Katka pa in takpakIlwikak, katka pa in mochital?

⁵Yehwante walmo'ahwak ika iselte:

—Ta tikitok yewal katka pa in takpakIlwikak, tichilis: “Kwakin pates amo ankineltokak?” ⁶Wan ta tikitok katka pa in masewalme, mochi in masewalme tishmiktiske ka tetelme, kampa kimatil Yuhanes katka se niTaketsal nitahtolDyos.

⁷Wan tanankilik kampa amo kimatiloya akyewal kiwaltitaniya Yuhanes takwateki. ⁸Kwakin Yehshwa kinmili:

—Newal niyok amo annimichilis ka ak nitatakewaliste nikchi in mochiten.

In tikipanolme amokwahkwalme

(Mt. 21:33-44; Mk. 12:1-11)

⁹Kwakin okipewalti se taketsaliste ka in masewalme, wan kinmili in tapowaliste:

—Se takat okitok se kwahmilUba, okintane pa kimakaloskya nitaki tahko sek takam tikipanolme wan panoti wehka pa miyak tonatim. ¹⁰Kwah o'as in tonatim ka nitapishkaliste uba, okititan se ka inintikipanolge pa yok in yewal kintaniwiyyaya pa kimakaloskya nitahko tapishkaliste uba, ma yok in takam kiwehwetikik wan yok kitetanik ka amoten. ¹¹Oksep okititan okse nitikipanol; wan yehwante kiwehwetikik, wan hyero

kilitinemil niyok wan kikwepak ka amoten. ¹²Oksep okitetan, in katka pa yey nitikipanol niyok in kikokoltik wan kikishtik pa kiyawak.

¹³Kwakin in tats nikwahmilUba kito: “Ten nikchiwas? Niktitanes nokon yewal niktatsot miyak hanwel kimani kitaske, kimawishtiliske.” ¹⁴Kimani in takam tikipanolme okitak, mo'ilik sek ka oksek: “In yewal motakawilis mochiten; ma tihmiktik pa timotakawiliske in mochiten.” ¹⁵Yok yewal kikishtik pa in kwahmilUba wan kimiktik.

Kwakin Yehshwa okintahtanil:

—Ten antamatil anmehwante pa kichiwas in tats nikwahmilUba ka yehwante? ¹⁶Yok yas wan kimiktis in takam tikipanolme, wan kinmakas nikwahmilUba oksek.

Kwah kikakik in, in masewalme kitoloya:

—Ma amo'ik Dyos tishmakawiltiskya!

¹⁷Wan Yehshwa kinmitaya, kinmili:

—Ten kinek kito in takwihkwilol? Yewal kito:

In tet kitasaloya yehwante kichiptikatkaloya in kal, ma yok in tet omochi nitsontek mochi in kal.

¹⁸Moshte kishki wetsiske ipa in tet, tahtapaniske, wan ta in tet wetsiskya ipa ak, kipitsiniskya mochi.

NitapishkalisteTomi ka tashtawiliste

(Mt. 21:45-46; 22:15-22; Mk. 12:12-17)

¹⁹Pa haniman in TotatsimWehwe wan in Tamashtinilme NitanaawatilMoshé kinekiloya kikitskiloskya, kampa kimatiloya kikakiloya in taketsaliste ka in tapowaliste Yehshwa kitowaya ka yehwante; ma yok kinmakasiloya masewalme. ²⁰Kwakin kintitanik sek pa ta'ispiyaroloskya nesiloya kina masewalme kwahkwalmelme, pa kikwamanaloskya wan yok kikitskiloskya Yehshwa ka nitahtolme wan yok kwal kitsakwaloskya ka nichikawaliste wan nitatakewaliste in wetatakewan Romano. ²¹In yaloya ta'ispiyaroloya kitahtanilik:

—Tamashtini, tihmatil kampa tikito wan titamashti melawak, wan moshte kwal tikintasok, hanwel melawak wan amo tikinmitatias kina nestiyaske takam, yok kampa melak titanishtili ni'otim Dyos ka melawaliste. ²²Ma yok kwal pa tik-tashtawiliske in Kaysar nitapishkalisteTomi, amo ayak?

²³Yehshwa kimatiya kampa yehwante kinekiloya kikwahkwamanaloskya, wan kinmili:

—Pates annishkwamantikat? ²⁴Shinishneshtilik se tomi. Ak nitakopinal onka pa in tomi, wan in ni'itokaliste yewal nika onka tapahwil?

Yehwante kinankilik:

—In Kaysar.

²⁵Kwakin Yehshwa kinmili:

—Shihmakak Kaysar in ten yewal ka Kaysar, wan shihmakak Dyos in ten yewal ka Dyos.

²⁶Yok yewal amo kikishtilik se tahtol amokwal ka in ten kitowaya pa ininishpa masewalme; pa se tahtoliste, wan motapololtiloya kina tanankiliyaya amoten kitoloya.

Nitahtaniliste kina oksep yolis

(Mt. 22:23-33; Mk. 12:18-27)

²⁷Takwitapit, sek saduseos ki'asik Yehshwa, kitoloya kampa amo onka yoliliste oksep; yok kitahtanilik Yehshwa:

²⁸—Tamashtini, Moshé tishtapahwil ta ninohni pek ak kipi nisiwa wan miki amo okika nikon, in ninohni yewal omik kipi pa monamiktis inak nisiwa katka in nitaka mihki wan kimakas ininpilwam in ninohni mihki. ²⁹Katkaloya chikome ninohniwan. Wan in otakat ta'ishpa ka yehwante omonamikti, wan omik amo okinpi ininpilwam. ³⁰In ninohni takwitapit niyok okonan in siwat mihki nitaka, wan niyok omik amo okinpi ininpilwam. ³¹Ka in yey ninohni niyok omonamikti inak yewal, wan yok moshte in chikome omikik amo kinkawak ininpilwam. ³²Panok tonatim niyok omik in siwat. ³³Yok yewal, in walyololiske oksep, ak nisiwa ka yehwante yes, kampa moshte in chikome takam yek ininsiwam?

³⁴Kwakin Yehshwa kinmili:

—In masewalme pa mochi kishki tal, monamiktal wan temakal pa monamiktiske. ³⁵Ma yok kimani tamis in mochi kishki tal wan ashka onka amo monamiktiske yehwante wan Dyos kintahtoltis pa yoliske oksep, aki yewal ki'onanas kampa yewal onka pa in ilwikak amo monamiktis wan amo temakas pa monamiktis, ³⁶kampa amokwal mikiske. Hanwel yeske kina nitanawatilanelme, yehwante kat ininpilwam Dyos in yolil oksep. ³⁷Kampa isel Moshé pa in takwihkwilol ka in kwawitWiste tatatitikatka, tishmashti kampa in mihmihki yoliske oksep. Ompa kito kampa in TATS, niDyos AbRaham, niDyos Itsak wan niDyos Yakob. ³⁸Kampa Dyos amo iniDyos

mihmihki, hanwel ininDyos yohyolke; kampa pa yewal moshte yolil.

³⁹Sek ka in Tamashtinilme NitanaawatilMoshé kinankilik:
—Tamashtini, kwal tikito.

⁴⁰Wan amo'ak mochikawaya pa kitahtanililoskya amoten.

Akyewal nikon in Kristo?

(Mt. 22:41-46; Mk. 12:35-37)

⁴¹Kwakin yewal kinmili:

—Katka yewal kitol yewal in Kristo nikon Dawid? ⁴²Dawid isel kito, pa in amat ka Salmos:

In TATS kili noTATS:

“Shimotal pa nomahwakwal,

⁴³pa kimani newal nikintalis mo'ikshiwam pa moshte kishki mishkokolil ipa yehwante tinehnemis.”

⁴⁴Wan ta Dawid okinots TATS, kina kwakin yewal nikon?

Yeshwa kinteshpawiliyaya Tamashtinilme NitanaawatilMoshé

(Mt. 23:1-36; Mk. 12:38-40; Lk. 11:37-54)

⁴⁵Kina moshte in masewalme kikaktikatkaloya, Yeshwa kinmili nimonestililme:

⁴⁶—Shimokwitawik ka Tamashtinilme NitanaawatilMoshé, kampa kwal kintamashti nehnemtiyaske ka inintakemtel wehweyak, wan kinemtiyaske kintahpaloske ka tamawishtiliste pa in plasa', kitemol pa motaliske ta'ishpa pa in siya' pa in tyopalmeYudiyo' wan kaha motalilme in wehwe monotsalme pa takwaliste. ⁴⁷Kinkishtilil nikalme siwam mihmihki inintaka, mokwamanal ka tahtaniliste Dyos ka myak tahtolme. Yehwante kinmakas hyero we takokoliste Dyos.

Nitemakaliste in siwat mihki nitaka

(Mk. 12:41-44)

21 ¹Yeshwa kinmitatikatka in tapiyalme myak mochi-ten ka miyak tomi kitaliloya temakaliste pa komim pa in tyopWe. ²Wan okit niyok se siwat mihki nitaka amoten kipiyya kitasaya ome tomitonte^p tipichim; ³Kwakin kito:

—Melak annimichilis, in siwat nitaka mihki, amoten kipiyya otemak miyak amoyok kina in oksek; ⁴Kampa moshte

P 21:2 “Tomitonte” in kinek kito se tomi moshelo tahko wan in nitahko temaka okse nitahko.

yehwante temakaloya pa Dyos in amo kinteshmonekya kampa kipiyaloya miyak; in siwat nitaka mihki, amoten kipiyya, otemak mochi yewal kishki ka yoliskya.

Yehshwa kinmili kina kishitiniske tyopWe

(Mt. 24:1-2; Mk. 13:1-2)

⁵Sek taketstikatkaloya kina kwal nesiloya tetelme ika yewal tachiwal katka in tyopWe, wan in mochiten temakaloya kwal nesiloya kisaloloya pa tepante. Kwakin Yehshwa kinmili:

⁶—In kishki anmehwante in ten ankitatikat walal in tonatim yewal amoten mokawas se tet ipa okse tet; mochi yes tashitinil.

Taneshtiliste kwah tamis in mochiten

(Mt. 24:3-28; Mk. 13:3-23)

⁷Kwakin kitahtanilik:

—Tamashtini, kimani yok motachiwas? Ten taneshtiliste yes kimani yok walmotachiptiwalas? ⁸Yehshwa kinnankili:

—Shimokwitawik pa amo anmishkwamanaske. Kampa myak walaske ka no'itokaliste wan kitotiwalaske: “Newal ninewal niKristo”; wan niyok: “O'as in tonat”; anmehwante amo shikintokak. ⁹Wan kimani antakakiske antakestiyaske kampa anmomiktitiyaske wan anmo'onanaske pa anmomiktiske, amo shimomaptitiyak; kampa yok monek pa motachiwas ta'ishpa, wan ayamo tamis in mochital.

¹⁰Niyok kinmili:

—Kampa masewalme mo'onanaske pa kishki se tal' ika okse kishki tal, yehwante reynarotikat mo'onanaske ka okse reynaroliste. ¹¹Yeske tamolinilme hyero wehwe in tal, wan miyak mayaniliste wan hyero ta'ahwiyaliste kaha han, niyok panoske sek tachiwaliste hyero wan yeske wehwe taneshtiliste pa takpakIlwikak.

¹²'Ma yok kimani ayamo panoske inik tonatim, anmehwante anmishkitskishke anmishtokaske. Wan anmishtemakaske ka in tyopalmeYudiyo', wan in ka tatsakwalme wan ka no'itokaliste anmishwikaske ka in weReye' wan ka in wetatakewalme.

¹³Yok in anmishteshmonekis pa antemakaske taketsaliste ka newal. ¹⁴Yok amoten shitamatitiyak kina antanankiliske in ten anmishtahtaniliske, ¹⁵kampa newal annimishmakas tah-tolme wan tamatiliste pa antanankiliske kampa amo'ak ka

yehwante anmishkokolil pa amokwal anmishnankiliske pa ankitoske amoyok onka. ¹⁶Anmehwante anyeske tatemakalme ka anmotahtwan, anmonohniwan, anmoparyente wan anmonihni. Sek ka anmehwante anmishmiktiske, ¹⁷moshte anmishihyaske pa in mochital ika no'itokaliste; ¹⁸anmehwante amo ankipoloske se anmo'itso pa anmotsontek. ¹⁹Shimochiyak, yewal yok ankitaniske pa anmokishtiliske anmoyoliliste.

²⁰'Kimani ankitaske Yerushalém kiyawalotiyaske gwacho', shihmatik kampa nitashitiniliste o'as. ²¹Kwakin, in yehwante yeske pa Yudaya shicholok pa tepetLom; wan yehwante yeske pa Wepweblo shikisak ompa, in yehwante yeske pa tashosholtik amo shiwalmokwepak pa in Wepweblo. ²²Kampa inik tonatim yeske takoktiliste, kampa monamikiske mochten in yewal onka takwihkwilolme. ²³Eh kina kinyas pa in tonatim yehwante ostitikat wan tachichiltitiyaske! Kampa yes miyak tayolkokoliste ipa in tal, wan ipa in masewalme walas nikwalaniliste. ²⁴Wan sek kinmiktiske ka teposte, wan oksek yeske tawikalme tatsakwalme pa moshte Wepweblo'; wan Yerushalém yes tashitiniliste ka oksek masewalme amo yudiyo' pa kimani mo'asiske in tonatim yehwante yeske tashitinilme.

Kimani walas NitakaTakpakIlwikak

(Mt. 24:29-35, 42-44; Mk. 13:24-37)

²⁵'Kwakin yeske taneshtiliste pa in tonat, wan in meste wan in sitalme; pa in tal in masewalme hyero momaptiske wan amo kimatiske ten kichiwaske ka in takomonaliste ka in wehwe'atim kwah mo'ahkoktiyaske atim. ²⁶In masewalme ishpoyawaske ka tamaptiliste kwah tamatiske ten kipanós in pa mochi kishki tal; kampa ininpoderoliste in takpakIlwikak yeske tatseshtelolme. ²⁷Kwakin ankitaske NitakaTakpakIlwikak, walatiwalas pa ayawit ka chikawaliste wan we tawiliste. ²⁸Kimani yok walmotachiwas, shimochikawaltik wan shikahkokik anmotsontek, kampa amo wehkawaske yeske tamakawalme.

²⁹Niyok kinmili se tapowaliste:

—Shikitak in kwawitIgero, wan in moshte kwawim.

³⁰Kimani anmehwante ankital kikistiwalal ni'ishwam, ankimatil kampa amo wehkawas tonalko. ³¹Yok niyok, kimani anmehwante ankitaske in yewal mochten, ankimatiske kampa astiwalal nireynarolisteDyos.

³²'Melak annimichilis, yewal mochi in motachiwas ayamo'ok mikiske in masewalme yehwante ashka yoltikat pa in tonatim. ³³In takpakIlwikak wan in mochital panoske, ma yok notahtolme amo panoske.

³⁴'Shimokwitawik; wan amo shihmakawak anmoyol pa yes chikawak ka in ten onka pa in mochital, in tawanaliste wan amo hyero shitamatitiyak ka in ten anmishteshmonek pa in yoliliste, pa yewal in tonat amo wetsis hani ipa anmehwante ³⁵kina se trampa wetsis pa moshte yehwante mochantilme pa in mochital. ³⁶Ma yok anmehwante shitachishtiyak hanse, shiktahtoltitiyak Dyos pa mochi tonatim pa yok kwal mokishtiliske ka in mochiten panoske, wan pa moneshtiske ni'ishpa NitakaTakpakIlwikak.

³⁷Pa tahka Yehshwa kintanishtiliyaya pa in tyopWe, pa tayo mokawaya pa in tepetLom itok Oliwo'. ³⁸Wan moshte in masewalme yaloya ka yewal pa watsinko pa kikakiloskya pa in tyopWe.

Motalil pa se taketsaliste pa kimiktiske Yehshwa

(Mt. 26:1-5, 14-16; Mk. 14:1-2, 10-11; Yh. 11:45-53)

22 ¹Astiwalaya nitonat in mitotiliste yewal pan amo kipi in motaposhawalti, itok paskwa. ²In TotatsimWehwe wan in Tamashtinilme NitanawatilMoshé kitemoloya kina kimiktiloskya Yehshwa, ma yok kinmakasiloya pa in pweblo.

³Kwakin Satán okalak pa niyol Yudas, in se ka yehwante in 12, in yewal kitokayoltik IshKaryót, ⁴wan in oy otahto ka in TotatsimWehwe wan in wetatakewalme ka in gwacho', pa taketsaloskya kina kitemakaskya Yehshwa. ⁵Yehwante pakiloya miyak wan mokawak pa kimakaloskya tomi; ⁶Yudas ki'onan wan kipewalti pa kitaskya kina kwal kitemakaskya Yehshwa pa amo kimatiloskya pa in pweblo.

TyotakNitakwaliste Tats

(Mt. 26:17-29; Mk. 14:12-25; Yh. 13:21-30; 1 Ko. 11:23-26)

⁷O'as in tonat kwah kikwal yudiyo' in pan yewal amo kipi taposhawaliste, kimani moteshmonek pa yes tamiktili in borrego pa in mitotiliste itok Paskwa. ⁸Yehshwa okitetan Petros wan Yuhanes, ka in tahtolme:

—Shiyak shikyokshitik mochiten pa tikwaske pa in mitotiliste paskwa.

⁹Yehwante kitahtanilik:

—Kampa tihnek pa titayokshitiske?

¹⁰Yehshwa kinmili:

—Kwah ankalakiske pa Wepweblo, ankitaske anmehwante se takat kiwikatiyas se komit ka at. Shiktokak pa kaha kalakis pa se kal, ¹¹wan shikilik in nikaltats: “In tamashtini tahtani kaha onka in kalitik kaha nikwas in Paskwa ka nomoneshtililme?” ¹²Kwakin yewal anmishneshtilis se kalitik we pa takpak, ompa yes mochiten moteshmonek; shitayokshitik ompa.

¹³In moneshtililme oyak wan kitak mochi kina Yehshwa kinmiliyaya, wan ompa tayokshitik in paskwa. ¹⁴Kwah o'as in ora, Yehshwa omotal kaha takwal wan in tatitanilme motalik inak yewal. ¹⁵Kwakin kinmili:

—Kishki nihnekiya nitakwaskya ka anmehwante in paskwa kampa ayamo nimokokolti pa nimikis! ¹⁶Kampa newal annimichilis kampa amo oksep nitakwas pa kimani mo'ashilti pa in reynarolisteDyos.

¹⁷Wan Yehshwa okonan se tapalkatonte, otemak tashtawaliste wan kito:

—Shikonanak in wan shimotemakak tahtahko ka anmehwante; ¹⁸kampa newal annimichilis yahmo oksep nikonis nitakil in uba', pa kimani asis in tonat yewal walas nireynarolisteDyos.

¹⁹Haniman, okonan pan wan tahko kishel, kimak tashtawiliste Dyos, wan okinmak, in kitowaya:

—In nokwerpo, kampa pa anmehwante yes tatemakaliste. Shikchiwak in ka ta'ilnamikiliste newal.

²⁰Yok niyok okichi ka in tapalkatonte, kwah otam takwak pa tyotak, wan kito:

—In tapalkatonte in se taketsaliste yankwik ka noyEste, kampa pa anmehwante yes tashawilil.

²¹'In yewal nishtemakas nika onka yowatik kaha takwal inak newal. ²²Melak annimichilis in NitakaTakpakIlwikak yok kina onka takwihkwilol; ma yok kina kiyas in yewal aki kitemakas!

²³Yehwante walmotahtanilik sek ka oksek ak ka yehwante, yok mochikawaya pa kichiwaskya in.

Akyewal we monotsaskya

²⁴In nimonestililme kipiyyak ta'ahwaliste ipa ak ka yehwante yeskya in we monotsaskya. ²⁵Yehshwa kinmili:

—Pa in mochital in weReye' wan in we monotsalme takam kichiwal ka in masewalme kina ta yeloskya nipweblo, wan



© 1996 David C. Cook

TyotakNitakwaliste Tats (Lukas 22:20)

tatitanil ka tatakewaliste wan chikawaliste ipa yehwante, ma yok kat tanotsalme ninihniwan in masewalme. ²⁶Ma yok ika anmehwante amoyok yes; hanwel, in wemonotsas ika anmehwante, monek pa mochiwas kina se yewal amo wemonots; wan akyewal tatakewas, monek pa mochiwas kina se tikipanol. ²⁷Kampa akyewal wemonotsas, in yewal motali kaha takwal pa takwas, hanwel in yewal tikipanos? Hanwel amo in yewal se motalis in kaha takwal? Ma yok newal ni'onka ika anmehwante kina in tikipanol.

²⁸'Anmehwante annishtokatinemil pa in tonatim kimani nipanowaya notakokoliste. ²⁹Kampa yok, newal animishmak se reynaroliste, yok kina noTats onishmak newal, ³⁰pa yewal noreynaroliste antakwaske wan antakoniske kaha takwal, wan anmotaliske pa in siya' kaha motalil wehwetatakewalme pa kiteshpawiliske in 12 tanichikolme Isra'El.

Petros kitos amo ki'ishmat Yehshwa

(Mt. 26:31-35; Mk. 14:27-31; Yh. 13:36-38)

³¹In Tats kito niyok:

—Shimón, Shimón, shikit kampa Satán otahtan pa anmehwante yeske tatsehtselolme kina ta yeloskya kina trigo; ³²ma

yok newal nikchi tahtaniliste ka tahtoliste pa Dyos pa tewal pa amo mishteshmonekis taneltokaliste. Wan tewal, kimani tihkwepas moyol ka Dyos, shikinpale monohniwan pa hanse kipiwaske taneltokaliste.

³³Petros kili:

—TATS, amo han nihnek niyaskya ka tewal pa in tatsakwal hanwel niyok pa in tamiktiliste.

³⁴Wan Yehshwa kili:

—Petros, nimichilis yewal in gayo ayamo tsatsis ashka, pa kimani tewal tikitos sehpa wan oksep ka yeshpa kampa amo tishishmat.

As in ora kaha Yehshwa panos takokoliste

³⁵Kwakin Yehshwa kintahtanili:

—Kimani onikintitan amo kiwikaloya ininwangoch, amo kikwikaloya tomi, wan amo kikwikaloya warachim, aso kinteshmonek pekten?

Yehwante tanankilik:

—Amoten.

³⁶Kwakin Yehshwa kinmili:

—Ashka, akyewal kipiya niwangoch, ma konan inak tomi; wan aki amo kipiya niteposte, ma kinamak nishashal ma mokowil se. ³⁷Kampa newal annimichilis kampa monek pa mo'ashiltis in pa newal onka takwihkwilol: "Wan oye tapowal ika in ta'htakolme." Kampa ten onka takwihkwilol ka newal, kipi pa mo'ashiltis.

³⁸Yehwante kilik:

—TATS, nika onka ome tepostim.

Wan Yehshwa kinnankili:

—Ya kwal onka.

Yehshwa kitahtoltiti Dyos pa GetSemani

(Mt. 26:36-46; Mk. 14:32-42)

³⁹Yehshwa okis, wan kina kimatiloya kichiwaloya oy pa in tepetLom itok Oliwo'; wan nimonestililme kitokaloya. ⁴⁰Kimani o'as ompa Yehshwa kinmili:

—Shiktahtoltik Dyos, pa amo kitilanas anmoyol tawalilot.

⁴¹Kwakin panoti wehkit ka yehwante kina tamotaliste ka se tet, wan ompa omotankwakets wan kitahtolti Dyos. ⁴²Wan kitowaya:



© 1996 David C. Cook

Yehshwa kitahtolti Dyos pa GetSemani (Lukas 22:44)

—Tats, ta tihnek, shinishkishti pa in takoniliste chichik; ma yok amo mochiwas in yewal newal nihnek, hanwel shikchi in yewal tewal tihnek.

⁴³Omoneshti kwakin se Nitawawitanhel pa in takpakllwikak pa kimakaskya chikawaliste. ⁴⁴Ka miyak takokoliste, Yehshwa kitahtaniyaya Dyos ka miyak chikawaliste, wan nitonalmikil wetsiyaya talpa kina yEste wehwe tashikaya.

⁴⁵Kimani Yehshwa omokets kwah otam okitahtolti Dyos, opanoti kaha katkaloya nimonestililme wan okinmit koshtikatkaloya, kampa moyolkokotikatkaloya. ⁴⁶Kinmili:

—Pates ankoshtikat? Shimoketsak, wan shiktahtanik Dyos pa amo anmishtilanili tawalilot anmoyol.

Kikitskil Yehshwa

(Mt. 26:47-56; Mk. 14:43-50; Yh. 18:2-11)

⁴⁷Kwah Yehshwa tahtotikatmaya, asiloya myak mase-walme. In ta'ishpa yewal yawiya Yudas, yewal katka se ka 12, wan mo'ashilti ka Yehshwa pa kitenamikiskya. ⁴⁸Yehshwa kili:

—Yudas, ka se tenamikiliste titemakas NitakaTakpakllwikak?

⁴⁹Kimani yehwante katkaloya inak yewal kimatik ten panowaya, kilik:

—TATS, timomiktiske ka teposte?

⁵⁰Se ka yehwante kikokoltik nitikipanol in totatsWe, wan okikotonil ninakakwal. ⁵¹Yehshwa kinmili:

—Ya kwal onka; shikinkawak.

Kwakin kikitski ninaka in takat wan okipahti. ⁵²Haniman Yehshwa kinmili in TotatsimWehwe, in wetatakewalme gwacho' pa in TyopWe wan in Abwelolme Wehwetsim, in walaloya kiwikaloya yewal:

—Anwalal ka anmotepostim wan anmokwawim, kina newal niyeskya se ta'ishtikyan? ⁵³Hanse tonatim nikat kaya ka anmehwante pa in tyopWe, wan amo annishkitskik; in onka ora ka anmehwante, in ni'ora Satán ka nichikawaliste kaha tatikommat.

Petros kitos amo ki'ishmat Yehshwa

(Mt. 26:57-58, 69-75; Mk. 14:53-54, 66-72; Yh. 18:12-18, 25-27)

⁵⁴Yehwante kikitskik Yehshwa, wan kiwikak pa nikal TotatsWe; Petros kitokatiyaya wehkit. ⁵⁵Pa ipanta ni'shtawak in kal tatatik wan motalik kiyawalok tetsoshte; niyok Petros omotal ika yehwante. ⁵⁶Se tikipanolSiwat, okit yowatikatka ta'ishpa pa in teshoshte, kitaya kwal yewal wan kito:

—In niyok katka ka yewal.

⁵⁷Petros tikwaman, wan kito:



© 1996 David C. Cook

Yehshwa kipahti se nitikipanol TotatsWe (Lukas 22:51)

—Siwat, newal amo nikishmat.

⁵⁸Hani takwitapit, okse okit wan kili:

—Tewal niyok se ka yehwante.

Petros kili:

—Takat, amo ninewal.

⁵⁹Kina pa se ora, okse kito:

—Melak, in katka inak yewal, kampa niyok Galileyo.

⁶⁰Wan Petros kili:

—Takat, amo nihmat ten titakestik.

Wan haniman, kimani Petros tahtowaya, in gayo waltsats.

⁶¹Haniman in TATS momalin okit Petros, kwakin Petros ki'il-namik nitahtolme in TATS kimani kili: "Ayamo tsatsis in gayo, tikitos yeshpa kampa amo tishishmat." ⁶²Haniman Petros okis ompa wan chokaya ka miyak yolkokoliste.

Yehshwa tawetskilil wan tawitekil

(Mt. 26:67-68; Mk.14:65)

⁶³Wan in takam yewal kikwitaptikatkaloya Yehshwa kiwetskililoya yewal wan kiwitekiloya.

⁶⁴Niyok kitsakwilik nishtololwam kiwachililoya pa nishayak, wan kililoya:

—Shitichil akyewal omishte!

⁶⁵Wan hyero kililoya myak tahtolme pa mochten.

Yehshwa ininta'ishpa in kaha tahosgaroloya in tanichikolme tatakewalme yudiyo'

(Mt. 26:59-66; Mk.14:55-64; Yh. 18:19-24)

⁶⁶Kimani otanes, monichikok in Abwelolme Wehwe-
tsim pa in pweblo in TotatsimWehwe, wan in Tamash-
tinilme NitawawatilMoshé, wan kiwikak Yehshwa kaha
tahosgaroloya in tanichikolme tatakewalme yudiyo' wan
kitahtanilik:

⁶⁷—Titewal in Kristo?

Yewal kinmili:

—Ta annimichiliskya haha, amo annishneltokaloskya.

⁶⁸Wan ta annimishtahtaniliskya, amo annishnankililoskya.

⁶⁹Pa ashka haniman in NitakaTakpakIlwikak motalis pa
nimahwakwalDyos ka nichikawaliste.

⁷⁰Moshte kitoloya:

—Yok yewal tewal nikonDyos?

Yehshwa kinnankili:

—Anmehwante anmoselte ankitol kampa ninewal.

⁷¹Kwakin yehwante kitok:

—Yahmo monek titahtantiyaske? Kampa tehwante toselte tihkakik ka isel ikamak.

Yehshwa ni'ishpa Pilatos

(Mt. 27:1-2, 11-14; Mk.15:1-5; Yh. 18:28-38)

23 ¹Kwakin moshte yehwante moketsak, wan kiwikak Yehshwa ni'ishpa Pilatos. ²Ompa kipewililo ya teshpawiliste, kitoloya:

—Tikitak in takat kinkwamantikatka in masewalme. Kitowaya amo tiktashtawilitiyaloskya in Kaysar ka nitapishkalisteTomi, wan yewal kito kampa yewal in Kristo, in kinek kitos, se Rey.

³Kimani Pilatos kitahtanili:

—Titewal in Rey ka in yudiyo'?

Yehshwa kinankili:

—Tewal tikito.

⁴Pilatos kinmili kwakin TotatsimWehwe wan myak masewalme:

—Newal amo nikit ten amokwal pa in takat pa yok yes tatsakwal.

⁵Yehwante kitotikatkaloya ka chikawaliste:

—Ka nitamashtiliste mo'onanaske in masewalme kipewaltitiwal pa tal Yudaya walatik pa Galileya, astik nika.

Yehshwa ni'ishpa Herodes

⁶Kimani Pilatos takak in, otahtan ta yewal katka galileyo. ⁷Kwah Pilatos okimat yewal katka pa nireynaroliste Herodes, wan okititanil Herodes pa in tonatim wan niyok katka pa Yerushalém. ⁸Herodes kwal tamat kwah okit Yehshwa, kampa kinekiya kitaskya pa miyak tonatim; kampa takakiya myak nitaketsaliste yewal, wan kichiyaya pa kichiwaskya se taneshtiliste. ⁹Herodes kitahtanili myak tahtolme, Yehshwa amoten kinankiliyaya. ¹⁰Niyok ompa katkaloya TotatsimWehwe wan Tamashtinilme NitanawatilMoshé, wan kiteshpawililo ya ka miyak chikawaliste. ¹¹Kwakin Herodes wan nigwacho' hyero kichiwililo ya wan kiwetskililo ya yewal, wan kitakemiltik ka shashal kwahkwalme kina se Rey. Kwakin Herodes kikwepil oksep Pilatos. ¹²Kwah ayamo mo'asiyaya in tonat Pilatos wan

Herodes mokwalanililoya mokokoliloya; pa in tonat monotsak kwal ninihni.

Yehshwa kipiyya pa mikiskya

(Mt. 27:15-26; Mk. 15:6-15; Yh. 18:39-19:16)

¹³Pilatos kinnichiko in TotatsimWehwe wan wetatakewalme wan in masewalme, ¹⁴wan kinmili:

—Anmehwante annishwalikilik in takat, kiteshpawilitikat kampa kipewaltiyaya ka nitamashtiliste mo'onantikak masewalme; ma yok newal niktahnanili pa anmo'ishpa anmehwante, wan amo nikit amoten ka in takat ka in ten kiteshpawilitikat. ¹⁵Oniktitanil Herodes wan amo niyok yewal amoten okit pa yes takokoltili. Ma yok, in takat amoten okichi ten amokwal pa yes tamiktiliste. ¹⁶Nihkokoltis, wan kwakin nihmakawas.

¹⁷Wan pa se ka mitotiliste, yewal kipiyya pa kimakawaskya se tatsakwal. ¹⁸Wan moshte kipewaloya tsatsiliste kitoloya:

—Shikmikti in se! wan shihmakawak BarAbas!

¹⁹BarAbas katka tatsakwal kampa omo'onan kampa omomikti ka in Wepweblo, wan niyok kampa otamikti. ²⁰Kina Pilatos kinekiya kimakawaskya Yehshwa, oksep kinmili in masewalme; ²¹yehwante wehwe tsatsiloya kitoloya:

—Shikilpik pa se kruskwawit! Shikilpik pa se kruskwawit!

²²Pa in yey tahtoliste oksep kinmili:

—Ten amokwal okichi in takat? Newal amo onikit ten tachiwaliste amokwal pa yok yes tamiktiliste. Nihkokoltis, wan hani pa nihmakawas.

²³Ma yok yehwante tsatsitikatkaloya, kinekiloya yewal Yehshwa yeskya ta'ilpil pa kruskwawit; Hyero tsatsiloya yehwante amo momakawaltiloya ka tsatsiliste. ²⁴Kwakin Pilatos tatake pa kimiktiloskya Yehshwa kina yehwante kinekiloya, ²⁵okimaka akyewal tahtaniloya, yewal katka tatsakwal kampa omo'onan kampa omomikti pa Wepweblo wan otamikti, wan otemak Yehshwa kina yehwante kinekiloya masewalme.

Yehshwa ki'ilpik pa se kruskwawit

(Mt. 27:32-44; Mk. 15:21-32; Yh. 19:17-27)

²⁶In gwacho kiwikak Yehshwa pa ki'ilpiloskya pa se kruskwawit, pa ot kikitik se takat itoka Shimón, yewal walaya pa tashosholtik wan okitakewak pa kiwikaskya

nikruskwawit ikwetap Yehshwa, Shimón otakat pa in tal itok Sirene.

²⁷Takwitap ka Yehshwa myak masewalme, wan myak siwam chokaloya moyolkokotikatkaloya ka yewal. ²⁸Yehshwa okinmit wan kinmili:

—Anmehwante siwam anmochantilme pa Yerushalém, amo shinishchokilitiyak newal, ma yok shichokak ka anmehwante anmoselte wan ka anmopilwam. ²⁹Kampa asis in tonat kampa in masewalme kitoske: “Ma yek ka miyak pakiliste in siwam yehwante amo'ik yek nantsisti amo kipi yak piltontim pa kinchichiltiloskya.” ³⁰In masewalme kitahtaniske in tepetLom: “Shiwetsik ipa tehwante”; wan kinmiliske lom: “Shitishtapach mochi.” ³¹Kampa ta newal yewal amoten onikchi ten amokwal nishmiktil, yok ten amo kinpanos in kichiwal ten amokwal?

³²Ka Yehshwa kiwikaloya niyok in oksek omente katkaloya ta'ishtikiyanilme pa yok yeloskya tamiktilme inak Yehshwa. ³³Kimani asik kampa ta'itok NitsontekMihki,^q ompa ki'ilpik pa kruskwawit niyok in ta'ishtikiyanilme: se pa nimahwakwal Yehshwa wan in okse ka nimahwamapoch. ³⁴Yehshwa kitowaya:

—Tats, shikinihnil, kampa amo kimatil ten kichiwal.

Wan in gwacho' motashilik inintonal pa motemakaloskya ika yehwante nitakemtel. ³⁵Kimani in masewalme tachishtikatkaloya, in wetatakewalme kiwetskililoya yewal, wan kitoloya:

—Kinkishti ka ininpoliwiste oksek, ma mokishtil yoliliste isel, ta melawak in yewal Kristo, in nita'onanal Dyos.

³⁶Niyok in gwacho' kiwetskililoya yewal, ki'asiloya wan kitenewilik nihugoUbaShokok, ³⁷wan kitoloya:

—Ta titewal tirey ka in yudiyo', shimokishtil moyoliliste tewal mosel.

³⁸Katka se tapahwil pa se kwawitPatak ipa nitsontek tapahwil ka tahtol gereka, latin wan hebreteko, kitowaya: “IN YEWAL ININWEREYYUDIYO'.”

³⁹Se ka in ta'ishtikiyanilme yewal ompa salotikat kaya hyero kiliyaya wan kitowaya:

—Ta titewal tiKristo, shimokishtil mosel moyoliliste, wan shitishkishtil toyoliliste tehwante.

^q 23:33 NitsontekMihki in kinek kito: Kalabera kaha niyok ta'itok Golgota.

⁴⁰Wan in okse oki'ahwa wan kili:

—Amo timomapti ka Dyos, hanwel amo tipanotik niyok in takokoliste? ⁴¹In ten tehwane ashka timoyolkokotikat, kampa melak amokwal tikchiwak ashka titashtaptikat ka takokoliste yok kina ten amokwal otikchiwak; in takat amoten kichi ten amokwal.

⁴²Wan ta'ishtikiyan kili:

—Shinishilnamik newal kimani ti'asis pa moreynaroliste.

⁴³Yeshwa kili:

—Melak nimichili, kampa ashka tiyes ka newal pa nikwahmillwikak Dyos.

Yeshwa miki

(Mt. 27:45-56; Mk. 15:33-41; Yh. 19:28-30)

⁴⁴Katka takwalispa. Kwakin omoka tayopti ka tatikomat ipa in tal, yok oye kishki pa in yey ora pa tyotak. ⁴⁵In tonat waltayoway, wan in tatahkitil weyak tilawak pa in tyopWe tsayani ipanta omochi ome. ⁴⁶Pa haniman Yeshwa wehwe tahto wan kito:

—Tats, pa momahwam onka no'ihyo.

Wan takwitapik otam okit in, omik.

⁴⁷Kimani in gwacho wetatakewan okit ten opan, kitowaya tahtolme wehwe pa Dyos, wan kito:



© 1996 David C. Cook

*In tatahkitil weyak tilawak pa in tyopWe
tsayani ipanta omochi ome (Lukas 23:45)*

—Melawak, in takat oye kwal.

⁴⁸Kwah okitak ten panowaya, moshte masewalme yehwante kitatikatkalo ya in tamiktiliste, omokwepak ininicha hyero moyolkokotiyalo ya. ⁴⁹Moshte yehwante ki'ishmatilo ya Yehshwa, wan in siwam yehwante kitokatiyalo ya pa in tal Galileya, kitatikatkalo ya in ten panotikatka pa wEhka.

Kitapachol Yehshwa

(Mt. 27:57-61; Mk. 15:42-47; Yh. 19:38-42)

⁵⁰Katka se takat kwal wan kwal kimatiya kichiwaya itoka Yosé, yewal katka se ka in tanichikol ka wehwetatakewalme. ⁵¹Amo katka ka in taketsal ka in wehwetatakewalme niyok in ten kichiwak pa kimiktik, in Yosé otakat pa Arimataya pa se Wepweblo Yudaya wan niyok kichiyaya in tonat kwah reynaroskya Dyos. ⁵²Yok panoti oy okit Pilatos wan okitahtan nikwerpo Yehshwa. ⁵³Kimani okitemowik pa



© 1996 David C. Cook

*Yosé otakat pa Arimataya kitali nikwerpo
Yehshwa kaha koyonkeTeshkal (Lukas 23:53)*

nikruskwawit, haniman okilyar pa se shahsal yankwik wan kital kahakoyonkeTeshkal, kaha ayamo'ok kitaliloya se mihki. ⁵⁴Katka in tonat pa motayokshitililoya mase-walme pa Isra'El kampa mostatik amo motikipanowaya in tonatmosewilyudiyo.

⁵⁵Kitokatiyaloya Yosé in siwam yehwante kitokatiwalaloya pa Galileya Yehshwa, oyak kitak in kahakoyonkeTeshkal wan kitak kina okitalik nimihki. ⁵⁶Kwakin mokwepak pa ininicha, pa kichiwaloskya kwal ahwiyalme wan kishawililoskya nimihki, wan mosewik pa nitonatmosewilyudiyo, kina kito NitanaawatilMoshé.

Yehshwa owalyol oksep

(Mt. 28:1-10; Mk. 16:1-8; Yh. 20:1-10)

24 ¹In tonat kipewalti ta'ishpa yewal chikomeTonatim, hyero watsinkit in siwam mokwepak kahakoyonkeTeshkal, kaha kitaliloya nimihki kiwikaloya ahwiyalme; yewal kichiwaloya. ²Kwah asik, okitak in tet ka tatsakwal kahakoyonkeTeshkal katka tamihmilwil; ³okalakik, amo kitak nimihki in TATS Yehshwa. ⁴Kwah yehwante motah-tanililoya, ten aso opan, omente takam ka inintakemtel tipitakalme omoketsak inak yehwante. ⁵Ka miyak tamaptiliste mokwalpachok talpa, wan yehwante kitol:

—Pates ankitemol ika mihmihki yewal yoltik? ⁶Amo nika onka, owalyol oksep. Shikilnamikik kina anmichili kwah katka pa Galileya, ⁷in monek yewal in NitakaTakpakIlwikak yes tatemakal pa nimahwam in takam ta'ihetakolme, wan yes pa ta'ilpil pa kruskwawit, ma yok pa in yey tonatim walyolis oksep.

⁸Wan yehwante ki'ilnamikik ten kinmili Yehshwa, ⁹wan kimani walmokwepak kahakoyonkeTeshkal kintakichilik mochi in 11, wan moshte in oksek. ¹⁰In yehwante kinmilik in tatitanilme katka Marya in siwat takati pa Magdala, Yohana, Marya ninantsi Yakob, wan in oksek siwam. ¹¹In ten taketsaloya in siwam kintamashti in tatitanilme kampa amo kimatiloya ten kitotikatkaloya, yok amo kinneltokaloya.

¹²Ma yok, Petros motaloti pa in kahakoyonkeTeshkal; omokwalpach, otachi pa kalitik, wan okit in shashal kwakin omokwep icha motapololtitiyaya in ten panowaya.

In ot pa Ema'ús

(Mk. 16:12-13)

¹³Pa in se tonat, omente ka yehwante yaloya pa in ot pa se ranchit itok Ema'ús, katka kina pa 11 kilometro' pa Yerushalém. ¹⁴Taketstiyaloya mochi in yewal ten panowaya; ¹⁵wan kimani taketsaloya wan mokwalantitiyaloya ika iselte, Yehshwa kinas wan yawiya inak yehwante. ¹⁶Ma yok yehwante amo ki'ishmatiloya, wan nesiloya kina kipiyaloya tapacholme nishtololwam. ¹⁷Nesiloya ka miyak yolkokoliste yewal Yehshwa kintahtanili:

—Ten antaketstiwala anmehwante?

¹⁸Se ka yehwante, yewal itoka Kelópas, kinankili:

—Tewal han in se pa Yerushalém yewal amo kimat in ten opan pa in tonatim?

¹⁹Kwakin Yehshwa kito:

—Ten opan?

Wan yehwante kinankilik:



© 1996 David C. Cook

In tanawatilanelme moneshtik ka siwam (Lukas 24:7)

—In ka Yehshwa in nasareteko, yewal ni'ishpa Dyos wan ni'ishpa in masewalme katka se niTaketsal nitahtolDyos kipiyya miyak poderoliste ka tachiwaliste wan ka tahtolme; ²⁰In TotatsimWehwe wan in towetatakewalme kitemakak pa kiteshpawiloskya pa kimiktiloskya wan ki'ilpiloskya pa kruskwawit. ²¹Tehwante tikchishtikatkaloya yewal yeskya in se pa kinkishtiskya moshte Isra'El pa in topolewiliste. Ma yok, in opan pa yey tonatim. ²²Niyok sek siwam yewal katkaloya ka tehwan te otishmaptik, kampa oyak pa in kahakoyonkeTeshkal tahtanesti, ²³kina amo okitak nimihki, owalak tichilik kampa tachiyaloya kina tatimiktiyaloskya yewal sek nitanawatilanhelme kinmilik yewal yoltik. ²⁴Sek ka tehwan te oyak pa in kahakoyonkeTeshkal wan okitak yok kina kitol siwam, ma yok yewal amo kitak.

²⁵Kwakin Yehshwa kinmili:

—Amo ankimatil antakakil kina anwehkawal pa antaneltokaske mochi kina kitol, in Taketsalme nitahtolmeDyos! ²⁶Hanwel amo monekiya yewal in Kristo pa panoskya in takokoliste pa kimani yaskya pa in ilwikak pa reynaroskya pa nimahwakwalDyos ka nitawiliste?

²⁷Kwakin kintakechiliyaya pa mochi kaha tapahwilme pa in takwihkwiloliste pa kishki taketsaloya ka yewal, okipewalti ka ni'amam Moshé wan pa moshte nitapahwilme pa in Taketsalme nitahtolmeDyos. ²⁸Kimani asik pa in ranchit kaha yaloya, Yehshwa omochi kina hanse panoskya. ²⁹ma yok yehwan te kichikawaltik pa mokawaskya, kilik:

—Shimoka ka tehwan te, kampa ya tyotak, wan tayopti.

Wan Yehshwa okalak wan omoka inak yehwan te. ³⁰Kimani yowatikatkaloya kaha takwal inak yehwan te, okonan pan, wan okimak tashtawiliste Dyos, wan okishel ipanta wan okinmak yehwan te. ³¹Pa haniman mo'ishtapok nishtololwam, wan ki'ishmatik; hani yahmo kitak Yehshwa. ³²Kwakin mo'ililoya se ka okse:

—Amo tatatiyaya toyolme, kwah tishmashtitiwalaya pa ot nitakwihkwilolisteDyos?

³³Haniman, moketsak wan walmokwepak pa Yerushalém, kaha kinmitak in 11 ompa nichikotikatkaloya wan niyok ompa katkaloya in oksek ninihniwam. ³⁴Yehwan te kitoloya:

—Melak in TATS yoltik, wan moneshti ka Shimón.

³⁵Kwakin in omente kintakichililoya ten kinpanowaya pa in ot, wan kina ki'ishmatik Yehshwa kwah kishel in pan.

Yehshwa omoneshti ka nimoneshtililme

(Mt. 28:16-20; Mk. 16:14-18; Yh. 20:19-23)

³⁶Kwah taketstikatkaloya ka in mochten, kwakin Yehshwa moneshti ipanta kaha katkaloya wan kinmili:

—Sewiliste ka anmehwante.

³⁷Kwakin momaptik hyero wan moyoyokatikatkaloya, tamatiloya kampa kitatikatkaloya se espiritu. ³⁸Wan Yehshwa kinmili:

—Pates anmomaptitikat? Wan pates yok antamatitikat pa anmoyol? ³⁹Shikitak nomahwam wan nokshiwam. Newal ninewal. Shinishkitskik wan shinichitak; se espiritu amo kipi nakat wan weso kina ankital newal nikpi.

⁴⁰Wan kinmili in, kinnishtili ininmahwam wan nikshiwim. ⁴¹Wan kina yehwante kipiyaloya pakiliste wan in tapololtiliste amo kineltokaloya, wan Yehshwa kinmili:

—Ankipiyal nika ten pa nikwas?

⁴²Kwakin yehwante kimakak tahko mich tawatsal, ⁴³wan yewal okonan wan okikwa pa ininishpa yehwante. ⁴⁴Hani kinmili:

—In ten opan ka newal in yewal newal annimishtakichil kimani nikatka ka anmehwante: monekiya yewal mo'asiskya mochi in ten onka tapahwil pa in amam ipa newal pa NitanaawatilMoshé, pa in niTaketsal nitahtolDyos wan pa in Salmos.

⁴⁵Kwakin kinishtapol ininta'ilnamikiliste pa kimatiloskya kikakiloskya ten kinekiloya kitoloskya in tahtolme pa in nitakwihkwilolisteDyos, ⁴⁶wan kinmili:

—Yok onka takwihkwilolme, wan yok monekiya pa kipanoskya in Kristo, wan yoliskya oksep pa in mihmihki kwah panoskya yey tonatim; ⁴⁷wan ka ni'itokaliste yeskya taketsaliste pa kichiwaloskya ten kwal pa kineshtiloskya kampa kikweptikatkaloya ininta'ilnamikiliste wan kineshtiloskya kampa kikweptikatkaloya ininyolme ka Dyos ka inintachiwaliste kwahkwalm, ka ta'ihniliste ininta'ihntakoliste moshte inik tanichikolme pa mochtal, omopewalti pa Yerushalém. ⁴⁸Pa in anmehwante ankital mochi in yewal ten panotik. ⁴⁹Newal niktitanis ipa anmehwante in nitateniwiliste notats; anmehwante shimokawak pa in Wepweblo pa Yerushalém kimani kinamikiske nichikawaliste in yewal wal pa in takpakIlwikak.

Yehshwa otakis pa in takpakIlwikak
(Mk. 16:19-20)

⁵⁰Kwakin Yehshwa okinwik ompa pa BetAnya, wan kinahkoki nimahwam kinmashtiyaya. ⁵¹Kwah kinmashtiyaya, omokishtil ka yehwante wan mo'ahkoktiyaya pa in takpakIlwikak. ⁵²Yehwante, kililoya tahtolme wehwe pa Dyos, wan walmokwepak ka miyak pakiliste pa Yerushalém, ⁵³wan hanse tonatim katkaloya pa in tyopWe kililoya tahtolme wehwe pa Dyos wan kimashtiloya Dyos. Yok ma ye.



© 1996 David C. Cook

Yehshwa tehko pa ilwikak (Lukas 24:51)